

# ليست غداً

رواية بالعامية المصرية



دينا عماد

نشر  
الالكتروني

لیست عذراء

# ليست عذراي

2013

دينا عماد

رواية بالعامية المصرية

---

الغلاف والخراج الفني :

احمد محمود

---

حقوق النشر محفوظة للمؤلفة ولايجوز اعادة  
نشر هذا الكتاب او مقتطفات منه . او الاقتباس  
دون ذكر المصدر . الا بموافقة من المؤلفة . ومن  
يخالف هذا يعرض نفسه للمسائلة القانونية

# ليست عذراء

رواية بالعامية  
المصرية

دينا عماد

الفرار  
من النار

الي ابنتي

الي كل بنت

اياكي والخوف

دينا عماد

## مقدمة

عندما بدأت كتابة أولى حلقات "ليست عذراء" فى ابريل الماضى على مدونتى... تعرضت لهجوم شديد واتهامات كثيرة من قبل قراءة القصة لكن مع نشر الحلقات... وتواصل الكثير من القارئات معى... تبين لى ان كثيرات وقعن ضحايا منهن باسم الحب ومنهن ضحايا لاختصاب او تحرش... والاغرب ان كثير من هذه الحوادث يتم من افراد موثوق فيهم داخل الاسرة او فى اطار العائلة

لم اتوقع ان بنات كثيرات لديهن هذا السر... انهن لسن عذارى تعيش الفتاة وبداخلها سر يؤرقها ويعذبها ولا تستطيع البوح به حتى لا قرب الناس... والجانى يتمتع بحياته كما يحلو له بل وله التقدير والاحترام من الجميع... عدا ضحيته

اقدم رسالة لكل لبنات... لكل ام... لكل اسرة

لا للخوف... لا للسكوت

لا تلوموا الضحايا وتتركوا الجانى خوفا من شبح الفضيحة

لا اقدم رواية ادبية... اقدم دراما مقروءة تشاهدها ف خيالك

واتمنى ان تصل رسالتى للجميع

دينا عماد

## . 1 .

### صوت جرس الباب ببيرن

مايا بتفتح عينيها على الصوت... بتقوم من ع السرير... سامعة  
صوت باباها وجدتها بره... بتقوم تقف قدام المراية... تبص بحزن  
على جمالها وملامحها الاوروبية عيونها الزرقا وبشرتها البيضا  
وشعرها الاشقر... بتقرب من المراية ويتلاحظ الهالات السودا تحت  
عينيها ويتلمسها

باب الاوضة بيخبط... بيتفتح الباب

"العروسة صحيت ولا لسه"

بتقرب منها نسرين "حامل فى الشهر الاخير" وبتسلم عليها

بتفرح مايا لما تشوفها... فرحة مكسورة... بيحضنوا بعض

"حمدالله ع السلامة يانسرين... كده متجيش من بدرى"

"معلش يامايا.. ممدوح معرفش ياخذ اجازة الا يومين بس"

"يعنى مش هتقعدى معايا شوية"

"معاكى فين يابنتى... ده انتى كلها كام ساعة وفارس هياخذك"

على عش الحب وطير ياحمامااااا"

نسرين بتضحك وهى بتغنى... مايا بتحاول تبتسم... متقدرش

...تلاحظها نسرین

"مالك يامايا"

"متضايقة... خائفة... مش عارفة"

"معلش مش هتخافي اكثر منى.. ده انا يوم الفرح كنت مرعوبة بس

بدل بتحبي عريسك وهو بيحبك متخافيش من اى حاجة"

مايا بتسكت مبتردش... بتبص لها نسرین

"ايه ده يامايا... وشك باي عليه الاجهاد... انتى مش نايمه كويس؟"

"بقالى بتاع اسبوع مبنمش... لو عرفت انا ساعتين يبقى من الله"

بيرن موبايل مايا ع السرير... بتمسكه نسرین... وترد

"الو... لا مش حبيبتك... جيت من ساعة بس... وانت كمان

واحشنى يافارس... الف مبروك ربنا يتمم بخير... خلى بالك من

مايا انا بقولك اهو... انا عند نينة تحت... اه طبعاً هطلع اسلم على

خالتي... ممدوح وصلنى وخرج شوية... مايا معاك اهي"

بتناول مايا التلفون... مايا بتاخده

"انا يدوب سلمت على ماما ونزلت لك... هطلع اسلم على خالتي

علشان متزعلش.. لما تخلصى وتفطرى وتفوقى رنى عليا انزلك"

"هتيجى معايا الكوافير مش كده... متسيبيني يا نسرین النهاردة

بالذات"

"حاضر يا حبيبتى... جاية معاكى طبعاً"



اخذت مايا التليفون... وخرجت نسرین من الاوضة

"الو"

"صباح الخير يا حبيبتي"

"صباح النور"

"انا رايح الشقة اودى اكل... عايزانى اخذ حاجة وانا رايح"

"لا... فارس انا عايزة اتكلم معاك"

"خير؟"

"موضوع مهم... ينفع تنزلى نتكلم"

"طيب حاضر... هلبس وانزلك"

\*\*\*\*\*

فارس قفل مع مايا وكمل لبسه... خرج من الاوضة

راح لباباه اللي كان قاعد يقرا الجورنال

"صباح الخير يا بابا"

"صباح النور يا عريس... مبروك يا بنى"

جت حياة من المطبخ

"الاكل اللي هتشتريه يا فارس اوعى تسيبه بره التلاجة... الجبن ع

الرف واللحوم ف الفريزر"

فارس "حاضر ياماما"

توفيق بيطلع فلوس من جيب الجلابية

”خد يا فارس“

فارس ”شكرا يا بابا ... معايا الحمد لله“

توفيق ”ما انا عارف ربنا يزيدك... بس دى هدية جوازك“

حياة ”خد من ابوك يا فارس... ربنا يسعدكم يا بنى“

توفيق ”اعمليلي كوباية شاي يا حياة“

حياة ”حاضر“

توفيق بيميل على فارس

”عايز اقولك كلمتين مهمين“

”اتفضل يا بابا“

”انا عارف انك بتحب عروستك... بس اوعى الحب ده يخليك

ضعيف قصادها... اوعى تسمح لها انها تمشى كلمتها عليك ولا

تتدلع بجمالها... لازم تدبح لها القطة من اول يوم... اول يوم ده

اللى هيرحك العمر كله او يتعبك العمر كله... ياهتكون انت الراجل

ياهتكون هي الراجل... وانت راجل من زهر راجل ولا ايه؟“

”طبعاً يا بابا... بس مايا عارفاي كويس وعارفة طبعى وهى هادية

... انا متأكد انها هتكون زوجة مطيعة“

”ربنا يسعدكم يا بنى“

دخلت حياة بالشأى... ف نفس اللحظة اللى رن فيها جرس الباب

فارس بيقوم يفتح

"دى اكيد نسرين...كانت عند نيئة تحت وقالت هتطلع لنا"

بيفتح الباب لنسرين...بتسلم عليه

"ازيك يا عريس... ازيك ياخالتي...ازيك يا عمو"

\*\*\*\*\*

فؤاد قاعد مع مامته ع الفطار... تخرج لهم مايا وتعدد معاهم

"صباح الخير بابابا...صباح الخير يا نيئة"

بيردوا عليها التحية

الجدة"انتى نمتى امتى... ده انتى كتى صاحية ساعة الفجر"

مايا"نمت من شوية كده"

فؤاد"ليه كده السهر ده"

مايا"غصب عنى مبيجيليش نوم"

الجدة"طب كللى لقمة علشان انتى طول اليوم هتبقى ف الكوافير"

مايا"حاضر"

بيرن جرس الباب...بتقوم مايا تجرى

"ده اكيد فارس"

بتفتح الباب... فارس بيدخل

"صباح الخير يا نينة...صباح الخير يا خالى"

فؤاد"اهلا يا فارس...تعالى كنت عايزك"

مايا بتشد فارس قبل ما يدخل

"انا عايزة اتكلم معاك"

فارس"هشوف خالى الاول واقعد معاكى"

فؤاد"فطرت يا فارس"

فارس"اه الحمدلله"

يقوم فؤاد من ع الفطار

"طب تعالى ف الصالون هنتكلم شوية "

دخل فؤاد الصالون وراح فارس وراه

مايا رايحة وراهم...نادت عليها جدتها

"تعالى يا مايا افطرى"

"لا شبعانة يا نينة...شكرا"

جرس الباب بيرن...بتروح مايا تفتح

"صباح الخير يا مايا"

"صباح النور ياعمتو"

"نسرين نزلت ولا لسه عند حياة"

"اكيد عند عمتو حياة"

دخلت ايمان لمامتها المطبخ..ووراها مايا

ايمان"صباح الخير ياماما"

الجددة"صباح النور...جيتى ف وقتك"

ايمان"متقلقيش انا قلتك هاجى اطبخ معاكى اكل العروسة... قوليلى

يا عروسة اعملك ايه جنب الفراخ"

مايا وهى بتخرج م المطبخ

"اى حاجة"

\*\*\*\*\*

فارس مع فؤاد

فؤاد"انت عارف يا فارس ان انت ابنى وان مامتك وبابك ربوا مايا

اكثر ما انا ربيتها"

فارس"طبعاً ياخالى"

فؤاد"وانت لما خطبتها وهى وافقت انا متكلمتش ف اى حاجة"

فارس "حصل"

فؤاد "بس النهاردة كتب الكتاب ولازم هيكون فيه اجراءات نتكلم

فيها ومش هنتكلم فيه قدام الناس"

فارس "تقصد يعنى المؤخر وكده...اللى تؤمر بيه"

فؤاد "هنعمل قايمة زى ما عملنا لنسرين ونكتب فيها اللى ف الشقة

ومؤخر ٥٠ الف جنيهه"

فارس "حاضر ياخالى... اى اوامر تانية"

فؤاد "خلى بالك من مايا... انت هتبقى كل حاجة ليها"

فارس "مايا ف عنيا"

رن موبايل فارس...رد

"الو... ايوه يا احمد...حاضر انا نازل اهو"

كامل كلامه وهو خارج وكانت مايا مستنياه قريب من الباب

"رايح فين"

"احمد صاحبي مستنبي تحت...ورايا مشاوير كتير اوى يامايا"

"عايزة اتكلم معاك"

"بالليل يا حبيبتي... هنبقى مع بعض وهنتكلم براحتنا...انتى نازلة

امتى"

"الساعة ١"

بص فارس ف الساعة

”نسرین رایحه معاكی“

”اه نسرین وعمتو ایمان...هی مامتک مش جایة معانا لیه“

”بابا قالها تروح ع القاعة احسن...یا لا سلام“

نزل فارس ومایا واقفة ف مکانها سرحانة

\*\*\*\*\*

مایا قاعدة عند الكوافیر... خلصت كل حاجة

كل اللی داخل او خارج ینبهر بجمالها

والمثیر للانتباه... ان كل اللی یشوفها یقول

”عروسة اجنبیة محجبة“

حتى الكوافیرة نفسها لولا انها اتكلمت معاها وعارفها كانت شكت

انها اجنبیة

مایا ملاحظة نظرات الاعجاب ف عیون كل الناس

بس اللی شاغلها الحزن اللی جواها وانها مش قادرة تفرح

بتقرب منها نسرین

”ایه یا مایا... شكك زی اللی بتتجوز غصب عنها“

مايا بتحاول تبتسم...بتكمل نسرين كلامها  
"اضحكى ومنتفكريش كتير... هتطلى مكشرة ف الفيديو"  
تدخل لهم ايمان : "ياللا يا مايا...فارس وصل"

\*\*\*\*\*

مايا قاعدة على الكوشة... اثناء كتب الكتاب  
فارس قاعد مع فؤاد مع المأذون  
صوت كتب الكتاب فى الميكرفون بيمل القاعة  
كل كلمة بتتقال بتسمعها مايا بتجرح قلبها  
خلص كتب الكتاب...سمعت الزغاريط  
نزلت منها دمة غضب عنها  
لمحتها ايمان وهى بتمسح دموعها هى كمان  
نظرات ايمان ومايا اتلاقت بدموعهم  
كل واحدة فيهم اتجاهلت ان الثانية شافتها  
ومسحت دموعها وحاولت تبتسم

\*\*\*\*\*



فارس ومايا داخلين شقتهم...ومعاهم حياة وتوفيق

وايمان وفؤاد وجدتهم

دخلت الجدة مع مايا اوضتها

"مبروك يا مايا... انا وباباكي هنجيلك الضهر نطمن عليكى...

ابوكى عاش بره صحيح بس لسه دماغه وتفكيره ماشية على عاداتنا

القديمة ... وزى ما حصل مع بنت عمك لازم يحصل معاكى "

طلعت لها منديل ابيض

"خدى ده... وبكرة هنجى ناخده علشان ابوكى وحماكى يشوفوه"

قامت الجدة خرجت من الاوضة

سلمت على فارس وباسته

"مبروك يا حبيبى... خلى بالك منها"

توفيق ببسلم عليه وبيوشوشه

"زى ما قتللك... لازم تبقى راجل من اول يوم ومتنخش... يالا شد

حيلك وهنجى بكرة نطمن عليكم"

خرجوا كلهم وقفل فارس الباب وراهم ودخل اوضته

فارس داخل الاوضة لمايا...قعد جنبها على طرف السرير

”مبروك يا حبيبتي“

قرب منها يبوسها...بعدت عنه بحركة مفاجئة

”مالك“

”مفيش متوترة شوية بس“

قامت مايا وقفت قدام المراية وهى بتفك الطرحة

قرب منها فارس وحضنها...بعدت

”فارس عايزة اتكلم معاك شوية“

”هنتكلم وهنقول كل حاجة بس بعدين“

وافتكر فارس كلام باباه واتنرفز عليها

”فى ايه...كل ما اقرب منك هتبعدى وتقولى نتكلم...هو الكلام

هيطير“

مايا بخوف

”بتزعق ليه...متخوفنيش منك“

حس بيها خافت فعلا

”متزعليش يا مايا...بس محبكتش كلام دلوقتى...متخافيش“

حضنها فارس بحب وحنان...واستسلمت ليه بهدوء

فارس بيفتح نور الاباجورة وهو قاعد على السرير  
بيبص لمايا... مايا بتبعد عينيها عنه... وبتقوم من تحت الغطا  
فارس بيثيل الغطا من عليه يرميه على الارض  
مايا بتلبس الروب... فارس بيبص على الملاية البيضا المفروشة ع  
السرير

قام... مايا جاية تخرج م الاوضة... شدها من دراعها  
"ايه ده؟؟؟ ازاى يعنى"

مايا وهى بتترعش وبتحاول تلاقى مبرر  
"بتحصل"

"بتحصل ازاى... هو انا اهيل هتضحكى عليا"

عيطت مايا بخوف وقعدت على السرير وهى مرعوبة  
"انت مش بتحبنى... افهمنى"

وبكل غضب وثورة... ضربها بالقلم

"افهم ايه... افهم انك ضحكى عليا... كنتى بتمثلى علينا الادب  
والاخلاق وانتى صابحة وماشية على حل شعرك"

مايا بتعييط

"متقولش عليا كده... انت عارفنى كويس"

"انا ليا اللي عرفته النهاردة"

مسكها من دراعها وهو بيهزها بقوة

”مين اللى عمل كده... قولى ... وامتى ؟؟ وليه ضحكى عليا“

”سامحنى واسترنى يا فارس ... انا مهونش عليك تفضحنى مش

كده؟“

”استر ايه؟؟؟ واللى جايين بكرة دول اقولهم ايه“

مايا بتحاول تستعطفه

”ارجوك يا فارس... استرنى ده انا مراتك حبيبتك“

ولما قالت كده... كأنها غاظته اكثر

هجم عليها وفضل يضرب فيها

”عملتى فينا كده ليه... فيا وف ابوكى وف كل اللى وثقوا فيكى“

## . 2 .

مايا على السرير... من كتر الضرب بدأت تفقد قدرتها ع الصراخ  
قلق فارس... بعد عنها بعد ما شاف الدم بينزف من شفتها  
"قومي اغسلى وشك"  
مايا موجهة... ألم نفسي وألم جسدى  
حاولت تقوم مش قادرة... فضلت مكانها  
صرخ فيها  
"بقولك قومي اغسلى وشك ده من الدم اللي عليه"  
قامت وهى بتجر نفسها من الألام اللي فيها  
قعد فارس على طرف السرير يبص عليها  
احساس بالذنب ناحيتها... واحساس بالاشمئزاز منها  
صراع داخلى بين احساسه المتناقضة مش عارف يميل لاي احساس  
فيهم  
جنت مايا من الحمام بعد ما غسلت وشها  
وماسكة منديل بتكتم بيه الدم على شفتها اللي اتفتحت من الضرب  
قام فارس وقف.... قعدت مايا على السرير وهى بتعيط

صرخ فيها

”مين اللي عمل كده؟؟ حمزة مش كده“

بصت له باستنكار...استفزه

”ايه؟؟؟ مش حمزة... حد وانتي مسافرة؟؟؟ خونتي و احنا

مخطوبين؟؟ انطقي عملتي فينا كده ... انا مصدوم فيكى“

ونطقت بلسان ثقيل من ألها

”انا اللي اتصدمت فيك... انت واحد تانى غير فارس اللي اعرفه“

وصرخ فيها اكثر وهو بيهم يضربها... خبت وشها بايديها

”كنتى عايزانى اقولك ولا يهملك... عادى يا حبيبتي نزوة و خلاص

واخص عليه اللي سابك... احمدى ربنا انى مموتكيش“

”وانت فاكر كده مموتنيش وموت كل احساس جوايا ناحيتك“

”ليكى عين تتكلمى كمان... ماهو صحيح بعد اللي عملتيه ده مش

بعيد يطلع منك اى حاجة“

مددت على السرير تنام بوجعها النفسى والجسدى

”انتى هتنامى... قومى قوليلى غلطتى مع مين“

ردت وهى بتشد عليها الغطا

”مبقتش تفرق“

مايا نايمه صاحيه...دموعها نازله بصمت

فارس نايم صاحى...الالم بيعتصر قلبه

كل واحد فيهم ضهره للتانى

فارس بيتكلم ف سره

"ليه تعملى فيا كده... ليه فاجئتيني خلتيني مقدرتش اتحكم ف

اعصابى"

مايا بتكلم نفسها ف سرها

"كان نفسى تسمعنى الاول قبل ما تحكم عليا... كان نفسى

تسامحنى ونبدأ مع بعض صفحه جديدة زى ما كنت بتوعدى"

فارس بيكمل كلام ف سره

"كنت بحلم ان حياتنا هتبقى احلى حياة...كنت بفكر ازاي

اسعدك واعوضك عن كل حاجة فاتت... صدمتيني وحطمتى كل

احلامى"

مايا بتكمل كلامها ف سرها

"كنت كل ما افكر اللي حصل واخاف... اسمع كلامك واشوف

حبك ليا اقول هيسامحنى... يا خساره حبي ليك"

فارس بيكمل كلامه ف سره

"لسه فاكر اول مره شفتك فيها... يااه يا مايا... وفاكر كمان نظرة

حمزة ليكى"

## فلاش باك

فارس وحمزة " ٨ سنين" ونسرين " ٥ سنين" بيلعبوا على السلم

باب البيت من تحت مقفول... يظهر فؤاد قدام الباب

تدخل نسرين تجرى على بيت الجدة

"خالو فؤاد... خالو فؤاد جه يانينة"

تيجى الجدة بمفتاح الباب ... تفتح بلهفة لفؤاد

"حمدالله ع السلامة... ده ايه المفاجئة الحلوة دى"

تفتح الباب... اول ما الباب يتفتح

تظهر مايا " ٣ سنين" واقفة ف ايد فؤاد

طفلة جميلة بملامح اوروبية

فارس وحمزة واقفين جنب بعض

اتفاجئوا بالطفلة الضيفة

مال فارس على حمزة

"مين دى؟"

كانت عين حمزة مركزة على مايا وبيبتسم لها وهى كمان بتبتسم له

حمزة مسمعش سؤال فارس



دخل فؤاد البيت وهو ماسك مايا ف ايده  
نزلت ايمان ع السلم ونسرين وراها  
"فؤاد جه بصحيح... حمدالله ع السلامة"  
دخل حمزة وفارس ورا فؤاد وايمان وجدتهم  
حمزة راح لايمان  
"مين دى ياماما"  
ايمان "دى مايا بنت خالك"

\*\*\*\*\*

فؤاد قاعد ف الصالون مع مامته  
وايمان وجوزها مصطفى  
وحياة وجوزها توفيق  
وال ٣ اطفال واقفي يبصوا للضيقة الغريبة  
توفيق "فارس خد اخواتك واطلعوا العبوا بره"  
تقرب نسرين من مايا  
"تعالى العبي معانا"  
مايا بخوف تبعد وترجع لحضن فؤاد

فؤاد"روحي العبي معاهم"مايا ترفض من غير ما تتكلم وتحضن  
فؤادايما"خلاص يا نسرين... اطلعوا انتوا العبوا وسيبوا مايا"يطلع  
فارس وحمزة ونسرين يكملوا لعب ع السلم  
مايا حسنت بصداع...ومع عدم قدرتها على النوم  
قامت تدور على مسكن للصداع  
فارس حس بيها وهي قايمة  
"رايحة فين؟"  
مردتش عليه... قامت تفتح النور  
لمحت صورتها ف المراية  
بصت لنفسها...اتفاجئت  
شفتها وارمة وزرقا  
وخدها متعلم عليه خطوط حمرا من الضرب  
صعبت عليها نفسها... نزلت دموعها  
راحت اخدت المسكن ورجعت مكانها تانى  
حاولت تنام... وافتكرت اول يوم ليها ف مصر

## فلاش باك

مايا قاعدة ف حضن فؤاد  
مستغربة الناس اللي اول مرة تشوفهم  
ورغم انها كانت صغيرة... بس فاكرة كويس  
كلام كتير بيتقال بلغة مش مفهومة  
اطفال موجودين...وبنت بتكلمها وهي مش فاهماها  
كل اللي فاكره انها فضلت ف حضن باباها اسبوع  
بيعلمها الكلمات المهمة واسامى الموجودين  
وف اخر الاسبوع سابها وسافر

\*\*\*\*\*

فارس لما قامت مايا فتحت النور  
وشاف وشها... استغرب ازاي قدر يعمل فيها كده  
وافتكر انه يوم ما فؤاد جاب ومايا وجه  
وباباه قالهم يروحوا يلعبوا  
رجع هو وحمزة ونسرين...وقعدوا جنب الباب من غير ما حد  
يشوفهم

## فلاش باك

فؤاد " انا جبت مايا علشان تعيش هنا على طول"

الجددة"ليه يا فؤاد...فين مامتها"

فؤاد"هنتطلق"

توفيق"بصراحة يعنى انت غلطت لما اتجوزت واحدة لا م بلدك ولا م

دينك...لأ وخلفت منها كمان"

فؤاد"ايوه كنت غلطان... بس اهو ادينى بلحق الغلط بدرى بدرى"

ايمان"بس حرام يا فؤاد بنت صغيرة زى دى تتحرم من مامتها ف

السن ده"

فؤاد"ما انا جايبها وعارف ان هيبقى لها ٣ امهات مش ام واحدة..."

انا عايزها تتربى على عاداتنا واخلاقنا...مش عايز اللي شفته هناك

يتكرر"

الجددة"ايه اللي شفته هناك"

فؤاد"واحد صاحبي هناك... بس اكبر منى ومتجوز من زمان ونفس

الظروف شبيهه بظروفي... بنته هناك عايشة زى الاجانب مع انها

مسلمة بس بالاسم بس وراحت عاشت مع صاحبها ومامتها

بتشجعها"

توفيق"استغفر الله العظيم"

مصطفى "ماهى البنت طلعت زى المجتمع اللي عاشت فيه"

فؤاد "علشان كده خفت"

ايمان "ومراتك... سابت البنت ازاي ولا انت جبته من وراها"

فؤاد "انا وهى بيننا مشاكل كتير فاتفقنا اننا ننفصل وانا اخذ البنت"

الجدة "وهى وافقت"

فؤاد "الحمد لله وافقت علشان مش فاضية لها ووراه شغل"

الجدة "يا قلبها"

فؤاد "بس اتفقنا ان مايا تروح لها كل صيف اسبوع ولا اتنين وهى لو

عايزة تشوفها تبقى تيجى هنا... المهم ان البنت تعيش وتتعلم هنا"

توفيق "خير ماعملت"

مصطفى "وانت هترجع تستنقر هنا؟"

فؤاد "معدش ينفع... انا شغلى وحياتى استقرت هناك... انا لازم

ارجع"

الجدة "روح يا بنى شوف شغلك ومنتقلش على بنتك... اهي تتربى

مع عيال اخواتك"

ايمان "هى بتفهم عربى"

فؤاد "لا... بس اكيد هنتعلم وسطكم"

قام فارس من ع السرير وهو متضايق  
فتح شباك الاوضة ووقف يبص للسما  
وهو بي فكر

”اعمل ايه... كلها كام ساعة وهييجوا يسألوني... اهو اللي انت  
كنت خايف منه ياخالي حصل... بنتك مصانتش شرفك“  
بص لها وهي على السرير وضهرها ليه  
التفت بعيد عنها وهو مشمئز منها بعد ما افكر اللي عملته

\*\*\*\*\*

مايا مش عارفة تنام... حسست بفارس وهو قايم من جنبها  
متحركتش من مكانها...  
”لدرجة دى انا اتخدعت فيك... كان لازم اعرف انك غير حمزة...  
كان لازم افكر قسوتك عليا زمان زى ما قسيت عليا دلوقتى“

## فلاش باك

مايا ونسرين ماسكين ف ايد بعض  
بيشترتوا حاجات حلوة من جنب البيت  
حمزة وفارس بيلعبوا كورة مع اولاد تانيين  
نسرين جريت سبقت على البيت  
ولد ف سن فارس... راح لمايا  
"انتى اسمك ايه"  
"مايا"

"هو انتى ليه لابسة باروكة"

"يعنى ايه باروكة"

"شعر بيحطوه الستات على راسهم"

"لا مش حاطة حاجة... ده شعرى"

"لونه كده ازاي"

مد الولد ايده باستغراب يتأكد ان ده شعر مايا  
مسكه بتعجب وانبهار واستكشاف لحاجة اول مرة يشوفها  
جه فارس يجرى هو وحمزة عليهم  
فارس "انتى سايباه يمسك شعرك ليه"  
حمزة للولد "انت بتشدها من شعرها ليه"

الولد"مش بشدها انا بشوفه بس"  
مايا مش عارفة ترد على فارس  
زعق لها  
"متخليش حد يلمسك تانى انتى فاهمة...يالاع البيت"  
زقها ناحية البيت وقعت ع الارض  
عيطت وهى واقعة... ومد حمزة ايده يساعدها تقوم من ع الارض  
وهو بيزعق لفارس  
"وقعتها ليه"  
"موقعتهاش انا كنت بقولها تروح ع البيت"  
مد حمزة ايده لايد مايا وهو بيزعق لفارس  
"هقول لباباك"  
جرى حمزة ومايا ف ايده  
ووراهم فارس بيلحقهم قبل ما يروحوا لباباه

\*\*\*\*\*

حياة داخله اوضتها  
توفيق بيخلص صلاة  
"تقبل الله"  
"منا ومنكم"



قام توفيق... وقعد على كنبه ف الاوضة

وسرح وضحك

"بتضحك على ايه"

"عارفة افتكرت ايه دلوقتى"

"ايه"

"اول خناقة بين فارس ومايا... سبحان الله اللي يشوفهم يومها

يقول هيطلعوا مييطيقوش بعض"

"شوف النصيب... اهي بقت مراته...ربنا يهنيهم"

"يومها مع انه كان صغير بس طلع راجل بجد...مش زى حمزة"

جت سيرة حمزة... قطعت الضحكة من على وش حياة

## فلاش باك

حمزة ومايا داخلين على توفيق البيت من الباب المفتوح دائما

"عمو... فارس وقع مايا ع الارض"

مايا بتعيط... دخل فارس يجرى

توفيق بيخشط ف فارس

"زعلت بنت خالك ليه"

"سايبية ولد يمسك شعرها... مش عيب كده"

توفيق وهو بيبص لمايا...

"صحيح؟"

حمزة "هي معملتش حاجة... هو يوقعها ع الارض ليه"

توفيق "مينفعش يا حمزة انها تسبب حد يلمسها... جدع يا فارس..."

"راجل"

### . 3 .

مايا نامت بعد ما تعبها الارق والالم اللي بتعانيه

فارس نام... ومن التفكير صحا قبل مايا

فارس قاعد بيبص لمايا وهى نايمة

خيالات كتير بتيجى على باله وهو سرحان فى اللي حصل

تفكيره بيصورله ازاي كانت راضية

تفكيره بيصورله ازاي كانت بتتعامل ف الموقف

بيحاول يبعد الافكار عن خياله مش قادر

بدأت الافكار تدور حوالين مين اللي كان معاها

تفكيره المسيطر عليه... حمزة

تفكيره المتواصل.. ولما شافها نايمة

هب مرة واحدة... صحاها بعنف

"انتى نايمة وسايبانى اكل ف نفسى"

صحيت مايا على صوت زعيق فارس

وشده ليها من دراعها لدرجة انها قعدت من قوة شدته

وردت من المفاجأة

"فى ايه"

ثار اكرتر

”فيه انك ضحككتى عليا... كنتى بتضحكى علينا كلنا... مع حمزة

صح؟؟ هو حمزة... علشان كده انتى قاعدة عندهم على طول“

عيطت مايا... من خوفها من عصبية فارس... هزها بعنف

”كنتى بتحبيه... انا غلطان انى تناسيت انك كنتى

بتحبيه... سلمتى لى نفسك باسم الحب“

وبمحاولة لرد الوجد

”ايوه كنت بحبه... وانا غلطانة انى اتجوزتك... ندمانة انى صدقتك

واتجوزتك“

ثار اكرتر ومحسش بنفسه الا وهو بيضربها اكرتر

\*\*\*\*\*

حياة لابسة وطالعة من اوضتها

”انا نازلة لماما... كمل لبسك وابقى انزل علشان نروح للعرسان“

”طيب... هصلى الظهر وانزل“

\*\*\*\*\*

حياة داخله بيت مامتها... شافت فؤاد قاعد

”صباح الخير يا فؤاد“

”صباح النور... هو توفيق مش جاى معنا ولا ايه“

"لا جاى... شوية ونازل... هى ايمان منزلتش"

"لا لسه"

دخلت حياة المطبخ لمامتها... اول ما شافتها

"كل حاجة جاهزة... اعمليلى قهوة لحد ما البس"

خرجت الام من المطبخ ف نفس الوقت اللي دخلت فيه ايمان البيت

ومعها نسرین وجوزها

ايمان "نسرین جاية تسلم عليكم قبل ما تمشى"

الجددة "انتى لحقتى... مش لسه جاية امبارح... ماتتعدى معانا كام

يوم"

نسرین "معلش يانينة علشان شغل ممدوح"

الجددة "ما تسيبها ياممدوح كام يوم"

ممدوح "يرضيكى يعنى انها تسيبنى... اهون عليكى"

الجددة "لا يا بنى ربنا مايحرمكم من بعض"

نسرین "خالتو هنا... روحت لها عمو توفيق قال انها هنا"

حياة خارجة من المطبخ بالقهوة

"بسرعة كده يا نسرین... مش جاية معانا لفارس"

سلمت نسرین على حياة

"معلش ياخالتو... لسه قدامنا سفر"

حياة "تروحووا بالسلامة... انتى ف الكام على خير"

نسرین "السابع"

حياة "هانت ربنا يكملك على خير"

سلمت نسرین على كل الموجودین... وسلم ممدوح علیهم وخرجوا

\*\*\*\*\*

مايا بتعيط ف الاوضة... من الضرب

قفلت الاوضة علیها بعد ما فارس خرج منها

فارس قاعد بره وحاسس بالاضطراب

الوقت بيمر ومش عارف هیتصرف ازاى

جرس الباب رن... حس ان مفيش مفر من مواجهه الموقف

قام وفتح الباب وهو بيحاول يبتسم

جدته كانت متقدمة وجنبها فؤاد ماسكها ف ايده

ووراهم توفيق ووراه ايمان وحياة

سلموا علیه ودخلوا قعدوا وعلامات السعادة على وشهم

فؤاد "هى مايا نايمة ولا ايه"

ارتبك فارس وتمتم بكلام مش مفهوم

فسروه الموجودین على انه احراج

الجدة "لو نايمة صحيها علشان ندخل لها"

دخل فارس الاوضة

اول ما شاف مايا

“عايزينك”

وقف وضهره ليها وكأنه بيكلم نفسه

“انا مش عارف اتصرف...مش قادر اسكت واعيش معاكى وانا كل

ما اشوفك الدم يغلى ف عروقى...مش طايقك ولا طايق نَفْسك معايا

ف حتة واحدة... ومش عارف اصدتهم واقولهم الحقيقة... ياريتك

كنتى موتى ولا غورتى ف ٦٠ داهية قبل ما اتحط ف الموقف ده”

مايا مبتردش من خوفها منه

كمل كلامه باستسلام

“خلاص معدش يبجى منه وانتى اللى عملتى ف نفسك وفينا كده”

خرج فارس م الاوضة... وبعبوس

“ادخلوا لها”

بصوا الستات لبعض على طريقته...وقاموا

الجدة ووراها ايمان وحياة داخلين الاوضة

مايا قاعدة مكانها ع السرير منكمشة

اتخضوا من شكلها





فارس بيحاول الهدوء

”مسألتهاش ليه؟“

بص لها فؤاد

”ايه اللي ف وشك ده“

مايا بتتمسك بحضن ايمان اكرت وتعيط

توفيق حس ان المشكلة مش ف ابنه... شحط ف مايا

”ما تتكلمى... فى ايه“

فؤاد لفارس

”فى ايه يا فارس.. انا بسألك انت“

فارس

”فيه ان مايا فضحتك وفضحتنى... بنتك مش بنت بنوت يا خالى“

كلام فارس كان صدمة لكل الموجودين

الجدة دبت ف صدرها... وحياء كتمت صرختها

ايمان بصت لمايا بتساؤل

فؤاد الكلام كان صدمة ليه... واول ما سمعه

التفت لمايا وهجم عليها يضربها بعنف اكبر

ايمان بتصرخ وبتحوش عنها وبتتضرب ف النص

الجدة بتعيط وتشد فؤاد... حياة واقفة دموعها نازلة بصمت

ايمان بتصرخ ”كفاية يا فؤاد... كفاية هتموت ف ايدك“

توفيق بيزعق لايمان

”سيبيه يموتها بدل العار اللي جابته لجوزها“

ايمان”بالراحة عليها...هي لو بنتك كنت قلت كده“

فؤاد”مين؟؟؟غلطتى مع مين؟؟ومن امتى؟...اتكلمى“

ايمان وهي بتبص لمايا

”مايا...مايا...كفاية يا فؤاد البت هتموت“

توفيق”انتى الوحيدة اللي بتدافعى عنها... علشان تدارى على

غلطتها مع ابنك...مفيش غير حمزة هو اللي عمل كده“

والتفت فؤاد وحياة والجدة لايمان...بنظرات الاتهام

ايمان بتعيط

”متجيبش سيرة ابنى... ابنى ميعملش كده ابدأ... اتكلمى يامايا

وقولى انه مش حمزة“

مايا فاقدة الوعي ف ايد ايمان

ايمان برعب ”مايا...مايا...كلمينى“

توفيق”ف ستين داهية“

فؤاد بقلق بيهز مايا ”مايا...مايا“

\*\*\*\*\*

توفيق وحياة وفارس وفؤاد قاعدين ساكتين محدش بيتكلم

يتفتح باب الاوضة...يخرج الدكتور والجدة بتوصله

يقوم فؤاد"مالها يادكتور"

الدكتور"مالها ايه...مين اللي عمل فيها كل ده حرام عليكم"

فؤاد"لو سمحت يادكتور عرفنا حالتها"

الدكتور"حالتها انها اتعرضت لضرب وحشى واثاره مش محتاجة

كشف... وشها كله كدمات...بس مش دى بس المشكلة"

فؤاد"ايه تانى"

الدكتور"اللى حصل لها عملها صدمة عصبية وفقدت النطق...

محدث يضغط عليها انها تتكلم... وياريت تستشيروا طبيب نفسى

يتابع حالتها"

فؤاد وهو بيوصله للباب...وبيحاسبه

الدكتور"لو اللي ضربها جوزها وعايزين تقرير طبى انا ممكن اعملكم

التقرير... الضرب كان عنيف جدا وواضح انه اكثر من مرة"

فؤاد"لا شكرا يادكتور.. هنتحل ان شاءالله"

\*\*\*\*\*

كلهم قاعدين ف صمت ماعدا ايمان مخرجتش من الاوضة

قطع الصمت صوت توفيق

”وبعدين... الحل ايه“

فؤاد بيبيص لفارس مستنى رده...وعينيه كلها رجاء

فارس”مايا طالق... مش هقدر تعيش معاها بعد ما خدعتنى“

توفيق”هو ده الصح... مينفعش تستر على غلطة ملكش دعوة بيها“

فؤاد”لدرجة دى يا فارس هانت عليك... احنا منعرفش ايه اللى

حصل“

فارس”اللى حصل انها فرطت ف نفسها... انا اللى كنت فاكرك

هتموتها الاقايك بتتكلم بالضعف ده“

فؤاد بيعيط”منكرش ان غلطتها كبيرة اوى...بس لما حسيت انها

هتموت خفت عليها“

توفيق باستهجان”خفت“

فؤاد”ايوه خفت...دى بنتى الوحيدة برضه“

ايمان جنب مايا... بتططب عليها وتعيط

”صحيح حمزة هو السبب؟؟؟ ولية مقلتلش“

مايا بتعيط بحرقه... مش قادرة تتكلم

اتفتح باب الاوضة... ودخلت الجدة

”لبسيها يا ايمان“

ايمان”ليه؟“

الجدة”فارس طلقها خلاص... وهترجع معنا“

مايا بتعيط بحرقه اكبر... جدتها مش عارفة تتعاطف معاها ولا

تقسى عليها... خرجت من الاوضة وهى محتارة

\*\*\*\*\*

فؤاد بيقف بالتاكسى قدام باب البيت

بينزل وبتنزل منه ايمان ومامتها وهما ماسكين مايا

دخلوا البيت بسرعة قبل ما حد يشوفهم

فؤاد بيفتح باب الشقة

مايا خايقة تدخل وماسكة ف ايمان

”ادخلى متخافيش محدش هيعملك حاجة“

مايا بتعيط وماسكة ف ايمان

فؤاد”متخافيش... لما تخفى هنبقى نتكلم“

مايا بتبص له بخوف وماسكة ف ايمان

الجددة" ادخلي يا مايا... محدش هيضربك "

ايمان" تطلعي تقعدى معايا"

مايا بتهز راسها وكأنها كانت مستنوية الحل ده

ايمان" انا هاخدها عندى... هتقعد معايا لحد ما تبقى كويسة"

فؤاد باستسلام" طيب... حتى عندك احسن بعيد عن فارس وحياة

وتوفيق"

\*\*\*\*\*

حياة بتلم هودوم فارس وهى بتعيط وسامعة توفيق وفارس بيتكلموا

"كويس انك قدرت تمسك نفسك ومموتهاش"

فارس حزين ومش قادر يتكلم

"انا م الاول مكنتش عايز الجوازة دى... قلتلك بلاش مايا...كنت

حاسس انك مش هترتاح"

"عمر ما خطر على بالى انها ممكن تعمل كده... دى متربية قدام

عنيانا... ده انت اللى مربيتها تقريبا"

"العرق يمد... عايز ايه من واحدة امها اجنبية وعايشة بالطول

والعرض... اقلب القدرة على فمها"

خرجت حياة من الاوضة

"خلاص لبيت الهدوم"

توفيق"يالاً بينا... وانا هتكلم مع فؤاد ان الطلاق يتم وتتنازل عن كل حقوقها... مش كفاية الفضيحة"

حياة"راحت ولا جت بنتنا ... امانة عليكم بلاش فضايح وكفاية على قد كده... استروها ومتحكوش حاجة لحد"

توفيق"والجيران اللى كانوا ف الفرخ امبارح وهيلاقوهم النهاردة كل واحد ف بيت اهله"

حياة"هتعد مع اخواتى ونفكر ف اى حاجة نقولها ... ربنا امر بالستر ياخويا الله يسترک"

توفيق باستسلام لعشرة العمر مع اخوات حياة

"امرنا لله...يالاً بينا"

## . 4 .

ايمان بتفتح شفتها... بتدخل وهى ماسكة مايا  
"تعدى ف اوضتى ولا اوضة نسرين.. تعالى ف اوضتى احسن"  
مايا مستسلمة وماشية معاها  
دخلوا اوضة... قعدتها على السرير  
"نامى وارتاحى يا مايا"  
مايا بتبص لايمان وتعيط  
"متعيطيش... انا مش هلومك دلوقتى بس ده ميمنعش انى مش  
زعلانة منك... غلطتى يا مايا وغلطتك كبيرة اوى... وياخوفى يكون  
كلامهم صح ويكون حمزة"  
يزيد عياط مايا ... عياط بحرقة  
وتفتكر حمزة



## فلاش باك

مايا قاعدة ع السلم لوحدها "١٢ سنة"

باب البيت مقفول... بتفتحه نسرين

بتقوم مايا تجرى عليها

"عملتى ايه ف الامتحان"

"الحمدلله...بدأنا الاجازة يامايا وخلص مفيش مذاكرة"

"انا اول واحدة اخدت الاجازة بس محسيتش بيها علشان

مخلصتوش"

"انتى قاعدة لوحذك كده ليه"

"نينة مش عايزانى اطلع العب بره...بتقولى عيب"

"ما احنا كبرنا يا مايا ومعدش ينفع نلعب بره"

"ماحمزة وفارس بيلعبوا وهما كبار"

"ماما وبابا قالوا البنات عيب تلعب ف الشارع"

"وبعدين هنعمل ايه ف الاجازة... حمزة وفارس هيلعبوا مع

اصحابهم واحنا لأ"

"تعالى اطلى اقعدى معايا ف البيت"

\*\*\*\*\*





نسرین مع باباها ومايا ف سطح البيت  
مصطفى بيعمل تندة ... وايمان بتفرش سجادة قديمة  
وبتحط كراسى وتراييزة  
ايمان"ايه رأيكم بقى... تقعدوا هنا براحتكم... تلعبوا ترقصوا  
تتنطوا براحتكم"  
نسرین"فكرة حلوة اوى ياماما"  
مصطفى وايمان بعد ما خلصوا نزلوا  
ومسكت مايا ونسرین مجلات معاهم وقعدوا يتفرجوا  
مايا"هو حمزة هيخلص امتى"  
نسرین"هيخلص بكرة...وفارس هيخلص النهاردة"  
"ما تيجى نادى لحمزة يتفرج على القعدة الجديدة"  
"طيب هنزل انادى لفارس وحمزة"  
تنزل نسرین وتطلع ومعها فارس وحمزة  
يتفرجوا على مكانهم الجديد  
حمزة كل ما يقوم ولا يقعد...مايا وراه  
فارس كل ما ييجى يكلم مايا...يلاقيها منتبهه لحمزة بس  
يزعل من اهتمامها الزايد بحمزة... وينزل يكمل مذاكرة

\*\*\*\*\*

مايا لابسة... وقاعدة جنب نسرين وكل شوية تبص ع الساعة  
فؤاد قاعد جنب الشنط المتحضرة مستنى العربية اللي هتوديهم المطار  
مايا بهمس لنسرين" هو حمزة اتأخر كده ليه "  
نسرين"بيجيب النتيجة...رينا يستر"  
يسمعوا صوت الباب الخارجى بيتفتح ويتقبل  
تجرى مايا ع الباب تستقبل حمزة  
تفوجئ انه فارس  
"ماما فين...انا نجحت"  
مايا"وحمزة فين؟"  
فارس بكسرة خاطر  
"معرفش...انا هروح افرح ماما زمانها قلقانة"  
نسرين"مبروك يا فارس"  
فارس"الله يبارك فيكى...مطلعتش من حد تانى"  
مايا"معلش يا فارس...مبروك...اصل خايقة حمزة يتأخر ومشوفوش  
قبل ما اسافر"

حمزة يوصل البيت... تنزل مايا السلم وتقابله ع الباب

”عملت ايه يا حمزة طمني“

”الحمد لله“

”مبروك... انا مسافرة كمان شوية“

بص فارس عليهم... وعلى اهتمام مايا بحمزة وعدم اهتمامها بيه...

حس ان وجوده مالوش لازمة... وطلع

\*\*\*\*\*

بعد سنتين

نسرين وحمزة وفارس قاعدين ف السطح

فارس ونسرين بيلعبوا كوتشينة

فارس”مش عايز تيجي تلعب برضه“

حمزة”مش عايز“

نسرين”سيبه ياعم ده بقى نكدي“

حمزة”هي مايا بتتأخر عند مامتها كثير كده ليه... كانت بتتعد

اسبوع بقوا اتنين وتلاتة... مش كثير كده“

نسرين وهي بتلعب

”انت هتبص لها ف الكام يوم ف السنة اللي هتقعدهم مع مامتها...“

تلاقبها بتوحشها يا عيني“

حمزة"ماهى بتوحشنا احنا كمان"

نسرين وهى بتبص له وبعدين بتغمز لفارس

"مش ملاحظ ان حمزة بقى رقيق اوى"

فارس بيبتسم بمرارة وهو كل يوم بيتأكد من احساسه

ان حمزة بيحب مايا ومايا بتحبه

\*\*\*\*\*

مايا راجعة من السفر مع فؤاد...ملهوفة على حمزة

بتوصل البيت... واول ما بتدخل عند جدتها وتسلم عليها

"حمزة ونسرين وفارس فين؟"

"خرجوا"

"كده مش مستنينى"

"ماهو انتم مقلتوش جايبين امتى...دول هيتجننوا عليكمى"

"هطلع اسلم على عماتى واستناهم فوق ف السطح"

\*\*\*\*\*

مايا قاعدة ف السطح تستناهم... ملل وحنين واشتياق حاساه

ناحيتهم كلهم... وبالاخص حمزة

يدخل حمزة اول واحد ويسلم عليها وهو بينهج

"حمدالله ع السلامة يامايا"

"الله يسلمك...مالك"

”مفیش اصل اول ما نینة قالت انك هنا طلعت السلم

جرى...وحشتینى”

”وانت کمان وحشتنى اوى”

تدخل نسرین ووراها فارس ویسلموا علیها

یقعدها کلهم مع بعض یتکلموا ومایا بتحکى عن اجازتها

یقوم حمزة یقف

”مایا... تعالی عایز اقولك حاجة”

قامت مایا ... وراحت معاه بعید عن فارس ونسرین وف نفس

الوقت على مرمى بصرهم

”نعم یا حمزة”

”متبقیش تتأخرى اوى كده تانى”

”متأخرتش ولا حاجة دول کلهم ۳ اسابیع”

”کتیر اوى یا مایا... انا مبقدرش استحمل یوم وانتى بعید”

ابتسمت مایا بکسوف

”بصی انا مش عارف افضل ساکت اکثر من كده”

”تسکت على ایه”

”انا عارف انك لسه صغيرة على اللی هقوله”

”صغيرة ایه یا حمزة انا رایحة تانية ثانوى”

”برضه صغيرة.. بس بحبك من وانتى اصغر کمان”



فرحة مايا بكلام حمزة اللي كانت بتتمناه... خلاها طيارة من

السعادة

”اتفاجئتي؟“

”لا... يعني... اصل.. ما احنا كلنا بنحب بعض زى الاخوات“

”لا اخوات ايه... انا قدامى سنتين ف الجامعة تكونى انتى

خلصتى ثانوى واكلم ماما وبابا ونتخطب رسمى“

مايا بفرحة الدنيا كلها

”انت بتتكلم بجد يا حمزة“

”اه طبعا... بس علشان خاطر متغيبش تانى عند مامتك... انا

كنت هتجنن وحاسس انى لوحدى من غيرك“

”انا اللي كنت هموت وارجع بس بابا كان عنده شغل وانت عارف

مش بيوافق يخلينى اروح او اجى لوحدى“

فارس ونسرين قاعدين مع بعض

فارس كل شوية يبص عليهم

نسرين”هما بيرغوا ف ايه كل ده“

قامت نسرين راحت لهم

”عيب اوى تفضلوا واقفين مع بعض وسايبيننا.. هو فيه اسرار علينا“

حمزة”مفيش اسرار ولا حاجة“

فارس قام نازل

حمزة" رايح فين يافارس"

فارس"نازل البيت"

نسرين"استنى يافارس... مالكم شكلكم فيه حاجة مخبيينها علينا"

حمزة"لا طبعما مغيث حاجة تستخبي عليكم"

مايا وحمزة بيبتسموا لبعض... وكمل حمزة

"انا كنت بقول لمايا انى لما اخلص هخطبها "

نسرين بفرحة

"ايه ده ايه ده... ايه المفاجئات اللي من ورانا دى"

حمزة"من وراكم ايه بس... انا لسه قايلها حالا وقلت لكم على

طول"

فارس"مبروك"

حمزة"اوعوا بس تقولوا لحد دلوقتي لحد ما اخلص... لو عرفوا

هيخلونا منشوفش بعض ولا نقعد مع بعض... انتوا عارفين تفكير

نينة صعب وخالو فؤاد وعمو توفيق... متزعلش يا فارس بس باباك

لو عرف هيقول مينفعش اختلاط ونينة هتسمع كلامه"

فارس"متخافش... السر ف بير... انا نازل"

\*\*\*\*\*

فارس طالع البيت... حزنه عميق ف قلبه  
وغصب عنه عيونه مليانة دموع متحجرة مبتزلش  
بص على بيت جدته المفتوح  
شاف فؤاد والجدة قاعدين... دور بعنيه على مايا بحركة لا ارادية  
توفيق" يالا يا فارس... لاحسن يفتكروك عايز ترجعلها... مبقاش  
ينفع"  
حياة"هدخل لماما"  
توفيق"استنى علشان اجى معاكى نتكلم ف اجراءات الطلاق... اطلع  
انت"  
طلع فارس بشنطة وحزنه وصدمة  
وهو على السلم ومعدى من قدام شقة ايمان  
شاف حمزة ومايا وهما خلال فترات حياتهم اللي فاتت  
الطفولة والصبأ وهما داخليين او خارجيين او قاعدين ع السلم  
نزلت دموعه لأول مرة من ساعة اللي حصل وصدمة  
حس انه لوحده ومحدش شايفه  
كمل السلم... وصل عند باب شقته... حط الشنطة جنب الباب  
وكمل لحد السطح  
دخل السطح... كل حاجة بقت اطلال  
التندة مقطوعة من عوامل الزمن

الترابيزة مكسورة ومحطوة على جنب  
اصص الزرع اللى كان موجود... موجودة وفاضية

### فلاش باك

مايا وحمزة بييتسموا لبعض... وكمل حمزة  
"انا كنت بقول لمايا انى لما اخلص هخطبها"  
نسرين بفرحة  
"ايه ده ايه ده... ايه المفاجئات اللى من ورانا دى"  
حمزة"من وراكم ايه بس... انا لسه قايلها حالا وقلت لكم على  
طول"  
فارس"مبروك"  
حمزة"اوعدا بس تقولوا لحد دلوقتى لحد ما اخلص... لو عرفوا  
هيخلونا منشوفش بعض ولا نقعد مع بعض... انتوا عارفين تفكير  
نينة صعب وخالو فؤاد وعمو توفيق... متزعلش يا فارس بس باباك  
لو عرف هيقول مينفعش اختلاط ونينة هتسمع كلامه"  
فارس"متخافش... السر ف بير... انا نازل"  
نزل فارس... بسرعة قبل ما حد ياخذ باله انه اتضايق

دخل شقتهم... ودخل على اوضته وقفل على نفسه  
"ايه اللي مضايقتني كده... ما انا كنت حاسس من الاول اهتمامها  
ببيه هو مش بيا... مش ذنبهم انى حبيتها وسكتت... حمزة اخويا  
ولازم افرح لهم... مش لازم حد فيهم يحس بحاجة... ولا لازم حد  
من الكبار يعرف علشان مايا وحمزة ميزعلوش منى... والحمدلله ان  
الدراسة قربت وهركز ف المذاكرة وابعد عنهم شوية"

\*\*\*\*\*

فارس قاعد بيذاكر ف اوضته... يخبط عليه الباب  
"ادخل"  
تدخل نسرين  
"ازيك يا فارس"  
"الحمدلله... عاملة ايه"  
"انا كويسة... انت اللي فين مبتطلعش تقعد معنا فوق ليه"  
"انتى عارفة انى عندى مذاكرة كتير"  
"ما كلنا عندنا مذاكرة"  
فارس بيضحك علشان يدارى احساسه  
"ايه جاب دراسة الهندسة للحاجات السهلة بتاعتكم دى"  
"سهلة... ما مايا ثانوية عامة... مش هتبقى اصعب منها"

"لا يا ستي انا اصعب...وبعدين انا عايز اركز واذاكر كويس علشان

اجيب تقدير واتعين ف الكلية"

"الله الله ده احنا راسمين على تقيل اوى"

"اوى اوى"

ضحكوا مع بعض... وسألته نسرين بتبرة جدية

"فارس...انت بجد كويس ولا زعلان من حد فينا"

"زعلان...لا طبعاً هزعل ليه"

"معرفة...حسيت كده انك اخدت جنب بقالك فترة فحببت اظمن

عليك"

"ربنا يخليكى يا نسرين...طول عمرك اخت جدعة"

"احنا كلنا منستغناش عن بعض... متبقاش تغيب علينا...ابقى

حتى اطلع اقعد معانا كل خميس"

"حاضر"

"ياللا اسيبك علشان معطلكش"

فارس واقف وبيفتكر ايامهم الحلوة قبل ما تتبدل حياتهم

رغم انها كانت ايام صعبة عليه الا انها مكنتش اصعب من اللي فيه

دلوقتى

بص لاطلال المكان اللي بيجمعهم

”اكيد اللي حصل كان هنا... كده يا حمزة تعمل كده... لو كنت  
حببتها زى ما انا حببتها مكنتش تضرها بالطريقة دي... انا ليه  
بعد ده كله مش عارف اكرهكم“  
احساسه انه متضايق منهم من اللي عملوه... واحساسه انه بيفتكر  
ايامهم الحلوة وعدم قدرته على كرههم... تعبته اكثر  
وخرج بسرعة من السطح... وكأنه بيهرب من ذكرياته وخيالاته اللي  
بتطارده

## . 5 .

توفيق و حياة قاعدين مع فؤاد ومامته

توفيق "هتعمل ايه معاها يا فؤاد"

فؤاد بانكسار "هعمل ايه... العمل عمل ربنا"

توفيق "يعنى ايه... يعنى هتسكت لها"

فؤاد "هعمل ايه اكرت من اللي حصل"

توفيق "انت راضى يعنى انها تحط راسك ف الطين"

فؤاد بضيق " اللي حصل حصل خلاص... لما تخف هبقى افهم منها

ايه اللي حصل بالظبط"

توفيق "اخص على كده... عيشتك بره خلتك بارد"

فؤاد "راعى كلامك يا توفيق... انت عازينى اموت بنتى الوحيدة"

توفيق "ده انت تموتها وترمى جنتها للكلاب"

فؤاد بنرفزة "انت عايز ايه بالظبط... ملكش حاجة عندى... بنتى

وانا حر فيها... فارس طلقها وخلاص انتهينا... كفاية انى اتسرعت

واتعاملت معاها بنفس طريقة ابنك الهمجية... مش كفاية المنظر اللي

لقيناها فيه... عاجبك الضرب اللي كان ضارب هولها ده... والله لو ما

كان ابن اختى ماكنت سيبته الا وانا حابسه"



الام بتحاول تهدي فؤاد

"اهدا يا فؤاد خلاص"

توفيق قام يزقق هو كمان

"انت ليك عين تتكلم بعد اللي بنتك عملته... ده انت المفروض

مترفعش عينك فينا بعد اللي حصل"

فؤاد"اسكت يا توفيق احسن لك انا اللي فيا مكفيني"

حياة"خلاص يا توفيق...خلاص يا فؤاد...بالا ياتوفيق"

توفيق"يالا ايه... حق ابني عند مين؟"

فؤاد"حق ايه"

توفيق"فرحته اللي اتكسرت...المصاريف اللي صرفها على الجهاز

والبيت والفرح"

فؤاد"يعنى مشكلتك ف الفلوس...ياخذ اللي صرفه"

توفيق"ده انت غريب...دى لو كانت بنتى والله كنت دبحتها وانا

رافع راسي"

فؤاد"الحمد لله انها مش بنتك... ومن هنا ورايح لا انت ولا ابنك

ليكم دعوة بيهيها... وانا هظبط امورى واخذها تعيش معايا هناك"

توفيق"خدها...علشان تبقى على كيفها اكثر"

فؤاد"اخرس بقى ده انت معندكش دم"

حياة"عيب كده يا فؤاد... محصلتش انك تشتمه"

فؤاد "كلمة زيادة وهضريه... سيونا ف حالنا بقى"  
قام فؤاد وسابهم ودخل اوضته  
وقام توفيق وهو بيشتم ويزعق  
وحياة طلعت وراه والام شايقة كل اللى بيحصل ومش عارفة تقول  
ايه ولا تعمل ايه... بعد ما طلعا دخلت لفؤاد

\*\*\*\*\*

فؤاد قاعد ف اوضته... دخلت مامته عليه  
"متزعش يا فؤاد... جوز اختك برضه زعلان على ابنه"  
"وانا زعلان على بنتى وزعلان من اللى عملته... مصيبتى اكبر  
بكتير منه وهو جاى يلومنى... انا هتجنن من اللى عملته وف نفس  
الوقت لما افتكرها وهى واقعة ف ايد ايمان مبتنطقش بقول لنفسى انا  
ازاى قدرت اعمل فيها كده... وازاى هى قدرت تعمل فيها كده... ليه  
ياماما محفظتيش عليها"  
واتفاجئت الام بتوجيه الاتهام ليه  
"انا؟؟ انا محافظتش عليها يا فؤاد... ده انا كنت حاطها ف  
عنيا... دى مكنتش بتخرج لوحدها ابدا غيرع المدرسة ولا الكلية...  
ولما كانت بتخرج بيكون ولاد عمته معاها"  
"هو ليه توفيق شك ف حمزة بالذات؟؟"

\*\*\*\*\*

توفيق و حياة داخلين شقتهم... دخلوا لقوا فارس قاعد  
توفيق "شوف انت صرفت كام علشان اجيبهولك من خالك"  
فارس "مش عايز فلوس... كفاية اللي خسرتة"  
توفيق "هيبقى خسارة من كله.. انت تاخذ الفلوس وتتجوز احسن  
واشرف منها"  
قام فارس يدخل اوضته وهو بيرد عليه  
"مش عايز اتجوز حد... كفاية اللي حصل"  
توفيق "شفتي... الواد اللي حيلتنا عقدته بنت اخوكي"  
حياة "انا مبيقتش عارفة اقول ايه ولا اعمل ايه بعد اللي حصل...  
مش عارفة هتعامل مع اخواتي ازاى... معقول يكون حمزة صحيح"  
"انا مش ياما قلت لك قعدة السطح دى غلط... كثير كنت بشوفهم  
نازلين من فوق لوحدهم... ولما لمحت لامك طنشت ولا مفهمتش مش  
عارف"  
"الله يجازيهم ع اللي عملوه فينا"

\*\*\*\*\*

ايمان داخله بكوباية لبن على مايا  
شافتها نايمة... اتسحبت رجعت تانى وقفلت الباب عليها  
طلعت قعدت بره... وافتكرت انها متصلتش تظمن على نسرين

فاتصلت بيها

"الو... ازيك يانسرين"

"ازيك ياماما... مال صوتك"

"مفيش يا حبيبتي... انتى عاملة ايه السفر تعبك ولا حاجة؟"

"لا الحمد لله... بس قوليلى صوتك ماله... واخبار مايا وفارس ايه"

"ممدوح عندك؟"

"لا نزل"

وعيطت ايمان غصب عنها

"مايا وفارس اطلقوا"

صرخت نسرين

"بتقولى ايه ياماما... انتى بتهزرى صح؟"

"والحاجات دى فيها هزار"

"ليه طيب... ايه اللى حصل؟"

"اللى حصل ميتحكيش"

"ماما احكى لى... ايه اللى حصل علشان يتطلقوا تانى يوم"

"مطلعتش بنت"

شهقت نسرين من الصدمة

"مش معقول... اكيد فيه حاجة غلط... هى قالت ايه"

”مقاتلش... احنا روحنا لقيناها مضروبة ومعدومة العافية ولما فارس  
قال فام عليها فؤاد وفضل يضرب فيها لحد ما اغمى عليها بين  
ايديا وجبنالها الدكتور قالت فقدت النطق“  
”يا حبيبتي يامايا... ياريتنى ماكنت مشيت“  
”بالعكس... الحمد لله انك مشيتى... كان هيبقى ايه موقفنا قدام  
ممدوح... اوعى تقويله حاجة“  
”بس انا عايزة اجى لمايا“  
”لو عايزة تيجى قولى له اى حاجة وتعالى لوحدك.. مش ناقصين  
فضايح“  
”طيب... هى فين دلوقتى مينفعش اكلها“  
”مبتنطقش يا نسرين... بقولك ايه؟؟ انتى كنتى تعرفى حاجة“  
”لا والله ابدأ انا اتفاجئت بكلامك... بس عايزة اعرف منها ايه  
اللى حصل وليه سابت نفسها لحد ماتتجوز ماقتلش ليه على  
الاقل“  
”مش قادرة اضغط عليها ف الاسئلة... لو شفتى شكلها يصعب ع  
الكافر“  
”ياحبيبتي يامايا... واخص عليه فارس.. كده يطلقها“  
”المصيبة انهم شاكين ف حمزة“

\*\*\*\*\*

فؤاد بالليل لابس ورايح ع الباب

"انت رايح فين دلوقتي"

"عايز اطلع اطمئن على مايا"

"طيب استنى اجى معاك"

"طيب"

فؤاد ومامته بيخبطوا على ايمان

"اهلا ياماما... اتفضلوا"

فؤاد "مايا اتكلمت؟"

ايمان "لا"

الجدة "وهى فين"

ايمان "من ساعة ماجت وهى بتعيط... فضلت تعيط كتير اوى ولما

اخذت الدوا بعدها بربع ساعة لقيتها نامت"

\*\*\*\*\*

مايا بتفتح عينيها... شافت ايمان نايمة جنبها

قامت تتسحب من جنبها... وايمان محسيتش بيها

خرجت من الاوضة... راحت اوضة حمزة وفتحتها

دخلت فتحت النور... بتبص على كل جزء ف الاوضة

راحت على المكتب... قعدت على الكرسي

فتحت الدرج... شافت برواز صغير فيه صورتهم هما الـ

فارس ونسرین وهی وحمزة قاعدين جنب بعض ف بيت الجدة  
حطت الصورة ع المكتب... وشافت اجنذة  
طلعتها من الدرج... فتحتها وقعدت تغلب فيها بابتسامه حنين  
ودموع

\*\*\*\*\*

### فلاش باك

حمزة ماسك الاجنذة بتاعته وقاعد  
راحت مايا قعدت جنبه... قفل الاجنذة  
"بتعمل ايه"  
"ملكيش دعوة"  
"اخص عليك يا حمزة... هزعل منك والله"  
"هوريكى بس مش دلوقتى"  
"امتى طيب"  
"لما اخلص"  
"طب ايه هو اللى هتخلصه"  
"بكتب لك حاجة"  
"وتكتبها لى.. ماتقولها لى"

”اصلها مش اول مرة“

”ازاى“

”كنت كل ما احب اقولك حاجة اكتبها ف الاجندة دى... يوم  
خطوبتنا هديهالك تبقى تقراى فيها براحتك... ونبقى نحتفظ بيها  
ف بيتنا ونوريها لولادنا“  
تمسح مايا دموعها وهى بتقلب فى الاجندة اللى مليانة كلام كتير  
كلها بخط حمزة

يلفت نظرها رسمة تصميم لدعوة فرح

صممه حمزة وكتب فيه اسمه واسمها ويوم الخطوبة

\*\*\*\*\*

## فلاش باك

حمزة واقف قدام باب المدرسة ومايا خارجه راحت ناحيته

”ايه الاخبار“

”تمام“

”مبروك“

”على ايه مش لما النتيجة تبان“



”هتبان وهتنجحي وهتدخلي الجامعة ان شاءالله“

”يارب يا حمزة“

بيكملوا كلامهم وهما ماشيين

”انا اتكلمت مع بابا وماما امبارح وقلت انى عايزهم يكلموا خالو

فؤاد“

”وبعدين“

”بابا رفض“

مايا بزعل”ايه؟“

حمزة بيضحك”قالى مينفعش يتكلم الا لما اشتغل ..قال اول ما اشتغل

واستقر ف الشغل ساعتها هيقدر يكلم خالو فؤاد“

مايا”يارب يا حمزة تلاقى شغل“

حمزة”النتيجة تظهر بس وانا هقلب الدنيا على شغل علشان

نتخطب واقدر اقول للدنيا كلها انى بحبك“

\*\*\*\*\*

حمزة ومايا وفارس ونسرين قاعدين ف بيت الجدة

فارس بيقوم”الوقت اتأخر هطلع انام انا...تصبحوا على خير“

نسرين”اه واحنا كمان يالا يا حمزة انت لازم تنام بدرى“

حمزة وهو قايم”ماشى جاى معاكم اهو“

حمزة بيميل على مايا



”طب يالا انزل علشان زى نسرين ما قالت لازم تنام بدرى“

”لا يا مايا خليكى معايا“

مسك ايدها وهو بيبيص لها بحب... وقرب وباسها من خدها

”مايا... مايا“

مايا بتصحاحا

”قومى احنا نعسنا وافجر هيشقشق“

”يا خبر اسود... لتكون نينة صحيت وملقتنيش نايمه ف اوضتى“

”قومى انزلى بسرعة وانا هنزل بعدك... اشوف وشك بخير انا يدوب

هلبس قبل ما اصحابى يعدوا عليا“

”ماشى... سلام“

مايا بتفتح الباب وبتتسحب وهى داخله البيت

راحت بصت على جدتها... اطمنت انها نايمه

جريت على اوضتها... غيرت هدومها بسرعة ونامت

مايا بتصحاحا على صوت صراخ عالى

الصوت قريب منها اووووى

بتقوم تخرج من الاوضة تجرى

بتلاقى جدتها بتعيط وايمان ونسرين بيصرخوا

وحياة بتاخذ ايمان ف حضنها وتعيط

مايا بتجرى عليهم

"فى ايه"

حياة" حمزة... يا حبيبي يا بنى "

مايا وهى بتعيط" ماله حمزة"

حياة" عمل حادثه هو واصحابه... وراحوا كلهم... يصبر قلبك يا

ايمان يا ختى "

\*\*\*\*\*

تعيط مايا بحرقه وهى بتحضن اجنדה حمزة وصورتهم اللى ع

المكتب... صوت عياطها على

دخلت ايمان الاوضة على صوت مايا

"قمتى امتى... الله يرحمك يا بنى "

مايا بتعيط وهى حاضنة حاجته

ايمان بدأت دموعها تنزل وهى بتاخذ منها الحاجة بهدوء

"قومى يامايا... انا مبحيش ادخل اوضته... قلبى بيتوجع وانا

مبقتش مستحمله احزان... كفاية ان ابوه راح وراه بسنة م الحسرة

عليه "

قامت مايا معاها... دخلوا اوضة ايمان

قعدت مايا ع السرير... وايمان قصادها

مايا بتعيط ... وايمان بتحاول تتماسك وبتمسح دموعها  
"قوليلي... لو مش قادرة تتكلمى هزى راسك... طمنيني انا هموت  
من امبارح ومش عايزة اضغط عليكى... ريحيني الهى يريح قلبك"  
مايا بتنتبه لايمان وبتمسح دموعها  
ايمان بتكمل  
"هو حمزة فعلا؟؟ غلطتى مع حمزة؟؟"

هزت مايا راسها يمين وشمال بالنفى

اتطمنت ايمان

"يااااه يامايا...طمنتيني يابنتى... انا كنت هموت م الرعب يكون

هو اللى عمل كده"

حضنتها ايمان وطبطبت عليها...عيطت مايا ف حضنها

"طيب ايه اللى حصل وامتى؟؟... وليه فضلتى ساكتة لحد يوم

الفرح... كنتى احكيلى لو حد ضحك عليكى كنت خليته يتجوزك"

زاد عياط مايا... عياط بيزيد مع كلام ايمان

"خلاص يا مايا... اهدى ولما تقدرى تتكلمى ابقى احكيلى"

هزت مايا راسها موافقة على كلامها

"هقوم اجيبلك فطار علشان تاخذى دواكى"

\*\*\*\*\*

نسرين بتعمل قهوة لمدوح وسرحانة

القهوة فارت وانتبهت بعد ما نزلت ع البوتاجاز

شالت الكنكة وحطتها ف الحوض...غسلتها وبدأت تعمل فنجال

تانى...دخل عليها ممدوح

"ايه ف ايه كل ده بتعملى قهوة"

“معلش ياممدوح فارت منى وهعمل غيرها حالا”

“مالك؟”

وكأنه اول ما قالها مالك... ضغط على زر الدموع

“ابه يا نسرين... بتعيطى ليه... سيبي اللى بتعملبه وتعالى”

خرجوا من المطبخ... قعدوا ف الانتريه وهى بتمسح دموعها

“مالك”

“عايزة اروح لماما”

“ليه؟ احنا مش كنا لسه عندها”

“انا يومها ملحقتش اقعد معاها خالص”

“قولى بقى انك عايزة تروحي لمايا”

واتخضت نسرين من كلام ممدوح

“مايا... اشمعنى مايا”

“عادى.. علشان مروحتيلهاش يعنى”

“لا انا عايزة اروح اقعد عند ماما شوية”

“انتى زعلانة منى ف حاجة؟”

“لا ليه بتقول كده”

“علشان عايزة تسيبيني فجأة كده”

”لا مفيش حاجة والله... بس انت عارف الحمل بيخلى نفسيتى مش  
مظبوطة شوية... الله يخليك يا ممدوح سيبنى اروح اقعد عند ماما  
كام يوم“

عيطت نسرين وهى بتطلب منه السفر... سكت ممدوح

”طب استنى على الخميس واجى معاكى“

”مش لازم تيجى ولا تفضل رايح جاى سفر... انت توصلنى وماما

تستنانى وخلص والنبي ياممدوح ماتقول لا“

\*\*\*\*\*

فارس قاعد فى اوضته... دخلت عليه مامته

”قوم يا فارس اتغدا“

”مش عايز ياماما“

”لا بقى بقالك يومين قاعد ف اوضتك ولا بتاكل ولا بتشرب“

”فين النفس اللي تخلى الواحد قادر يعيش“

”يا بنى متقولش كده مش نهاية الدنيا“

”معقول ياماما... مايا اللي كلنا عارفينها يطلع منها كده“

”متفكرش... اللي حصل حصل خلاص وهى اخدت جزاءها... ولو

كان حمزة هو السبب الله يجازيه بقى“

قالتها وخرجت من الاوضة

والكلمة فضلت ترن ف ودان فارس وبيفتكر



فلاش باك

فارس وتوفيق ومصطفى داخليين المشرحة  
بيبصوا على الجثث اللي جت ف الحادثة  
ولما كشفوا جثة حمزة وشافوه  
انهار مصطفى من العياط...وتوفيق بيسنده  
وفارس بيسنده معاه وهو بيعيط من الصدمة  
بالليل ف البيت وبعد العزا ما خلص  
اتجمعوا كلهم ف بيت الجدة  
فارس داخل بيسأل مامته  
"مايا وخالتى فين"

حياة"الاتنين مموتين نفسهم ف اوضة مايا جوه ونسرين يا حبيبتي  
كل ما تهدا وتشوفهم ترجع تعيط تانى"  
فارس "هدخل لهم"  
فارس رايح على اوضة مايا...الباب مفتوح  
خبط ودخل...  
ايمان على السرير نايمة صاحبة  
ونسرين ومايا قاعدين على السرير التانى  
قرب فارس من ايمان وباسها... وطيطب عليها  
"عاملة ايه ياخالتى"

بترد وهي بتعيط "حمزة مات يا فارس... ابني مات"

فارس وهو بيتماسك

"ادعيله... هو ف مكان احسن دلوقتي"

"ملحقش يفرح... كانت احلامه كتيرة ملحقش يحقق منها حاجة"

مايا تعيط بصوت عالي بعد كلام ايمان

فارس بيلتفت ليها... تصعب عليه اكثر

ميلاقيش كلام يقوله لحد فيهم فيسكت

فارس بيفتكر حزن مايا اللي استمر بعد وفاة حمزة

وانها كانت دايمًا بتطلع تقعد ف السطح لوحدها

ولما يقابلها فوق كل كلامها يكون على حمزة

فارس بيسأل نفسه

"ليه يامايا مقلتلش... ليه بعد السنين دي تخليني اكره حمزة..."

اقرب حد ليا ف حياتي اكتشف بعد موته بسنين انه اكثر حد

أذاني... ليه وافقتي تتجوزيني لو لسه بتحبيه... ولو نسيته

وحببيني زي ما كنت فاكر مصارحتينيش ليه بالحقيقة"

حس فارس ان دماغه مليانة افكار واسئلة بتتعبه طول ماهو مش

لاقي لها اجابات

دخل له باباه

"ايه يا فارس... هتفضل قاعد ف اوضتك كتير كده"

“معلش يابابا كده احسن”  
“انت هترجع شغلك امتى”  
“كنت اخد اجازة اسبوعين...هستنى لما تخلص واروح...لو قطعتها  
ورجعت الشغل الناس هتفضل تسألنى وانا مش عايز حد يفتح معايا  
الموضوع ده”  
“واللى هيسألك هتقول ايه”  
“هقول حصلت بيننا مشكلة وف لحظة غضب اطلقنا”  
“وده كلام مقنع”  
“اللى يقتنع يقتنع واللى ميقتنعش ان شالله عنه ما اقتنع”

\*\*\*\*\*

ايمان ف المطبخ...جرس الباب يرن  
تروح تفتح...تلاقى فؤاد  
“اهلا يا فؤاد...ادخل”  
“عاملين ايه”  
“الحمد لله”  
“مايا فيين”  
“اديتها الدوا من شوية...هشوفها نامت ولا لسه”  
وقبل ما تدخل...وقفها فؤاد بسؤاله  
“متكلمتش برضه”

“كل اللي قدرت اعرفه ان حمزة مالوش علاقة بالموضوع ده زى ما  
الكل فاكر”

“اشمعنى حمزة ياايمان... دول كانوا متربيين مع بعض”  
“حمزة كان هيخطب مايا ف نفس السنة اللي مات فيها... ابوه قاله  
انه مش هيكلملك ف حاجة غير لما يشتغل... وملحقش”  
سكت فؤاد وهو بدأ يفهم ان احساسه ان حمزة ومايا قرييين من  
بعض اكثر من اللازم كان صح وانهم كانوا بيحبوا بعض... وكمل  
“معرفتيش حاجة تانية؟”

“لا... متضغطش عليها يا فؤاد الله يخليك”  
“مش هتكلم ف حاجة انا عايز اطمئن عليها بس”  
دخلت ايمان الاوضة... شافتها لقيتها صاحبة  
“مايا... فؤاد عايز يطمئن عليكى”

نظرة خوف ف عين مايا  
“متخافيش يا مايا هو عايز يطمئن عليكى بس... يا فؤاد”  
دخل فؤاد الاوضة... راح على مايا باس راسها  
وقعد قصادها على السرير وهو ماسك ايديها  
“عاملة ايه النهاردة”

عيطت مايا وهى بتبص له باعتذار  
فتح ذراعه وحضنها... حضنته وهى بتعيط

”متزعليش منى ... انا خرجت عن شعورى غصب عنى... انا عمري  
ما كديت ايدى عليكى بس اللي حصل فوق طاقة اى حد... انا  
هتجنن واعرف ايه اللي حصل“  
زاد عياط مايا  
ايمان” خلاص يا فؤاد... لما تخف هتحكى لنا كل حاجة... صح يا  
مايا“  
مايا بتهز راسها موافقة على الكلام

\*\*\*\*\*

حياة قاعدة ف بيتها... جرس الباب رن  
قامت فتحت  
”اهلا ياماما اتفضلى“  
”ازيك يا حياة... مبيتزليش ليه“  
قعدوا مع بعض  
”مش عايزة اشوف مايا ولا فؤاد وحتى ايمان علشان اللي عمله  
ابنها“  
”الواد بين ايدى الله... واحنا لسه متأكدناش“  
”هيكون مين غيره.. هى لاكانت بتروح ف حتة ولا بتعرف حد...  
مكنش حد لازق لها الا حمزة“  
”انتوا اخوات يا حياة... متقاطعيش اخواتك“

"اخواتى هما السبب ف كسرة قلب ابنى... انتى مش عارفة فارس  
اتبدل وبقى ازای ياماما"  
"يا بنتى هي مصيبة علينا كلنا مش على ابنك لوحده... من امتى  
كنا بنتقسم ونتكلم كأنا اعداء"  
"هما اللي عملوا كده مش انا"  
"وفارس فين"  
"قافل على نفسه لا بياكل ولا بيشرب"  
"انا هقوم ادخل له واتظمن عليه"  
"اتفضلى ياماما"  
"وانتى ابقى انزلى"  
"لا معلش ياماما... خلينا كده احسن"

\*\*\*\*\*

بعد يومين  
نسرين قاعدة مع مامتها  
"وقلتى ايه لممدوح علشان يسبيك تيجى"  
"انا من ساعة ما انتى قلتيلى اللي حصل وانا هتجنن ومكنتش قادرة  
اقعد... قتلته انى محتاجة اقعد عندك شوية وسألنى على مايا  
مجبتلوش سيرة"  
"احسن ... ع الاقل يفوت شهر ولا حاجة نبقي نقول اتطلقوا"

“هى نايمه ولايه”

“الدوا اللى بتاخده بينيمها كثير... وبينى وبينك تنام احسن...دى

طول ما هى صاحبة بتعيط وحكاية قلة الكلام دى صعبة اوى ربنا

يشفيها”

“وفارس؟”

“اخدين جنب وقافلين عليهم من ساعة اللى حصل”

“انا طالعة له”

\*\*\*\*\*

نسرين داخله اوضة فارس

“خالتي قالت انك صاحى”

“تعالى يا نسرين حمدالله ع السلامة”

“الله يسلمك يا فارس...انت عامل ايه”

“انتى شايفه واحد ف موقفى هيبقى عامل ايه”

“اتسرعت اوى يا فارس”

“انتى لو راجل كنتى حسيتى باللى انا فيه”

“مسألتهاش ليه؟”

“مقالتش حاجة...بس الجواب باين من عنوانه وانا مكنش المفروض

انسى”

“انا لسه طالعة من عند ماما... ومايا قالت لها انه مش حمزة”

ضحك بسخرية

”صدقونها“

”هتكذب ليه...على الاقل كانت قالت لاما لو هو فعلا حمزة“

”عذر اقيح من ذنب... ان مكنش حمزة يبقى مين؟“

”انت مش مثقف ومتعلم وعارف ان فيه حالات بتبقى كده“

”عارف... بس هي لو كانت شريفة ومغلطتش مكنتش اتوترت

وارتيكت كده بعد ما سألتها... وكل شوية افتر انما يوم الفرح

كانت كل شوية تقول عايزانى ف موضوع مهم... حتى لو كانت

عايزة تعترف لى بحاجة مكنش المفروض انها تسيبنى لآخر وقت

كده“

”احنا لسه برضه منعرفش اللي حصلها علشان نحكم عليها“

”انا ليا اللي شفته... ان مراتى ضحكت عليا ومطلعتش بنت“

”هو ده الحب... مش اللي بيحب بيسامح“

”اللى تفرط ف نفسها مرة تفرط ف نفسها ١٠٠ مرة“

”وافرض طلعت مظلومة“

”ياريت تطلع مظلومة...بس ازاي.. انا هتجنن من التفكير مش

عارف اكرهها يا نسرين... مصدوم فيها اوى ومش عارف اكرهها“

\*\*\*\*\*



نسرین داخله لمايا الاوضة... بتبص عليها صاحبة ولا نايمه

مايا حسنت بيها...قامت

"ازيك يامايا... سلامتک يا حبيبتى"

قربت منها وسلمت عليها وحضنتها

"انا جيت مخصوص علشان اطمئن عليكى... شدى حيلك كده"

هزت مايا راسها

"ايه اللى حصل يا مايا... ليه محكتيليش... من امتى بتخبي عليا

حاجة"

مايا بتعيط... ونسرین بتكمل

"طول عمرنا سرنا واحد... ايه اللى حصل... انا هتجنن من ساعة

ما ماما حكنت لى... ليه محكتيليش وكنت هساعدك ايا كان اللى

حصلك"

ردت مايا بلسان ثقيل وكلام بطئ

"مكنش فيه حد جنبى خالص بعد ما اتجوزتى وسافرتى"

فرحت نسرین ان مايا اتكلمت

"الحمد لله انك اتكلمتى... احكى لى يامايا... ايه اللى حصل؟؟"

ومين اللى عمل كده... جاسر؟؟"

فى نفس اللحظة اللى دخلت فيها ايمان وسمعت الجملة الاخيرة

ايمان باستغراب

”مين جاسر؟؟“

بصت مايا وايمان لبعض

ايمان”وانا اللي فاكرة انى اعرف عنكم كل حاجة...مين جاسر يا

مايا؟ مين جاسر يا نسرين“

مايا بلسان ثقيل

”هحكيلك يا عمتى... هحكيلكم كل حاجة حصلت من بعد موت

حمزة“

قعدت ايمان تسمع الحكاية...وسرحت مايا بخيالها

### فلاش باك

مايا ونسرین وفارس وحياة وتوفيق ومصطفى والجدة كلهم قاعدين

مع بعض ف بيت الجددة

الستات لابسين اسود وقاعدين كلهم بيتكلموا ويضحكوا

صوت مايا

”بعد موت حمزة كنا بنقرب كلنا لبعض اكثر... كنا زى مائكون

بنخفف عن بعض الحزن اللي دخل حياتنا فجأة... كل ده كان اول

٣ شهور بس... انما بعد كده”

\*\*\*\*\*

مايا ونسرین راجعين من الجامعة وداخلين البيت

مايا بتدخل بيت الجددة... نسرین بتطلع بيتها

فارس بيرجع من الجامعة ومايا قاعدة بتتعدا والباب مفتوح

شاور لها ويطلع بيته

## صوت مايا

”لما الدراسة بدأت ... كل واحد فينا بقى عنده اللي يشغله ... بقينا نشوف بعض بالصدفة او لما نروح نسأل على بعض...فارس كانت اخر سنة ليه ف الكلية وطبعاً زى كل السنين اللي فاتت كان مهتم بدراسته اكثر من اى حاجة تانية وبالتالى مامته وباباه علشان ميسيبهوش كانوا بينزلوا قليل اوى ... انا ونسرين كل واحدة فينا ف كلية مختلفة وسنة مختلفة وبالتالى عندنا اللي يشغلنا عن بعض وعدت اول سنة بعد موت حمزة وبدأنا نتعود على غيابه... لحد ما رجعنا للصفر من تانى“

\*\*\*\*\*

ايمان قاعدة ف اوضة حمزة... لابسة الاسود ورابطة راسها بايشارب

اسود... عينيها باين عليها العياط الكثير

الباب مقفول عليها

مامتها بتخبط وهى مبتفتحش

نسرين بتعيط ف حضن مايا...ومايا كمان بتعيط

## صوت مايا

”لما عمو مصطفى مات فجأة... اتصدمنا كلنا... وكأن موته رجع حزننا من اول وجدديد ورجع جو الحزن من تانى ... وبقينا حاسين ان كل حاجة اتغيرت.. اسعد بيت ف العيلة بقى اتعس بيت بعد

ما مات ٢ فيه... وبالتالي بقي الحزن جوانا على اللي ماتوا واللى  
لسه عايشين... ومع الوقت... بقينا نحاول نتعلق بأى فرحة علشان  
نخرج من الحزن اللي احنا فيه... وكانت اول فرحة"

\*\*\*\*\*

فارس داخل بيت الجدة... وراح لخالته ايمان ووشوشها  
وسط كل الموجودين... قامت ايمان حضنته بفرحة

صوت مايا

"اول فرحة كانت لما جه فارس واول واحدة قالها على خبر نجاحه  
بتقدير عالى هو انتى يا عمتى... واتمسكنا بالفرحة دى وبقينا كلنا  
نفكر ف فارس وهيتعين ف الكلية ولا لآ وهيعمل ايه لو متعينش...  
كنا بنشغل نفسنا علشان منكرش ف الحزن اللي تعبنا منه"

\*\*\*\*\*

ايمان ونسرين قاعدين بيسمعوا باقى الحكاية  
سكتت مايا تشرب وترتاح من الكلام  
ايمان "كل ده مقلتيش مين جاسر"  
نسرين "جاسر كان فتى الجامعة الاول... حاجة كده زى فتى احلام  
كل بنت"

ايمان "وايه علاقة مايا بيه"

نسرین"ماهی مايا کمان لما دخلت الجامعة...کانت فتاة احلام كل شاب... كانوا البنات مبيحبوش يكلموها ولا يمشوا معاها علشان بيحسوا انها اجمل منهم ولو مشيوا معاها هييان الفرق بينهم ف الجمال...وكل الشباب بيتمنوا يكلموها ويتعرفوا عليها"

ايمان"وهي؟؟ مكنش ليها صحاب"

نسرین"كل ما تتصاحب على بنات...تدريجا كده بيعدوا لسبب اللى قلتهولك ده...فبقينا نتقابل ف الجامعة بين محاضراتنا وبنروح

ونيجى مع بعض فمكنش لمايا اصحاب غيرى"

مايا بدأت تكمل

"وبدأت مأساتي بعد ما اتخرجت نسرین... جاسر زى ما قالت نسرین كان حلم كل بنت ف الجامعة ومع ذلك عمرى ما اعجبت بيه ولا اهتميت وكده...كان شعله نشاط والجامعة كلها تعرفه وتحبه...يعرف ناس من كل كلية...موظفين الجامعة

اصحابه...دكاترة الجامعة يعرفوه... هو كان اكبر منى لانه كان بيعيد ويباخذ السنة ف اتنين...ولحظى اتقابلنا ف سنة تالته وكان

دفعتى"

## فلاش باك

مايا ف المحاضرة... وجاسر قاعد ف الصف اللي قدامها على

اليمين شوية... كل شوية يلتفتت ويبص لها

صوت مايا

"كان بيحضر كل المحاضرات اللي بحضرها... ويقعد ف مكان

يخليه يقدر يشوفنى... ملاحظته ليا بالنظرات لفتت نظرى"

\*\*\*\*\*

مايا رايحة المحاضرة... وقبل الباب بخطوات ترجع وتقرر

متحضرش

وتشوف جاسر واقف ع الباب ولما يشوفها رجعت يخرج من القاعة

صوت مايا

"شغلنى اذا كان بيحضر علشانى ولا صدفه... وف يوم قررت

محضرش واشوف هيعمل ايه... لقيته خرج ومحضرش هو كمان"

\*\*\*\*\*

مايا بتكمل الحكاية وايمان ونسرين قاعدين

ايمان "هااا وبعدين"

مايا "قعدنا ع الحال ده الترم الاول من تالته"

ايمان "وبعدين ايه اللي حصل"

مايا "لا قبل وبعدين... لازم احكى لك عن حال البيت ايامها"

ايمان بتحاول تفتكر

”كان ايه الحال“

مايا”وقتها فارس جاله شغل السعودية وسافر...ونسرين اتخطبت

وانشغلت شوية“

نسرين”انا انشغلت عنك يامايا؟“

مايا”انا مش بلومك يانسرين.. بس انتى وقتها كنتى مثلا بتخرجى

مع ممدوح لما يبجى... بتكلميه ف التليفون... بيبجى يزورك هو

واهله..كده يعنى بقى ليكى اهتمامات تانية غصب عنك“

ايمان”كلمى وبعدين“

مايا”ساعتها زاد احساسى اوى بالوحدة... اخواتى اللى كانوا

بيهنونا عليا حياتى مبقوش موجودين... صحبتنا ولتتنا اختفت...“

احساس الوحدة ده وحش اوى“

ايمان”كل ده انتى وجاسر متكلمتوش“

مايا” لا اتكلمنا ف اخر يوم امتحان الترم الاول من سنة تالته“



فلاش باك

مايا خارجة من الامتحان قرب عليها جاسر

توقعت زى كل مرة انهم هيتبادلوا النظرات

واتفاجئت بيه بيكلمها

"خرجتى بدرى ليه"

"خلصت"

"وعملتى ايه حليتى كويس"

"الحمد لله"

"ماتيجى نشرب حاجة ف اى مكان"

"لا شكرا...بعد اذنك"

مشيت مايا خطوات

"مايااا"

سبقها ووقف قدامها

"نعم"

"احنا اخر يوم امتحانات النهاردة"

"ما انا عارفة"

"يعنى مش هشوفك طول الاجازة"

وارتبكت مايا ومعرفتش ترد

”بصى لو مش عايزة نقعد مع بعض هاتى رقمك ابقى اكلمك“

لحظات سكوت وتردد

”مش عايزة تجيبى رقم تليفونك ليه... احنا مش زملا“

\*\*\*\*\*

مايا بتكمل الحكاية

”واتكلمنا ف الاجازة... ولقيت الاهتمام اللى مفتقدها والحب اللى

اى بنت تتمناه... من اول مكالمة فهمته انى لا بخرج لوحدى ولا انا

بتاعة مقابلات وخروجات والكلام ده... مطلبش منى فعلا اننا

نتقابل... كنا مكتفيين بالتليفون... حسيت اننا مع بعض لحظة

بلحظة صارحنى بحبه لقيت نفسى بقوله وانا كمان... وحكيت له

عن حمزة وانا خايفة انه يغير او يتغير معايا“

ايمان ”وبعدين؟؟“

مايا”قالى ان احساسى ناحية حمزة كان طبيعى وخصوصا انى كنت

صغيرة وكان هو قريب منى اوى علشان كده حسيت بالحب...وان

سنى الصغير هيخلينى انسى الحب ده بسرعة... كلامه اقنعنى جدا

وده اللى خلانى اعرف اعيش بعد كده من غير ما احس بتأنيب

ضمير ناحية حمزة...حتى لما حبيت فارس كنت بفتكر كلام جاسر

واقول ان مشاعرى ناحية حمزة كانت حب مراهقة وده اللى

اكدهولى نسرين بعد كده وانتى كمان ياعمتى“

نسرین" لما مايا جت تحکيلي عن علاقتها بجاسر بعد ما حکت له

عن حمزة... شجعتهها"

ايمان" مقولتوليش ليه "

مايا" خفت تزعلي يا عمتي... واكدت على نسرین انها متقولش"

ايمان" کملی وبعدين"

مايا" عشنا الترم التانى وسنة رابعة ف سعادة واجمل قصة حب

بيتضرب بيها المثل... كل يوم مع بعض ف الكلية... وانا ف

البيت بيکلمنى طول الوقت"

ايمان" وایه اللی حصل"

مايا" بعد ما اتخرجت كان هو لسه هیدخل سنة رابعة لاوّل مرة

يعنى يا عالم هيخلص امتی"

ايمان" نسيت اسألک... هو كان ایه ظروف عيلته يعنى واحد كل ده

ف الجامعة اهله بيصرفوا عليه ولا بيشتغل ولا ایه"

ابتسمت مايا بمرارة

"من غبائی انی مسألتنش نفسی السؤال ده دول الفترة اللی كنا فیها مع بعض"

ايمان" لیه؟؟ لیه بتقولی من غبائی"

مايا" سمیها غباء... سمیها قلة خبرة... المهم ان القفلة اللی كنتم قافلینها علیا

دی خلتنی مش بفهم الناس"

ايمان" مش فاهمة"

مايا" هحکيلک"

## فلاش باك

مايا بتتكلم ف التليفون مع جاسر ف التليفون  
"جاسر بابا جاى الاسبوع الجاى وهيقعد اسبوعين وبعدين نساافر

لندن"

"هتوحشيني يا حبيبتي"

"وانت كمان اكيد هتوحشنى... بس انت ناوى تكلم بابا امتى"

"اكلم بابا اقوله ايه"

"قوله انك عايز تخطبنى"

"هو انا لسه خلصت كلية"

"يعنى ايه"

"يعنى مينفعش"

"ازاى مينفعش... قوله وتعالى اخطبنى وبعدين نبقى نتجوز بعدين لما

تخلص"

"يا بنتى انتى مش عايشة ف الدنيا... هو فيه خطوبة من غير

شبكة وشقة وتجهيز جواز"

"مش مستعجلين نبقى نعمل كل ده على مهلنا... مش هنفضل كده

طول الوقت مستخبين واللى بيننا تليفونات وبس"

"ما انتى اللى مش عايزة تخرجى معايا ولا اشوفك خالص"

"ايوه... اخاف حد يشوفنا وعلشان كده بقولك تعالى اتقدملى"

"ظروفي متسمحش دلوقتي"

"متسمحش ليه"

"معيش فلوس"

"اسلفك"

"لا"

"ليه... ماهي مش اول مرة"

"انت بتعايريني انك بتسلفيني"

"والله ما اقصد... انا اقصد بس اني ممكن اسلفك حق الدبل وهقنع

بابا واعمل كل حاجة تسهل اننا نتخطب"

"لما تبقى تفهمي الكلام وتعرفي تتكلمي كويس هبقى ارد عليكى"

واتقفلت السكة ف وش مايا وهي بتتكلم ومش مصدقة طريقته

\*\*\*\*\*

مايا سكتت وايمان ونسرين قاعدين

ايمان "هو انتى كنتى بتديله فلوس؟"

مايا "اه... مع انه مكنش بيطلب بصراحة... كان مثلا يقول محتاج

اجيب كذا وخلصت مصروفي... يقول فلوسى اتسرفت... حاجات من

دى... بس ساعات كنت الاقيه بيصرف كتير اوى"

ايمان "مين كل ده"

مايا"معرفش ... طريقة صرفه كانت مريبة ومفكرتش فيها الا بعد ما

سبنا بعض"

ايمان"وسبتوا بعض امتي؟"

مايا"من وقت المكالمة اللي حكيت لك عليها"

ايمان"حتتة مكالمة عادية كده تسببوا بعض بسببها"

مايا"اتصلت كتير بعدها مبقاش يرد عليا... وبطلت اتصل احترامام

لنفسى وعلشان مقلتش من نفسى اكرت من كده"

ايمان"وبعدين"

مايا"وقتها كانت نسرين قريت تتجوز فبقيت اشغل نفسى معاكم ف

جهازها وفرش البيت وكل ده...وبجد دى اكرت فترة حسيت فيها

انى مشغولة ومش متضايقه...كنت فرحانة اوى لنسرين ومكنتش

اعرف اللي مستخبي لى بعدها"

نسرين"ايه اللي حصل بعدها...انا من ساعة ما اتجوزت وانا

حسيت اننا مبقناش قريبين لبعض زى الاول"

مايا"علشان بعيد وكنتى بتيجى زيارات متباعدة فاكيد مش هنبقى

زى الاول"

ايمان"يعنى يا مايا مش جاسر اللي عمل كده؟"

مايا"لا.. انا مشفتش جاسر بعد المكالمة اللي قلتلك عليها"

ايمان"اومال ايه اللي جاب سيرة جاسر"

مايا"انا بحكى لك علشان تعرفى كل حاجة مریت بيها حتى

مشاعرى بحكيها دلوقتى "

ايمان"يعنى ضعفتى بعد كده"

عيطت مايا

"متظلمنيش ياعمتى زى ما كل الناس ظلمتنى"

ايمان"طب كملى ايه اللى حصل"

مايا"انا تعبت من الكلام... ممكن اخذ الدوا وارتاح شوية ونبقى

نكمل"

نسرین"كفاية عليها كده ياماما... احنا هنروح من بعض فين..."

تستريح شوية وترجع تحكى لنا"

خرجت ايمان ونسرين من الاوضة بعد ما سابوا مايا  
"كل ده حصل وانا مش عارفة حاجة... كلام مايا حسسنى انى  
قصرت معاها اوى"  
"ليه ياماما... انتى كنتى هتعملى ايه بس...وليه بتحملى نفسك  
فوق طاقتك... مش انتى المسئولة عنها لوحدك"  
"انا من يوم ما جت وقلت بينى وبين نفسى انى هكون مكان  
امها... اه ماما وحياة مقصروش معاها بس انا حسيتها مسئولة منى"  
"وانتى قصرتى ف ايه بس"  
"انى مكنتش حاسة بيها"  
رن موبايل نسرين  
"ده ممدوح"  
وردت عليه  
"الو...ازيك يا ممدوح...كويسة الحمدلله...انت هتبات عند مامتك  
ولا ف البيت... ابقى اقفل محبس المياه قبل ما تنزل... لا انا عند  
ماما"  
وارتبكت وهى بتتكلم وبصت لايمان  
"مايا...لا لسه مروحتش لمايا... هبقى اسلمك عليهم ان شاءالله...  
مع السلامة"



قفلت مع ممدوح... سألتها ايمان

"ايه اللي جاب سيرة مايا"

"بيسأل عليها هي وفارس فاكرني روحت لهم"

"كوبس انك رديتي كده... يوه كنت هنسى"

"ايه؟"

"لازم انزل اعرف فؤاد ان مايا اتكلمت... هيفرح اوى"

"وهتضحكى له؟"

"مش عارفة... انتي ايه رأيك"

"مش عارفة"

"انا هقوله اللي حصل انها اتكلمت بس لسه منعرفش حاجة"

"ماشى"

"هتنزلى معايا"

\*\*\*\*\*

ايمان داخله بيت مامتها... لقيت فؤاد قاعد

دخلت قعدت

"ماما فين؟"

"نامت من شوية... اخبار مايا ايه"

"اتكلمت الحمد لله"

فؤاد بفرحة

”بجد؟؟ وحكت ايه اللي حصل ومين اللي عمل كده“  
”لسه يا فؤاد... هي قعدت تتكلم معنا شوية لحد ما تعبت...بكرة  
ان شاءالله نبقى نعرف“  
”الحمدلله انها اتكلمت... زعلانة منى؟“  
”مجبئتش سيرة والله...بس يعنى اللي مرت بيه مش سهل برضه“  
”وانا؟؟ الصدمة اللي اتصدمتها مش سهلة ابدا“

\*\*\*\*\*

فؤاد ومامته بيخبطوا على باب ايمان الصبح  
فتحت لهم نسرين  
فؤاد”صباح الخير يانسرين“  
الجددة”صحيتوا ولا لسه نايمين“  
نسرين”صباح النور ياخالو... صحينا يا نينة“  
دخلوا وقعدوا وسألها فؤاد  
”مايا فين“  
”ف الحمام وماما بتعمل الفطار“  
جت ايمان تسلم عليهم  
وخرجت مايا م الحمام...شافت باباها  
راحت حضنته وهي بتعيط  
وبتتكلم احسن من اليوم السابق

"انا اسفة يابابا انى حطيتك ف الموقف ده... انا غلطانة"  
فؤاد وهو بيحاول يتحكم ف دموعه وحزنه  
"ليه يامايا عملتى فينا كده"  
"والله ما عملت حاجة... كل غلطتى انى سكت كل ده"  
كلهم منتبهين لكل كلمة بتقولها مايا  
ايمان"احكى لنا يامايا... قصدك ايه"  
قعدت مايا جنب باباها  
مايا"هحكى لكم بس اوعدونى كلکم وعد مش عايزة غيره مهما كان  
رأيكم فيا او لومکم عليا"  
نسرین"وعد ايه"  
مايا وهى بتمسح دموعها وبنبرة تحدى  
"فارس ومامته وباباه ميعرفوش حاجة من اللى هقولها دى"  
بصوا كلهم لبعض...ردت مايا  
"زى ما اتهمنى الاول قبل ما يسمعنى...وحکم عليا انى مذنبه..."  
مش لازم يعرف انى بريئة ومليش ذنب"  
فؤاد"طب احكى"  
مايا"وعد محدش يقولهم حاجة"  
ردوا كلهم  
"حاضر...نوعدك"

## فلاش باك

فرح نسرين وممدوح وكلهم موجودين ماعدا فارس  
صوت مايا

"الفترة اللي بعد ما سبت جاسر كانت قليلة اوى وانشغلت فيها  
...ونسرين اتجوزت وسافرت مع بابا لندن"

\*\*\*\*\*

فؤاد وهو ببسأل

"مين جاسر"

ايمان بتلحقها "زميلها من الجامعة وكان عايز يتقدم لها بس ظروفه  
مكنتش مناسبة"

فؤاد "وايه علاقته باللى حصل"

مايا بتكمل "علاقته غير مباشرة لانه أثر فيا اوى"

## فلاش باك

مايا قاعدة لوحدها ف بيت مامتها

بتقلب ف التليفزيون بملل...بتمسك المجلات الموجودة بملل اكثر  
صوت مايا

"روح عند ماما... والمرة دى كنت رايحة وبفكر انى اقعد عندها  
شوية زيادة بما ان مبقاش ورايا دراسة وفاضية...بس انشغالها اكثر

الوقت ووجودى لوحدى خلانى مستنية اليوم اللى ارجع فيه مصر  
تانى... مكنتش اعرف انها اخر مرة هشوف ماما"

\*\*\*\*\*

مايا قاعدة ف بيت جدتها... بتتكلم ف التليفون ودموعها نازلة  
صوت مايا

"وبعد ما بابا جه وصلنى ورجع لندن تانى... اتصل بيا وقالى على  
وفاة ماما... واتفاجئت انى كنت بحبها اوى وموتها اثر فىا اكتر ما  
كنت اتخيل او بمعنى اصح مكنتش فكرت ف الموقف ده قبل كده"

\*\*\*\*\*

مايا قاعدة ف اوضتها بتعيط... جنبها جدتها بتططب عليها  
وعلامات السهر والارق على وشها  
صوت مايا

"ورجع موتها يجرع عليها الاحزان من اول وجديد... كل اللى بحبهم  
بيبعدوا عنى واحد ورا التانى... عيلتنا اتفرقت... قاعدة ف البيت  
على طول ومعنديش اصحاب حتى اتكلم معاهم"

\*\*\*\*\*

مايا قاعدة بتحكى وكلهم منتبهين  
"اسوأ فترة عشتها ف حياتى كانت بعد وفاة ماما اللى جه بعد  
جواز نسرين بشوية... تخيلوا قاعدة طول الليل والنهار افتكر

الاوراق القليلة اللي قضيتها مع ماما... والاوراق القليلة اللي  
قضيتها مع حمزة واعيط... حسيت انى مش مكتوب لى افرح...  
حياتى فاضية محدش معايا... نسرين اتجوزت وفارس مسافر ودول  
الوحيدين اللي كان ممكن اخرج معاهم لو عايزة اتفسح... مفيش حد  
مهتم بيا... اه نينة وعماتى بيهتموا بأكلت... نمت... عايزة حاجة  
نفسى فيها... انما برضه احساس الوحدة صعب... بقيت احن اوى  
لاهتمام جاسر بيا ومكالماته واتصالاته... فكرت كتير انى اكلمه  
تانى... ترددت اوى... وبعدين اتصلت بيه... قفل وبعثلى مسدج  
مختصرة... متتصليش بيا تانى... جرحنى ومفكرتش حتى انى اسأله  
ليه... بس حالتى زادت سوء... عياط على طول... مفيش نوم  
... مليش نفس آكل... وطبعاً كانوا نينة وعماتى حاسين"  
الجدة"ايوه فعلاً... انا كنت بتقطع عليكى... وقلت مش معقول  
موت امها اللي مقعدتش معاها يعمل فيها كده"  
ايمان"انا ايامها كنت بسافر لنسرين كتير لما عرفت انها حامل"  
مايا"فاكرة بقى يا عمتى لما نسرين اجهضت وروحتى قعدتى معاها  
شهر... وقتها حصلت المصيبة"  
وانتبهوا كلهم  
"ايه اللي حصل"

فلاش باك

مايا فى اوضتها قاعدة لوحدها كالعادة

حياة قاعدة مع مامتها بره

”ماما هى مايا لسه على حالها برضه“

”لسه يا حياة“

”البت دى محسودة...على جمالها ده ومحدث اتقدم لها خالص

واهى داخلة على ٢٢ سنة“

”معاكى حق صحيح“

”ولا تكون ياماما حد عملها حاجة“

”حد مين...هى عمرها اذت حد علشان حد يأذيها“

”الناس الوحشة كتير...نضمن منين“

”ونعمل ايه“

”معرفش انا بقولك يمكن يكون ده السبب“

\*\*\*\*\*

الجدة بتتكلم بعد ما افتكرت اللي حصل

”اه صحيح... وطلعت حياة معاها حق“

فؤاد”معاها حق ازاي؟“

الجددة"قعدت اسأل الجيران والمعارف على حد كويس بيّفهم ف فك  
السحر علشان يشوف البت معمولها عمل بصحيح ولا لأ... ودلونى  
ع الشيخ خضر"

مايا بتمسح دموعها بسرعة علشان تقدر تكمل الحكاية  
فؤاد بضيق "وده اسمه كلام ياماما تصدقى التخاريف دى"  
الجددة"تخاريف !!! متقولش كده... بنتك كان معمولها عمل  
صحيح وربنا جاب الشفا على ايده"  
مايا بوجع "جالى الشقا كله على ايده"  
وانتبهوا لها باستغراب

### فلاش باك

الجددة وحياة قاعدين  
"لا ياماما مش هقدر اجى معاكى...توفيق لو عرف حاجة زى كده  
تبقى مصيبة"  
"وهو مين بس اللى هيقوله"  
"وانا بعد العمر ده كله هخرج من وراه ومن غير ما اقول رايحة فين"  
"وانتى خارجة مع حد غريب...مش مع امك"  
"لا ياماما...مش عايزة مشاكل...عايزة تاخديها وتروحي روحى"

\*\*\*\*\*



مايا وجدتها قاعدين ف انتريه قديم وناس تانية قاعدين  
وفيه واحدة ست ف الاربعينات بعباية سودة بتدخل وتخرج من  
عند الشيخ وتنظم مواعيده ومقابلاته  
صوت مايا

”روحنا للشيخ خضر... البيت من اول ما دخلته وانا قلبى  
اتقبض... الست اللي زى سكرتيرة او مساعدته دى مريبة...  
نظراتها وضحكتها تخوف... وكلامها ف موضوعات غريبة...  
ومبتسألش اى حد عن سبب زيارته زى ما بنشوف ف الافلام“

\*\*\*\*\*

مايا وجدتها داخلين اوضة الشيخ وفيها  
ترابيزة صغير وقاعد وراها الشيخ و٤ كراسى  
محطوطين كل كرسيين جنب بعض  
وكرسى تانى ف اخر الاوضة لوحده وضهره يبقى للناس  
صوت مايا

”دخلنا للشيخ خضر... راجل ف الخمسينات ... اتقبضت منه اكر  
من قبضتى من الست اللي شفتها بره... قعدت جنب نينة ع الكرسي  
اللى لازم فيها وانا ماسكة ف دراعها وخايفة اسيبها... قعدت

تحكى له وقال انه لازم يرقينى الاول...وقالى اقعد على الكرسى اللى  
ف اخر الاوضة"

\*\*\*\*\*

مايا قاعدة على الكرسى ف اخر الاوضة...ضهرها لجدتها  
والشيخ حاطط ايده على راسها وبيقرا كلام مش مسموع

صوت مايا

"نظرات الشيخ ليا كانت غريبة... مرعبة... حيوانية... لما قال  
هيرقينى خفت يلمسنى بحجة الرقية... بس ساعتها حط ايده على  
راسى وهو بيقرا لحد ما خلص وقالى قومى وراح قعد مكانه"

\*\*\*\*\*

الشيخ قاعد على كرسية...ومايا وجدتها قصاده  
"بتتك يا حاجة مش معمول لها عمل ولا حاجة...دى محسودة من  
عين مصلتش ع النبى"  
"يا خبر... منهم لله اللى بيحسدوا الناس...وبعدين؟"  
" كل اللى اقدر اعملها انى احصنها...وده هيحتاج جلسيتين  
تلاتة يمكن اكثر"  
"ازاى الجلسات دى"

”ده شغلى بقى يا حاجة... وعلشان تعرفى انى مش نصاب ولا  
دجال انا قتلتك الحقيقة... كان ممكن اقولك معمولها عمل وعايذ  
يتفك انما انا جيت معاكى صريح“  
”ربنا يكرمك يا شيخ خضر... ده انت صيتك سابقك“

\*\*\*\*\*

مايا قاعدة بتحكى  
”ورجعنا قولت لنينة بلاش نروح تانى وانى مرتاحتش للناس دول  
وشكلهم نصابين... مسمعتش كلامى وقالت انى مش فاهمة حاجة  
وصممت اننا نروح معاد الجلسة اللي حددها“

\*\*\*\*\*

مايا داخلة مع جدتها اوضة الشيخ  
بيتكلم معاهم الشيخ... وتقوم الجدة تخرج من الاوضة  
مايا بتقوم تقعد على الكرسى ف اخر الاوضة  
صوت مايا  
”روحنا معاد الجلسة ونفس احساسى متغيرش... خايفة من الناس  
دول ومش عارفة ليه... اتكلم الشيخ مع نينة وقالها الجلسة لازم  
اكون لوحدى... وخرجت فعلا... وبعدها قالى اقعد على الكرسى اللي  
ف اخر الاوضة“

\*\*\*\*\*

مايا بتفتح عينيها ف سرير ف اوضة مفيهاش غير السرير وشماعة

وكرسى

متغطية وهدومها جنبها على الكرسى

والشيخ واقف بيكمل لبسه من ع الشماعة

كلم مايا وخرج من باب ف الاوضة

صوت مايا بنشيح عالى

”بعد ما خرجت نينة من الاوضة وورحت قعدت ف المكان بتاع المرة

اللى فاتت ..فوقت لقيت نفسى ف سرير...معرفش نيمنى امتى

وازاي...كل اللى فهمته انى خلاص مستقبلى ضاع واتدمرت... كان

واقف ع باب الاوضة وبيهددنى... بصوت بشع وشكل ابشع

- لو اتكلمتى هتلاقى cd باللى حصل ف كل حته ومستنيكى

الجلسة الجاية”

## . 9 .

انهارت مايا وهى بتفتكر...محاولاتها التماسك  
علشان تكمل باءت كلها بالفشل...كل الموجودين بيعيطوا حتى  
فؤاد  
الجدة بتعييط ويتخبط على رجليها وهى قاعدة وكأنها بتضرب  
نفسها  
"يا حبيبتي يا بنتى...قطيعة تقطعنى انا السبب"  
ايمان اخدة مايا ف حضاها بتحاول تخفف عنها  
نسرين بتعييط بصوت على...فؤاد دموعه نازلة بصمت  
ايمان"اهدى ياماما...السكر هيعلى عليكى"  
الجدة"انا اللى اخدتها ووديتها...مقلتيش ليه...مقلتيش ليه  
يامايا...حرام عليكى تعملى فينا كده"  
مايا"قلتلك مش عايزة اروح تانى...كنتى مقتنعة بيه ومش  
راضية تسمعينى"  
الجدة بتعييط مش عارفة ترد...فكرت لحظات  
"بس انتى خفيتى لما روحنا له"  
فؤاد بتماسك

”كملى يامايا... لما قالك مستنيكى الجلسة الجاية... روحتى؟“  
مايا بتمسح دموعها... وكانت نسرين قامت جابت لها مياه  
شربت مياه وبدأت تهذا وتكمل  
”لما خرجت من الاوضة طلع الباب بيوديني على الاوضة بتاعة  
الشيخ اللى كنا فيها... قعدت ونادى على الست اللى عنده  
دى وقالها تدخل نينة... دخلت نينة وقالها انه خلص الجلسة  
والجلسة الجاية بعد اسبوع ولازم اكمل الجلسات كلها... رد  
فعلى وقتها انى كنت ساكتة خالص مش بتكلم... مش قادرة ولا  
ليا نفس اتكلم ولا ارد... وطول الطريق واحنا راجعين نينة  
تكلمنى وانا مبردش عليها كل اللى يفكر فيه انى مش هروح له  
تانى ... لحد ما جينا البيت“

### فلاش باك

الجددة بتفتح باب البيت م بره  
بتشوف شقتها مفتوحة  
صوت مايا  
”دخلنا البيت كانت عمتى حياة وعمو توفيق قاعدين مستنييننا  
واول ما دخلنا عمتى حياة لحقتنا بالكلام“  
حياة”ايه ياماما اتأخرتوا ليه؟؟؟كل ده بتشوفى بلوزة لمايا“

الجددة"ملقينا ش حاجة عجبتنا ... انتوا قاعدين مستنييننا ليه "

توفيق"اصل فؤاد بعث الحوالة وكنت جايبهالك "

الجددة بتاخذ منه الفلوس "شكرا"

مايا داخلة اوضتها

توفيق"مايا استنى "

وقفت مايا

توفيق"لبسك عامل كده ليه "

بصت مايا برعب على هدومها وهي بتلمها

توفيق"مش قلنا بلاش لبس البناتيل دى "

الجددة"ماله البنطلون يا توفيق... ما البنات كلها بتلبس كده "

توفيق"بنات مش مطبوعة وعازية تلتفت النظر "

مايا واقفة... شافت الكلام بقى بينهم انسحبت ودخلت

اوضتها

\*\*\*\*\*

مايا بتعيط وبتحكى

"دخلت وقفلت على نفسى وانا مش عارفة اتصرف ولا اتكلم... "

نينة بتاخذنى هناك من غير ما تقول علشان عمى حياة خايقة

من عمو توفيق... عمى ايمان عند نسرين... نينة مقتنعة

بالشيخ ومصداقاه... ومفيش حد ممكن احكيه ويسمعنى... وغير

كل ده اتكسفت اقول ولا اتكلم... مكنتش عايزة حد يقول عليا  
حاجة وحشة... بقى كل تفكيرى ازاي ده ميتكررش تانى"  
كلهم بيعيطوا... وفؤاد بيسألها بترجى  
"وعملتى ايه؟"

"قلت ف نفسى هو ميعرفش بيتنا ولا تليفوننا ولا حاجة غير  
اسمى... يعنى مش ممكن ييجى مثلا او بيعت لنا حد  
يهددنا... ده كان كل اللى بفكر فيه وقلت لازم ابين انى بقيت  
كويسة علشان نينة متودنيش تانى... وفعلا بقيت اقعد واتكلم  
وامثل انى مبسوطة وانا بتقطع ولما نينة تنام ادخل اقفل على  
نفسى وافضل اعيط لحد ما انا... حتى لما بنام كنت احلم  
بالراجل البشع ده واقوم من النوم مرعوبة"  
ايمان"ليه سكتى... ليه يامايا متكلمتيش"  
مايا"هقول ايه ولمين... مفيش حد جنبى ا قوله حاجة زى  
دى...خوفت"

فؤاد"والزفت ده انا مش هسكت له"  
مايا"ارجوك ياابا بلاش فضايح...كفاية اوى لحد كده ... انا  
مش هستحمل حد تانى يعرف واتفضح...كفاية اللى انا فيه"  
ايمان"فارس لازم يعرف يمكن يرُدك والحكاية تتلم"  
صرخت فيها مايا



”اوعى ياعمتى حد يقوله...اوعوا حد يقوله... مين قال انى

عايزة ارجع له بعد اللي عمله فيا...اوعوا حد يقوله”

عيطت مايا بهيستريا...حضنتها ايمان

”خلاص مش هقول حاجة...خلاص اهدى”

\*\*\*\*\*

فارس لابس ورايح ع الباب

توفيق ”رايح فين؟“

فارس ”نازل شوية“

توفيق ”لو حد سألك من الشارع هتقول ايه“

فارس ”اى حد ياابا..مش هفضل محبوس ف

البيت...اتخنقت“

حياة”امانة عليك يا فارس ماتقول حاجة لحد... انت تطلقها

من سكات...علشان خاطر خالك يا خويا“

فارس ”متقلقيش ياماما... مش هفضح نفسى“

توفيق ”اوعى تطلقها من نفسك كده“

فارس ”مش فاهم“

توفيق ”لو طلقته غياىى هتبقى عايزة منك كل حقوقها لو رفعت

قضية وطالبت بيهم“

حياة”واحنا برضه هندخل بعض المحاكم“

فارس "اطمن يا بابا... مالهاش عين تطالب بحاجة"  
توفيق "اسمع الكلام انت بس... انت مش عارف حاجة... لازم  
تتنازل عن كل حاجة واجيبك اللي صرفته كمان"  
فارس باستسلام "ماشى... انا نازل"

\*\*\*\*\*

فؤاد قاعد مع مامته هو سرحان وهى قاعدة تتفرج على  
التليفزيون  
"ماما"  
"نعم"  
"هو الراجل النصاب ده عنوانه ايه"  
الام بفرع "وانت عايز عنوانه ليه؟"  
فؤاد "عايز ارواح له"  
الام "تروح له تعمل ايه... متوديش نفسك ف داهية يا بنى ولا  
تفضح بنتك"  
فؤاد "متخافيش... مش هعمل حاجة... بس عايز ارواح له ع  
الاقبل ابلغ عنه بسبب النصب والدجل"

\*\*\*\*\*

نسرین بتحضر شنتطها ومايا معاها ف الاوضة  
"عايزة اقعد معاكى اكثر من كده بس ممدوح عمال يزن عليا  
ارجع ومش عارفة اقوله ايه"  
"ارجعى يا حبيبتى لبيتك ربنا يسعدك"  
"مايا.. اوعى تزعلى انى بعدت عنك"  
"ازعل ايه بس... انتى بعدتى بمزاجك...دى سنة الحياة وانا  
خلاص هبقى كويسة"  
"قوليلى صحيح"  
"نعم"  
"ليه مقلتيش لفارس قبل الجواز"  
"خفت"  
"ومخفتيش انك تتحطى ف الموقف اللى اتحطيتى فيه ده"  
"متخيلتش ان فارس اللى متربى معايا وعارفنى كويس اوى  
ممکن يشك فيا... ومع ذلك فكرت كثير انى اقوله... قبل  
الخطوبة وخلال الخطوبة وكنت كل مرة أأجل الكلام على اخر  
لحظة"  
"ليه"  
"الكلام كان بيقف يانسرين ومبقدرش اطلعه ابدأ...لحد ما  
حددنا الفرح...فضلت الاسبوع الاخرانى ده مبمنش ومش عارفة

هقوله ازای... وقلت لازم اقوله قبل كتب الكتاب... بس يوم  
الفرح وقبل كتب الكتاب مكنش فيه وقت ولقيت نفسى معاه

وانا مش عارفة اتكلم"

"ماهى اكيد مكنتش حاجة سهلة عليه يا مايا"

"يعنى كل اللى شفته ده ومريت بيه كان سهل عليا... يا

نسرين انا مفرحتش ابدأ...الفرحة ف حياتى قليلة اوى"

"معلش ربنا يعوضك خير... لو فيه اى حاجة كلمينى..."

متخبيش عليا حاجة تانى"

"حاضر"

اخذت نسرين شنطتها...اخذتها منها مايا

"هاتى انتى مش قادرة تشيلى"

"شكرا يامايا...ماما سبقتنا على تحت؟؟"

"اه نزلت...بابا هيوصلك تركبى وابقى طمنينا عليكى لما

توصلى"

"حاضر... خليكى مع ماما يامايا

"لا كفاية كده...انا هرجع اقعده تحت مع نينة تانى"

\*\*\*\*\*

نسرین بتسلم علی جدتها ومامتھا  
الجدة"سلمتی علی خالتک؟"  
نسرین بتبص لمایا ... خایفة تزعلھا  
الجدة"زی ما مایا بنت خالک وزعلانة علیھا...مینفعلش  
تقاطعی خالتک وابن خالتک"  
نسرین"حاضر یا نینة هطلع لها"

\*\*\*\*\*

نسرین بتسلم علی حیاة وتوفیق وفارس  
بتسلم بسرعة علشان محدش یسألھا علی حاجة  
فارس عینیہ کلھا اسئلة ومش عارف یسأل  
توفیق"انتی حاجة یا نسرین؟"  
نسرین"لا یاعمو"  
توفیق"طب انا نازل معاکى علشان عایز خالک"

\*\*\*\*\*

مایا قاعدة مع فؤاد وایمان وجدتها  
مستنیین نسرین تنزل...نزلت نسرین ومعھا توفیق  
اول ما شاف مایا بص لها باحتقار  
قامت مایا دخلت اوضتها ودخلت وراها نسرین  
توفیق"السلام علیکم"

ردوا كلهم السلام بعد ما لاحظوا نظرتة لمايا

توفيق"عايز اتكلم معاك كلمتين"

فؤاد"خير"

قعدوا وايمان والجدة معاهم

توفيق"عايزين نروح للمأذون ونخلص وتيجى تبريه"

فؤاد"ونروح ليه...مايطلقها وخلص... مش عايزها تحضر"

توفيق وهو بيبص لفؤاد باحتقار انه ساكت على عار بنته

وخايف عليها

"لا لازم تيجى تبريه عند المأذون.... وانت كنت قلت هتدفع

المصاريف اللي دفعها... متآخذنيش ابني صرف اللي وراه

واللي قدامه على انها جوازة العمر...بس عملة بنتك بقى منها

لله"

شخط فيه فؤاد

"خلااااص يا توفيق...اللي عايزه هياخده من سكات"

مايا قاعدة ف الاوضة وسامعة كل كلمة بيقولها توفيق

كلامه بيخرج فيها... دموعها نازلة ف صمت

ولما حسست ان توفيق بيعاير باباها

مسحت دموعها وخرجت م الاوضة... ونسرين بتشدها علشان

متخرجش

مايا على باب الاوضة...بتتصنع القوة  
"بابا... اى وقت عايزنى نروح للمأذون انا جاهزة"  
ايمان والجدة ساكتين مرغمين...وبيتابعوا الموقف  
توفيق بضحكة سخرية وهو خارج  
"صحيح ياما تحت الساهى دواهى"  
فؤاد"النهاردة بالليل نروح للمأذون"  
توفيق"خليها تجيب الشبكة وانت حضر ٢٠ الف جنيه حق  
الفرح... علشان نعمل بيهم فرح يليق بعروسة بنت بنوت"  
خرج من البيت وكلهم يببصوا لبعض ومتغاضين منه  
التفتت فؤاد لمايا  
"متزعليش... انا أجلت سفرى بسبب الظروف دى... ايه  
رأيك ترجعى تعيشى معايا بعيد خالص عن هنا"  
مايا "اعيش هناك؟؟ مباحبش هناك خالص يابابا...يمكن لو كانت ماما  
عايشة كنت جيت وقعدت شوية معاك وشوية معاها"  
نسرين"ما تجربى تروحي شوية تغيرى جو وتهدى اعصابك ولو ارتاحتى  
اقعدى مراتحتيش ارجعى"  
مايا بتفكير"هفكر"  
فؤاد"ياللا احنا يانسرين"

\*\*\*\*\*

فؤاد نازل من تاكسى ف منطقة شعبية

بيبص حواليه...شاف قهوة

راح قعد عليها

القهوجى بيبص على فؤاد

راح وشوش صاحب القهوة بشك

شاور له صاحب القهوة انه يروح له

راح لفؤاد

"أؤمر يا باشا"

"شأى لو سمحت"

"تحت امر سعادتك"

"بقولك ايه"

"أؤمرنى"

"هو الشيخ خضر فى انهى بيت هنا؟؟"



وطلع فؤاد ٥٠ جنيه من جيبه ناولهم للقهوجى  
اخدهم القهوجى ف جيبه بسرعة وهو بيستغرب  
"الشيخ خضر !!!"  
"ايوه... الشيخ خضر... مالك مستغرب ليه"  
"هو سعادتك جاى له ليه؟"  
"عندى مشكلة كده وعايضه فيها وناس دلونى عليه"  
"بس اكيد الناس دول مجوش من زمان"  
"من سنتين تقريبا"  
"الشيخ اتقتل السنة اللى فاتت"  
"اتقتل؟!... مين اللى قتله"  
"واحد وسلم نفسه ومحدث يعرف ليه"  
"والقاتل ده مقالش قتله ليه"  
"اللى بسمعه من الناس انه مقالش سبب"  
ونادى واحد من الموجودين على القهوجى  
"تؤمرنى لحاجة تانية سعادتك"  
"شكرا"

فؤاد داخل على مايا اوضتها

”بتعملى ايه؟“

”مفيش“

قعد على طرف السرير قصاها

”انا مكنتش هسكت على حقك... انا اه مكنتش هبلغ عن الاغتصاب

زى ما طلبتى بس كنت هبلغ عنه كنصاب ودجال“

مايا ساكتة بتسمع

”روحى وسألت عليه... عرفت انه اتقتل“

ظهرت الراحة والفرحة والشماتة على وش مايا

”يستاهل“

”اكيد يستاهل... واضح يا مايا انك مكنتيش لوحك ضحيته“

”ده حيوان بشع“

”اللى يعمل كده طبعا حيوان واهو اخد جزاؤه ولسه جزاؤه عند

ربنا“

”ربنا ينتقم منه“

طبطب على ايديها وهو بيكمل

”انا بقول نقول لفارس النهاردة اللى حصل“

ردت باصرار

”لا“

”ليه بس... انتى عايزة تفضلى ف نظر توفيق يعنى..“  
”ارجوك يابابا ... مش عايزاه يعرف علشان ميفتكرنيش بلتمس  
اعذار ولا بستدر عطفه... يابابا شوف الفرق بينك وبينه... انت  
ضربتني اه بس سمعتنى بعدها... حسيت بحنيتك عليا وخوفك  
عليا... فارس شك فيا على طول وخوفى وارتباكى فسره بمزاجه هو  
وصدق تفسيره... انا شفت معاه ليلة من اسوأ ايام حياتى... ده فضل  
يضرب فيا كام مرة وبقسوة... ولما نمت م التعب والوجع اللى انا  
فيه صحانى يضربنى... فارس مبقاش فارق معايا ولا هو ولا عمو  
توفيق“

”فكرتى كويس يعنى“

”مفيهاش تفكير... انا اللى عايزة اتطلق منه... انا كنت مرعوبة منه  
مكنتش فاكرا ان فارس ممكن يبقى بالقسوة دى... ده انا حسيت ان  
ربنا بعتهولى بعد اللى حصل لى ده علشان يكون جنبى... انت  
متعرفش كان بيقول لى ايه يابابا عن سعاده وحبه ليا... كل ده راح  
ف لحظة... فارس المتعلم مفكرش للحظة انى ممكن اكون طبيعية  
واتهمنى... فارس خلاص بره حساباتى... وانا مستعدة للطلاق“

\*\*\*\*\*

ف بيت الجدة... المأذون موجود وقاعد معاه فؤاد

ايمان والجددة مع مايا ف الاوضة

الجددة"يا بنتى انا غلبت معاكى ليه مش عايزانى اقولهم... كفاية

انى السبب"

مايا"يا نينة كفاية الله يخليكى... خلاص مش عايزة افكر ف اللى

فات...ساعدونى انسى"

ايمان"خلاص ياماما سببها براحتها"

الجددة"مكنتيش عندي كده"

قامت الجدة وخرجت من الاوضة

راحت لفؤاد

"هما فين"

"كلمتهم وزمانهم نازلين"

دقايق ودخلت حياة وتوفيق وفارس

قعدوا بعد ما القوا التحية

توفيق بيبيص لفؤاد

فؤاد حط قدامه ظرف الفلوس

المأذون"نبتدى الاجراءات...فين الزوجة"

قامت الجدة نادى على ايمان ومايا

جت مايا...ماشية جنب ايمان وبتتجنب النظر لفارس

فارس لما شاف مايا... مقدرش يمع عينه م انه يتابعها لحد ما

قعدت جنب فؤاد

المأذون بيتكلم

فارس بيبص لمايا بعتاب ولوم وحزن

مايا بتبص ف لاشئ وهى متماسكة وبتحاول تشغل تفكيرها بعيد

تماما عن الموقف علشان متتأثرش

خلص المأذون اجراءاته ف اتمام الطلاق

ناولها الدفتر تمضى... مضت وقامت بسرعة على اوضتها

قامت ايمان وراها

فارس مضى ف الدفتر... لم المأذون اوراقه وقام

قام فارس بخطوات ثقيلة من الحزن

قامت حياة وتوفيق

الموقف صعب على كل الموجودين

وَفَضَلُوا كُلَّهُمُ الصَّمْتُ

\*\*\*\*\*

ايمان مع مايا ف الاوضة

مايا بتعيط ف حضن ايمان

”ما انتى اللى صممتى يا مايا“

”مش ندمانة... انا مديوحة“

\*\*\*\*\*

فارس ع السلم

”انا نازل“

توفيق”رايح فين... الحمد لله انك خلصت منها“

حياة”متزعلش نفسك يافارس ربنا يعوضك خير“

فارس مردش ونزل خرج من البيت خالص

\*\*\*\*\*

فارس خرج...وفضل ماشى وهو سرحان وبيفكر

”ايه الصلابة اللي كنتى فيها دى يا مايا... ازاي كلهم ساكتين

عليكى كده وكأنى انا الملام... بيداروا علشان حمزة.. طول عمرهم

بيحبوه ... الله يسامحك يا مايا... وجعتى قلبى وكسرتى فرحتى

... نفسى اكرهك مش قادر“

\*\*\*\*\*

فؤاد مع مايا والجدة بيتغدوا

فؤاد”مايا هتعملى ايه؟؟ هتيجى معايا... انا لازم اسافر علشان

شغلى“

مايا”لا يا بابا ... مش عايزة اسافر... انا معرفش حد هناك على الاقل

انا هنا مع نينة وعمتو ايمان... هناك صعب اوى“

فؤاد”طيب مش عايزة حاجة قبل ما اسافر“

مايا”شكرا“

فؤاد"مش عايزة تشتغلى... لو عايزة انا موافق"

مايا"بجد يابابا... يعنى ممكن توافق انى اشتغل"

فؤاد"ايوه... انتى كبرتى ولازم تواجهى الدنيا"

الجدة"وايه لازمة الشغل بس"

فؤاد"وليه لاء"

الجدة"احنا ناقصين... اللى ما اشتغلت وهى بنت هتشتغل وهى

متطلقة"

مايا بابتسامه تصنع اللامبالاة

"يعنى القفلة عليا حمتنى !!"

\*\*\*\*\*

مايا بتتكلم ف الموبايل

"ازيك يا عمتمو... منزلتيش ليه النهاردة... انا مستنياكى... لا انزلى

انتى... مش عايزة اطلع يكون حد م فوق نازل ولا حاجة... لا

مفيش جديد... ما تيجى نخرج شوية طيب... بقالى شهر وزيادة

مخرجتش وانتخقت اوى من البيت... بجد... طيب هلبس لحد

ماتنزلى"

\*\*\*\*\*

ايمان لابسة وقاعدة مع مامتها

"ماتيحي معانا ياماما"

“هتروحي فين الساعة دى”

“اهو نروح اى حتة نشم هوا”

“لا انا مش قادرة...متتأخروش بالليل”

خرجت مايا من اوضتها

“انا جاهزة ياعمتو”

الجددة“ابقى افتحى الباب بالمفتاح انا داخلة انام”

خرجوا ايمان ومايا... وهما بيقتلوا الباب الخارجى

نزل فارس من تاكسى قدام البيت

ايمان“وقفه يا فارس والنبي”

فارس للتاكسى“ثوانى لو سمحت”

قرب فارس عليهم...وهو بيبيص لمايا

“ازيك يا خالتى”

وقبل ما ترد عليه...سبقتهها مايا وركبت التاكسى وهى متجاهلاه

تماما

ايمان بترد على فارس

“ازيك يا فارس...سأله عليك يا حبيبي حياة قالت لى انك بقيت

بتقعد ف الشغل اوفر تايم وبتيجى متأخر”

“الله يخليكى ياخالتى... اعمل ايه مبقاش ورايا غير شغلى يمكن

ينسينى اللى حصل”



حاولت تتجاهل تلميحه

"طيب هروح انا علشان منوقفش الراجل اكثر من كده"

وسألها بعفوية

"رايحين فين"

"خارجين شوية كده... مع السلامة"

وقف فارس وايمان بتركب... وهو بيتابع التاكسى لحد ما مشيوا

\*\*\*\*\*

فارس ف اوضته... دخل له باباه

"عايزك ف كلمتين يا فارس"

"اتفضل يا بابا"

"انت مش هتشوف حالك بقى"

"اشوف حالى ازاي"

"تشوف عروسة بنت حلال وتخطبها وتتجوز... انت شقتك جاهزة

من مجاميعه"

"لا مبفكرش ف الجواز"

"يعنى ايه مبفكرش... حتى لو مبفكرش.. فكر"

"لا مش عايز اتجوز"

"انت هتخلى واحدة منحلة تعقدك... انت الف واحدة تتمناك"

"على الاقل مش دلوقتي يا بابا"

“لا انت لازم تتجاوز... لازم البت اللي تحت دى تعرف غلطتها  
وتندم عمرها كله على اللي عملته”  
وف محاولة للانهاء الكلام بهدوء  
“رنا يسهل بابا... لما ابقى الاقى واحدة مناسبة”

\*\*\*\*\*

الجدة داخلة بشورية اوضة مايا  
ايمان قاعدة جنبها ع السرير  
الجدة“انتوا اكلتوا ايه بره عمل ف البت كده”  
ايمان“تعشينا بس”  
الجدة“ادى اكل بره... البت مبتثبتش حاجة ف معدتها... تلاقى  
الاكل بايظ”  
ايمان“ما انا اكلت معاها محصلش حاجة”  
قامت مايا راحت ع الحمام  
الجدة“نجيب لها دكتور ولا ايه”  
ايمان“انا اديتها دوا كده يهدى معدتها شوية... لو معملش حاجة  
نوديتها لدكتور”  
رن موبايل ايمان  
“الو... ازيك يا حبيبتي”  
رجعت مايا م الحمام قعدت ف السرير تانى وعليها اثر الهبوط

ايمان بتكمل كلامها مع نسرین

”وبعدین قالک ایه؟؟ ما تیجی انتی یا نسرین... طیب هشوف

واکلمک...قولتيله على طلاقهم.. طیب کویس...مع السلامة”

الجددة”خیر مالها”

ايمان”كانت عند الدكتور وبيقولها احتمال كبير يولدها ف الاسبوع

الاولانى من التاسع”

الجددة”ليه”

ايمان”ضغطها بيعلى والدكتور خايف يسيبها”

الجددة”هى هتولد فين هنا ولا هناك”

ايمان”الدكتور اللى متابعة معاه هناك وعايزانى اروح لها”

الجددة”اه طبعاً روى لبنتك ماتسيبيهاش... هى قالت لجوزها ايه

على مايا”

ايمان”قالت اتخانقوا وف لحظة شيطان روى عليها يمينا الطلاق”

ايمان بتبص لمايا

”هتيجى معايا... ولا مش عايزة تكونى اول من يشيل ابن نسرین”

مايا”هاجى ان شاءالله بس اخف م اللى انا فيه”

\*\*\*\*\*

فى المستشفى...وقدام اوضة العمليات

ممدوح ومايا وايمان قاعدين مستنيين

خرجت الممرضة بالمولود وادته لايمان

"مبروك"

مايا"وهى؟"

الممرضة"شوية وهتخرج"

ايمان بتبص للمولود ويتوريه لممدوح

راحت مايا تبص عليه... ناولتهولها ايمان

مسكته وقربته منها تبوسه

"ماشاءالله جميل اوى"

وفجأة حست مايا بدوخة

ايمان شافتها وهى بتدوخ...مسكت المولود بسرعة

ايمان"الحقنى يا ممدوح"

\*\*\*\*\*

مايا بتفتح عيينها وهى ف سرير ف المستشفى

ايمان"خضيتينى عليكى"

ممدوح بضحك"يعنى اول ما تمسكى ابنى كنتى هتوقعيه كده"

مايا"حصل له حاجة"

ايمان"لا يا حبيبتي انا مسكته منك على طول"

ممدوح"انا هروح اقف عند العمليات...سلامتك يا مايا"  
مايا بتقوم"روحي يا عمتي اطمنى على نسرين"  
ايمان"خليكى... خلى البيبى جنبك هروح ابص عليها واجى"  
دخلت ممرضة"سلامتك...دراعتك لو سمحتى"  
مايا"ليه"  
ايمان"الممرضة اللى فوقتك كتر خيرها قالت لازم عمل تحاليل  
ونشوف سبب الاغماءة"

\*\*\*\*\*

ف اوضة المستشفى  
نسرين على السرير قاعدة وممدوح جنبها  
مايا قاعدة على السرير التانى...وايمان على طرف السرير والمولود  
ف حجرها  
دخلت الممرضة  
"نتيجة التحاليل طلعت يا مدام... واضح انك هتشرفيننا قريب"  
ايمان بعدم فهم  
"خير؟"  
الممرضة"خير... الاغماء كان من الحمل...مبروك"

## . 11 .

نسرین وایمان و مایا اتصدموا من اللى سمعوه  
بیبتادلوا نظرات الصدمة... نزلت دموع صامتة من عیون مایا  
ممدوح ببیص لهم باستغراب  
”ایه یا جماعه... مالکم المفروض تفرحوا... حاجة زى دى هتخلى  
المیاه ترجع لمجاریها بین فارس و مایا... مبروك یامایا“  
مایا بتحاول ترد مبتقدرش  
محدث فیهم عارف یتکلم ف وجود ممدوح  
مایا مسحت دموعها وهى بتفکر  
”هتصرف ازای“

\*\*\*\*\*

حیة قاعدة مع مامتھا ...  
”هو انتى معنتیش هتنزلى تقعدى معایا طول ما مایا هنا ولا ایه“  
”متزعلیش منى یاماما ... انا بقيت مش مسحتملة اشوفها بعد اللى  
حصل“  
”متظلمهاش یا حیة... دى بنت اخوكى وانتى مربیها و عارفة انها  
متعملش الغلط“

”واللى حصل ده ايه“

”اللى حصل ده كان بسببى“

”بسببك ازاي يعنى“

”الشيخ النيلة ربنا ينتقم منه مطرح ماراها...الهى ما يورد على

جنة“

”شيخ مين؟؟ مش فاهمة“

”فاكرة بعد ما امها ماتت كانت بتعيط على طول ازاي وبعدين خفنا

تكون محسودة ولا معمول لها عمل وروحنا للزفت يشوفها وقال

هيعملها جلسات“

”ايوه ايوه افكرت“

”منه لله قالى لازم الجلسة تبقى لوحدها وبعد ما خرجت نيمها

وعمل اللى عمله والبيت فضلت ساكتة كل ده وخافت تتكلم“

حياة وهى مش مستوعبة الكلام من صدمتها

”يعنى ايه... البت مظلومة“

”مظلومة يا حياة... وصممت فارس ميعرفش بعد اللى عمله فيها“

”يا عينى عليكى يا حبيبتي...ظلمناكى كلنا... بس اعمل ايه... ما

انا لو قلت لتوفيق وفارس مش هيصدقوا“

”متقوليش حاجة...هى مش عايزاهم يعرفوا حاجة وحلفتنا على

كده“

"انا موقفى بقى صعب اوى...هى صعبانة عليا وابنى صعبان عليا  
وكلامى مش هيغير حاجة"

"اللى فيه الخير يقدمه ربنا...خليكى ساكتة وخالص"

\*\*\*\*\*

ايمان داخله الاوضة اللى فيها مايا ف بيت نسرين  
"انتى لسه منمتيش"

"لسه...بفكر ف اللى بيحصلى ده ومش عارفة اعمل ايه"  
"مفيهاش عمائل يا مايا... لازم فارس يعرف كل حاجة"  
"لا"

"لا ايه... انتى قلتى لاع الموضوع التانى ووافقناكى... انما دى  
حاجة متستخباش يا مايا... دى كلها كام شهر وهتتعرف...يمكن  
لما يعرف ينسى اللى فات وترجعوا لبعض"  
"رجوع مش راجعة له يا عمتى... بعد اللى حصل منه مش عايزاه  
تانى ابدأ وقلت قبل كده"

"واللى ف بطنك؟"

"معرفش"

"اوعى تفكرى تنزليه ده حتى.."

مايا تقاطعها بسرعة



”لالالا... نزول لا طبعاً... انا طول عمرى لوحدى وده اللى هيكون  
ونسى وسندى ف الدنيا... اقولك سر ياعمتى“

”قولى يا حبيبتى“

مايا وهى مبتسمة وبتمسك بطنها  
”لما عرفت انى حامل... اتصدمت ف الاول شوية بس فرحت بعد  
كده...بعيدا عن فارس خالص وايا كان رد فعله...اللى ف بطنى  
ابنى وربنا عوضنى بيه عن كل الى شفته ف حياتى... مستنياه  
بيجى من دلوقتى“

”ربنا يكملك على خير يا حبيبتى... انا مقلتش لاما وعابزاكى  
تفرحيها“

”لما نرجع نبقى نقولها... احنا هنرجع امتى“  
”بعد السبوع بيومين كده تكون نسرين شدت حيلها شوية بس“  
”انا هتصل بابا اقول له“

\*\*\*\*\*

حياة بتحط صينية الشاى قدام توفيق ويتقعد  
حياة”الشاااااى يا فارس“  
جه فارس وقعد معاهم  
توفيق”بقولك ايه يا فارس... انا كلمت شكرى صاحبى هنبقى نروح  
نزورهم الاسبوع الجاى...يناسبك يوم ايه علشان نروح لهم؟“

حياة بتبص لفارس... مترددة تتكلم وتحكى لا تسكت... خوفها من  
توفيق خلاها تسكت

فارس "نزروهم ليه؟؟ مش شكرى ده صاحبك يا بابا"  
توفيق "بنته الصغيرة حلوة ومؤدبة وانا كلمته اننا عايزين نخطبها"  
فارس بنرفة "ليه كده يابابا... انا قلت مش عايز لا اخطب ولا  
اتجوز"

حياة بتبص لهم بقله حيلة ومش قادرة تقول رأى  
توفيق "انا خلاص اتكلمت مع الراجل... انت عايز تصغرني...  
شوف لما مشيت بدماغك ايه اللي حصل"  
فارس "خلاص بقى يابابا مش كل شوية تفكرني باللي حصل"  
توفيق "لازم تتجوز واحدة احسن منها... انت هتفضل قاعد كده ولا  
تكون فاكرك هترجع لبنت خالك"  
فارس وهو داخل اوضته  
"مش عايز اتجوز لا بنت شكرى وبنت خالى"

\*\*\*\*\*

فى سبوع المولود... بعد كل الناس ما مشيوا  
مامة ممدوح وخالته قاعدين... مع ايمان ونسرین ومايا وممدوح  
ام ممدوح "عقبالك يا مايا ربنا يكملك على خير"  
مايا "شكرا يا طنط"

مامة ممدوح "ربنا بيحبك اهو رزقك بالحمل علشان ترجعى لجوزك"  
خالة ممدوح "ترجع لجوزها؟؟؟ هو فيه حد يسيب القمر ده"  
ام ممدوح "دى عروسة يا حبة عيني والشيطان دخل ما بينهم اتطلقوا  
قبل ما يكملوا شهر"  
حست ايمان ان الكلام ده ممكن يضايق مايا... فغيرت الموضوع  
ايمان "قوليلي يا فاطمة صحتك اخبارها ايه"  
خالة ممدوح "اهو الحمد لله على كل حال... رايحة اعمل عملية كمان  
اسبوعين ف مصر"  
ايمان "جاية امتى... امانة عليكى تكلميني علشان اجيبك"  
ام ممدوح "انا جاية معاها ان شاء الله... والمفروض نروح قبل العملية  
بيومين"  
ايمان "خلاص ... هستناكوا تيجوا تقعدوا عندى... لحد ما تخف  
وتقوم بالسلامة"  
ام ممدوح "ربنا يخليكى يا ايمان... مش عايزين نتعبك"  
ايمان "تتعبونى ايه... ده انتوا هتونسونى"

\*\*\*\*\*

ايمان ومايا داخلين بيسلموا على الجدة  
الجدة "طمونى نسرين عاملة ايه... ابنها حلو؟؟؟ شبه مين"  
مايا "استنى يا نينة هوريهولك"

وطلعت مايا موباييلها..وجابت صورة المولود  
مايا"اهو...صورتهولك كام صورة علشان تشوفيه براحتك"  
الجدة بتتنفرج على الصور  
"يا حبيبى...عسل وسكر ربنا يبارك فيه ويخليهولها"  
ايمان"يارب يا ماما...خلاص كبرنا وبقيت جدة"  
الجدة"يا ختى يا ايمان... ده اعز الولد ولد والولد"  
ايمان وهى بتبص لمايا  
"وفؤاد كمان هيبقى جد قريب...هو وحياة"  
الجدة بتبص لمايا وايمان بعد فهم  
"بتقولى ايه؟"  
ايمان"مايا حامل ياماما"  
الجدة"والنبى؟؟ يا الف بركة...ربنا يهديك يافارس ويهدى سرکم  
يارب"  
مايا "هو ليه كل الناس فاكرة ان الحمل ده هيرجعنى لفارس...مين  
قال اصلا انى عايزة ارجعله... ومش لازم يعرف كمان"  
ايمان"تانى...مش قلنا دى حاجة متستخباش"  
مايا وهى داخله اوضتها بتعييط  
"لو عرف هيفتكرنى بقول كده علشان عايزة استعطفه"  
ايمان ومامتها قاعدين بعد مايا ما دخلت اوضتها



توفيق بزعميق "ايه ايه ايه ... حامل ازاي يعنى"  
الجددة وهى بتبص له بحدّة  
"واحدة وواحد اتجوزوا وهى حملت... هيبقى ازاي"  
توفيق "هو حصل حاجة بينهم علشان تحمل؟"  
الجددة "ايه يافارس... حصل حاجة بينكم ولا محصلش"  
فارس واقف من ساعة ما سمع الخبر ساكت ومصدوم  
لما اتسأل معرفش يرد  
توفيق "روحي اسألها الحمل ده منين... ولا تسألها ليه انا نازل لها  
اشوف هتفضل مستغفلانا لامتى؟"  
واندفع توفيق ناحية الباب... ووراه حياة  
"استنى يا توفيق... استهدى بالله"  
ووراه فارس والجددة"

\*\*\*\*\*

مايا ف اوضتها بتطلع هدومها من الشنطة تحطها ف الدولاب  
سمعت صوت توفيق بيصرخ  
"ماياaaaaaaaaaaaaaaaaaaaaa"  
واصوات ايمان وحياة  
ايمان "فى ايه"  
حياة "اهدا يا توفيق"

خرجت مايا من الاوضة

اول ما شافها

"ايه اللي بيقولوه ده"

مايا بتبص لجدتها وايمان باستغراب مش عارفة انهم قالوا

ايمان "ايه ياتوفيق... بنقول مايا حامل"

توفيق "من مين ان شاء الله"

وصرخت فيه مايا

"من مين يعنى ايه... انا استحملت منكم كتير اوى... حامل من

فارس"

توفيق "ازاي ومحصلش بينكم حاجة"

مايا "اسأله"

توفيق بيص لفارس اللي واقف ساكت تماما

فارس "مرة واحدة بس... بس مش معقول يكون حصل حمل... قولى

الحقيقة يا مايا... الحمل ده من مين؟؟"

مايا بتصرخ "منك... بس هيبقى ابني لوحدى يا فارس... اوعى تفتكر

بالحمل ده انى عايزاك ولا عايزة ارجعلك"

توفيق "واحنا مش مصدقين انه من ابننا... احنا نعرف مينين طول

الفترة اللي فاتت دى بتعملى ايه... مين يصدق ان انتى يطلع منك

كل ده"

ايمان"كفاية بقى ظلم ف البيت... فارس... مايا اغتصبت من سنتين  
ومقدرتش تقول ولا تتكلم وانت نفسك مديتهاش فرصة تسمع "  
مايا بتصرخ"بس يا عمتى... بس بقى كفاية حرام عليكم"  
راحت جدتها اخذتها ف حضنها  
"حرام تظلموها انت وابوك... انت عارف كويس اوى يا توفيق انها  
لاكانت بتخرج ولا بتروح ف اى حطة لوحدها... ومن ساعة ما  
اتخطبت لفارس مكنتش بتروح ف حطة من غيره"  
مايا وهى ف حضن جدتها ويتمسح دموعها  
"انا حامل ف ابنى... ومش هياخد منك غير اسمك وبس"  
توفيق"ولا اسمه حتى"  
مايا بتحدى"بينى وبينك ال DNA يا بشمهندس"  
دخلت مايا اوضتها...والجدة وايمان واقفين  
ايمان"ايه يا فارس...مالك ساكت كده؟؟ انت لسه بتشك فيها"  
فارس"انا مبقتش فاهم حاجة يا خالتي... اغتصاب ايه ومن مين  
وازاى وامتى "

\*\*\*\*\*

فارس ف اوضته... واقف شوية ويقعد شوية  
محтар ومش قادر ياخذ قرار  
دخلت له حياة



"ايه فارس... مالك"

"كل اللي سمعته النهاردة مبرجلنى...مخلىنى مش قادر استوعب"

"كل اللي حصل ده"

"مايا مظلومة يا فارس... اتسرعنا ف الحكم عليها"

"يعنى ممكن يكون الحمل ده منى صحيح؟"

"ليه لأ؟"

"من يوم واحد جواز؟...مش مقتنع"

"هو ايه البتاع الانجليزى اللي قالت لك عليه"

"قصدك DNA ؟"

"انا عارفة..باين "

"ده تحليل يتعمل يؤكد اذا كان ابنى ولا لأ"

"بدل هى واثقة اوى كده...تبقى هى صح"

دخل عليهم توفيق

"مالكم بتتوشوشوا على ايه"

"حياة"ولا حاجة بنتكلم... الواد اكيد ابن فارس يا توفيق"

توفيق"حتى لو ابنه هنعمل ايه يعنى"

فارس بمشاعر مختلفة...حنين لحلمه القديم ف انه يكمل حياته

مع مايا ويكونوا اسرة

"ابنى"

توفيق"بقولك ايه... انت ايش دراك ان كلامهم حقيقى ومبيداروش  
عليها"

فارس"احنا مخطوبين سنة وقبلها ٦ شهور رجعت فيهم من السفر  
كانت مايا قدامى ومبتخرجش الا معايا او مع نينة او خالتي"  
توفيق"لما تبقى تخلف نبقي نشوف التحليل هيقول ايه... وف كل  
الاحوال انا قلت لشكرى خلاص اننا رايعين لهم يوم الجمعة"  
فارس"بس يابابا"

توفيق"ايبييه... هتصغرني وتطلعني عيل قدام الراجل ولا ايه؟"  
فارس"لا العفو يا بابا...مقدرش اصغرك"

## . 12 .

### فارس قاعد فى اوضته

”مايا... معقول... والكلام اللي قالوه ده صحيح... معنى كده ان حمزة برئ ومغيش بينها وبين حمزة غير اللي كنا شايفينه كلنا... خوفها يوم الفرح ده كان ليه لو هى فعلا مظلومة... ليه سكتت لحد ما كل ده حصل... بس صحيح كلام خالتي صح... هى لا بتروح ولا بتيجى لوحدها... انا ظلمتها لما شكيت فيها... مش معقول تكون كانت بتخدعنى كل ده... مايا اللي متربية قدام عينى متعملش كده... والحمل.. ليه لأ... لو مكنتش متأكدة مكنتش اتكلمت بالثقة دى... هو ينفع؟؟“

\*\*\*\*\*

فارس راجع من شغله... واقف ف مدخل عمارة  
بيقرا لافتات كتير... ويبطلع لعيادة دكتور امراض نساء وتوليد  
فارس قاعد محرج ف العيادة اللي كلها ستات  
بيجى عليه الدور... يدخل للدكتور  
الدكتور ”اهلا وسهلا... اتفضل“  
فارس بارتباك ”شكرا... انا جاى بس استفسر عن حاجة لو ممكن“  
الدكتور ”اتفضل“

فارس بيحاول يجمع الكلام

"انا اتجوزت من شهر ونص... تانى يوم حصلت ظروف ف العيلة

واضطريت اسافر ... لما رجعت عرفت ان مراتى حامل.... انا بس

عايز استفسر هو ده ممكن"

"ممكن من ناحية ايه؟؟ قصدك انكم قضيتوا مع بعض يوم واحد

يعنى"

"بالظبط كده"

"مش كانت فيه علاقة زوجية"

"ايوه كان فيه مرة... انا عايز اتأكد ده ممكن يحصل؟"

"اه طبعا ممكن يحصل... وممكن يحصل حمل من علاقة خارجية

... هى الحاجات دى قليلة بس بتحصل ومش مستحيلة"

فارس بارتياح "شكرا جدا يا دكتور"

الدكتور "العفو... ان شاءالله تبقى تجيب المدام نطمئن على صحتها"

فارس "ان شاءالله"

\*\*\*\*\*

مايا قاعدة مع جدتها وايمان

ايمان "مكلتيش حلو النهاردة يا مايا"

مايا "والله ما ليا نفس... لما اجوع هاكل"

الجددة "يا بت ده انتى المفروض تاكلى الطاق طاقين"

مايا بتضحك"ليه يعنى يا نينة حامل ف وحش"

الباب بيخبط...تقوم ايمان

الجدة"مين اللى قفل الباب بس "

مايا"انا قفلته من شوية"

تفتح ايمان...تلاقى فارس

"ازيك يا خالتى"

اول مايا ما تسمع صوته وتشوفه...تقوم

يدخل فارس

"استنى يا مايا... انا جاى لك"

وقفت مايا

"وجاى ليه.... كلامنا خلاص خلص...جاى تشكك فىا تانى"

دخل فارس وقف قدامها

ايمان والجدة بيتابعوا كلامهم بترقب

"انا جاى اتكلم معاكى يا مايا... انا مبشككش ان اللى ف بطنك ده

ابنى"

ايمان"اسمعيه يا مايا...اتكلموا"

مايا بعصية"وهو ليه مسمعنيش الاول.... تحب وانتي بتقولى

اسمعينى انزل فيك ضرب اخليك مش عارف ولا قادر تتكلم...

تحب وانت بتقولى اسمعيني ارمى عليك كل الاتهامات البشعة اللي  
ممکن تتخيلها”

فارس ”اهدى يا مايا... مش كويس عليكى العصبية دى...لو  
سمحتى نتكلم بهدوء”

ايمان”تعالى ياماما اما نعملهم عصير ولا حاجة... فارس انت اكيد  
متغديتش... اجيبلك تاكل”

فارس وهو بيقتعد بعد مايا ما قعدت  
”لا يا خالتي شكرا”

راحوا ايمان والجدة المطبخ

الجدة”ربنا يهدى سرهم يارب”

ايمان”يارب ياماما...يمكن لما يتعاتبوا يتصالحوا”

مايا قاعدة وفارس قاعد قدامها

هى بتتجنب تبص له وهو بيبص لها

”ليه محكتيليش... سنتين ساكنة ليه”

”اتهام برضه مغيثش فايده”

”مش اتهام والله...انا عايز افهم...ليه تسكتى كل ده”

”اقول لمين؟؟ مكنش حد جنبى خالص... تفتكر لو كنت روحت

قلت لباباك حصلى كده كان هيعمل ايه”

”حصلك كده من مين وازاى”

”مش عايزة افتكر...الله يخليك سيبنى ف حالى“

”اسيبك ايه يامايا... انتى حبيبتي وام ابنى“

واتنرفزت مايا

”اوعى تفتكر انى ممكن انسى اللى عملته فيا“

”اتسرعت يا مايا... غلطت وانتى غلطتى“

”بتحملنى مسئولية حاجة مليش ذنب فيها... انت متعرفش انا

مريت بايه من ساعة اللى حصلى... لا من قبل ما يحصلى... انت

متعرفش حاجة خالص... كل اللى فكرت فيه انى وحشة وبس“

كانت بتتكلم وعى بتعيط

قرب منها...قامت بسرعة

”انت عايز منى ايه يا فارس...مش خلاص عرفت كل حاجة...“

سيبنى بقى“

فجأة دخل توفيق...والباب كان مفتوح

توفيق”انت بتعمل ايه هنا؟“

جت ايمان ومامتها على صوت توفيق

الجددة”ايه يا توفيق هتمنعه يبجى عندى“

توفيق”لا انا خايف تضحك عليه تانى... كفاية اللى حصلنا من

تحت راسها“

فارس "بابا... مايا ام ابني وبننت خالي ومهما حصل مش هقاطعها"

توفيق "يعنى ايه"

فارس "يعنى انا غلطت لما اتسرعت... اللى حصلها ده مش بايدها"

توفيق "نسيت انها ضحكت عليك"

مايا بتعيط...

"اضحكى عليه بدمعتين... اوعى تفتكرى انه ممكن

يرجعلك... فارس خلاص هيخطب "

مايا بعصية "يخطب ولا يعمل اللى هو عايزه... انا مالى بيه"

فارس "لا يا مايا مش هخطب... مش هتجوز يا بابا... انا محبتش

ف حياتى غير مايا"

مايا "وانا مش ممكن ارجعلك يا فارس بعد اللى حصل منك"

توفيق "ماتبوس رجلها احسن... طول ما هى شايفاك كده لازم تتفرعن

اكثر واكثر"

مايا حسنت بهبوط... والدنيا كلها بتلف بيها

\*\*\*\*\*

مايا بتفتح عينيهما

ايمان جنبها ع السرير... فارس والجدة واقفين

ايمان "الحمد لله فاقت"

فارس "اجيب دكتور يا خالتى"



مايا بتعيط"قوليله يمشى ياعمتى... ومش عايزة اشوفه... خليه ملوش  
دعوة بيا"

الجددة"جرى ايه بس يامايا... متزوديهاش بقى"

ايمان قامت من جنبها... اخدت فارس من دراعه وخرجت

"اطلع انت يا فارس دلوقتى... كفاية "

"هى بتعاقبنى على ايه... انا اول ما فكرت بعقلي بعد ما هديت

جيت اعتذر لها... ليه بتعمل معايا كده"

"اللى حصلها مش شوية برضه... وابوك كل ما بيشوفك هنا بيتعفرت

ويقول كل زى السم... انا هبقى اطمنك عليها"

"انا هطلع... بس فهميها ان علاقتنا لا يمكن تنتهى... اللى بيننا

مكنتش ورقة جواز انتهت بورقة طلاق... فهميها ان اللى بيننا اكبر

بكتير من اى حاجة... لو هتنسى كل اللى فات مش ممكن تنسى

ان هيبقى بيننا ابن لا يمكن يستغنى عن حد فينا"

ايمان وهى متأثرة بكلامه... بتطبطب على كتفه

"حاضر يا حبيبي... حاضر"

"وفهميها انى لا هخطب ولا اتجوز ولا اقدر احب غيرها"

\*\*\*\*\*

فارس داخل البيت... حياة راحت له

"مايا عاملة ايه"

“فاقت بس مرضتش تخلينى اجيب دكتور”

“ابوك ع اللى عامله... ومخلائيش انزلها”

توفيق بييجى من جوه

“خلاص... عملت حركتين سهوكة علشان تبلفك”

“يا بابا اظمن... مايا مش طايقة حتى تشوفنى”

“هى بتتأمر على ايه... هتعرف مقامها كويس لما تلاقيك اتجوزت

احسن منها”

“بابا... حضرتك مش عايز تفهمنى ليه... انا قلت هاجى معاك بس

مش هخطب حد”

“يعنى بتضحك عليا”

“لا... من اول ما فاتحتنى ف الموضوع ده وانا قلتك لأ.. حضرتك

اخذت معاد... ماشى ممكن اجى وكل حاجة علشان الاحراج... انما

مفيش حاجة هنتم... ولو اضطريت انى اقول الكلام ده لصاحبة

الشأن هقوله”

“يعنى كنت ناوى تخرجنى”

“انا مغيرتش موقفى... انا امبارح كنت ف حالة مش طبيعية من

صدمتى من خبر الحمل... اخر حاجة كنت اتوقعها... وكملت

صدمتى بمعرفة حقيقة اللى حصل لمايا... حتى لو مرجعناش لبعض

انا مش عايز اتجوز”

دخل فارس اوضته  
توفيق واقف متغاط  
"شايقة ابنك... بغيظنى"  
"دلوقتى انا عايزة افهم...ايه اللى مسربعك كده على انه يتجوز"  
"مش عايزه يرجع لها"  
"وهو قالك مش عايزة ترجع له...سيبه بقى"  
سكت توفيق...وكملت حياة  
"هنزل لماما"  
"انا مش قلت لأ"  
"يا غلبى من اللى انا فيه"  
"انتى هتندبى لى...انزلى"

\*\*\*\*\*

مايا ف اوضتها...اتفتح الباب...دخل فؤاد  
مايا بتقوم بفرحة  
"باباااا"  
فؤاد"خليكى مرتاحة... عاملة ايه يامايا"  
فؤاد بيحضرها وهى على السرير ويقعد جنبها  
"حمدالله ع السلامة...ايه المفاجئة الحلوة دى"  
"حبيت افاجئك مفاجأة كبيرة غير كل مرة"

”فزورة دى ولا ايه“

”مش فزورة ولا حاجة... المرة دى مجييتى مختلفة شوية“

”ازاى“

”المرة دى راجع على طول“

”مايا بفرحة“ بجد يا بابا“

فؤاد”اه بجد طبعاً... انا من ساعة ما سافرت وانا كنت اخذ

القرار... انا صفيت كل شغلى هناك ولما عرفت بحكاية حملك دى

أتأكدت ان ده القرار المناسب... هنفضل مع بعض على طول ان

شاءالله... ومش هتبقى لوحدك تانى“

فرحت مايا... فرحتها كبيرة... حضنت باباها

”احسن حاجة يا بابا انك هتبقى جنبى على طول“

”ومحتاجك تبقى جنبى انتى كمان“

”ما انا معاك اهو“

”مش كفاية... بعد ما صفيت شغلى هناك لازم ابدى هنا شغل

جديد ومحتاجك معايا كتف بكتف“

مايا وهى بتمسك بطنها

”بس دلوقتى يعنى“

”لما تقومى بالسلامة ان شاءالله... ولو قدرتى تتابعى حتى كل فترة كده باريت“

\*\*\*\*\*

مايا ف بيت ايمن... ومعاها نسرين وابنها

"احلى حاجة عملتيها انك جيتى مع حماتك"

"اسكتى ده انا قعدت اقول لممدوح مامتك وخالتك هيتكسفوا يروحوا

عند ماما لوحدهم لازم اكون معاهم...وقلت لحماتى انى عايضة اجى

معاهم...وطبعا ممدوح عنده شغل ومش عايزنى اسيبه واسافر بس

مامته اقنعتة وسابنى اجى"

"كويس انك جيتى...عارفة يا نسرين...حاسة ان كل حاجة

هتبتدى تتصلح"

نسرين وهى بتغير لابنها

"ازاى"

"بابا اللى طول عمرى محرومة منه جه يعيش معايا... الخوف اللى

كنت فيه خلاص قدرت اتخلص منها... ثقة بابا فىا انه عايزنى

اشتغل معاه ادتنى ثقة ف نفسى... واحلى حاجة هى ابنى اللى

بيتكون جوايا"

"وفارس يا مايا؟"

"ماله فارس"

"مجبتيش سيرته مع انه اعتذرلك"

"واجيب سيرته ف ايه"

"مش ناوية تسامحيه زى ما سامحك"

”ربنا يسامحننا كلنا“

”يعنى ايه“

”يعنى خلاص اللى حصل حصل وانا مبقتش عايزة احب ولا اتحب  
ولا حاجة من دى“

”ليه... انتى محبتيش فارس؟“

”حبيته اوى يا نسرين... وعلشان حبيته كنت حاطة امل وراسمة ف  
خيالى صورة معينة ليه... تخيلت انى لما هحكيه هيططب عليا  
ويهون عليا اللى حصلى... اتفاجئت بواحد تانى معروفش.. وحش  
يا نسرين معروفش... انا اخاف يتقفل علينا باب تانى  
ابدا... معنديش ثقة فيه خلاص واستحالة افكر ف رجوعى ليه“  
”وابنكم“

”انا بقعد اقوله ابنى لوحدى والكلام ده بس انا اكيد مش هحرمه من  
ابنه ولا احرم ابنى منه... انا اتربيت مفارقة وعارفة كويس اوى  
الحرمان من الام او الاب بيعمل ايه“

”ربنا يهدى... هو صحيح هيخطب... ماما قالت عمو توفيق قال كده“  
”عمو توفيق... طول عمرى عارفة ان شديد بس عمرى ماتخيلت انه  
قاسى كده... معرفش بيعاملنى كده ليه... كل ما يشوفنى يرمينى  
بكلام زى الزفت... وده سبب تانى يخلينى اخاف واقول استحالة  
ارجع لفارس... اما حكاية يخطب ولا ميخطبش... هو حر بقى“

”شكلك زعلتى“

”سيبك من السيرة دى ... كلميهم وشوفى عملوا ايه“

\*\*\*\*\*

فى المستشفى... خالة ممدوح على السرير

وايمان وحماة نسرين معاها ف الاوضة

بره الاوضة...قاعد فؤاد مع نادر ”ابن الخالة“

”تعبناكم معنا النهاردة...متشكر اوى“

”لا متقولش كده يانادر احنا عيلة واحدة“

خرجت ايمان من الاوضة... وقعدت معاهم

فؤاد”ايه يالا؟؟“

ايمان”اه...وهاجى لهم الصبح ان شاءالله“

نادر”طيب اتفضلوا اوصلكم قبل ما اروح الاوتيل“

فؤاد”اه صحيح مكملائناش كلامنا... انت تيجى تتعشا معنا ونتكلم

شوية ايه رايبك“

نادر”مفيش مانع... انا كمان عندى كلام عايز اخذ رأيك فيه“

### فؤاد بيفتح الباب الخارجى

ومعاه ايمان ونادر

ايمان "اتفضلوا عندى فوق"

ايمان سابقاهم... فؤاد هيقف عند شقة مامته

فؤاد "لا احنا هنتعشا هنا... زمان ماما نامت تعالى اعمليلنا العشا يا

ايمان"

ايمان "حاضر"

فؤاد بيفتح شقة مامته

"اتفضل يانادر"

يدخلوا ويسيبوا الباب مفتوح

تدخل ايمان ع المطبخ... تتصل من موبايلها

"الو... انزلى لى يامايا انتى ونسرين بسرعة... يالا متتأخروش"

\*\*\*\*\*

نسرين نزلت شايلة ابنها ومعها مايا

دخلوا

نسرين "نادر!! اهلا وسهلا... طنط عاملة ايه"



نادر بيقوم يسلم "اهلا يا نسرين ازيك... الحمد لله انا مشيت وكانت  
لسه خارجة من العمليات... بس الدكتور طمنى"  
نادر واقف... خلص كلامه مع نسرين  
مايا واقفة فهمت من الكلام يبقى مين  
فؤاد "تعالى اقعدى يامايا... مايا بنتى"  
مايا "اهلا وسهلا"  
نادر وهو ببسلم عليها  
"تشرفنا"

\*\*\*\*\*

فارس داخل البيت... مستغرب العربية اللي واقفة قدام الباب  
فتح الباب الخارجى ودخل  
وهو طالع ع السلم... شاف الباب مفتوح  
وشاف مايا وفؤاد ونسرين قاعدين مع شخص غريب  
اللى لفت انتباهه هو متابعة مايا باهتمام للشخص اللي بيتكلم  
وواضح ان كلامه بيتوجه ليها  
استغرب... وقف لحظات... اتضايق من وقوفه كده  
كمل طلوع للبيت وهو بيفكر  
"مين اللي قاعد مع مايا وخالى ده"

\*\*\*\*\*

مايا وهى قاعدة بتسمع نادر  
"الموضوع اللي كنت عايزك فيه يا استاذ فؤاد... هو انى بفكر افتح  
فرع للشركة هنا.. انا بشتغل مع مراتى ف شركة السياحة بتاعتها  
ف تركبها... وكنت بفكر افتح فرع ليا هنا... بس بصراحة لقيت  
التكلفة عالية عليا لوحدى وبما انك كنت بتفكر تعمل بزنس هنا فانا  
بعرض عليك الشراكة"  
فؤاد بتردد "مفيش مانع... ايه رأيك يامايا"  
مايا بتفكر "مش عارفة يابابا... رأيك اهم"  
فؤاد "انتى هتبقى معايا ولازم رأيك"  
نادر ببص ف الساعة  
"الوقت اتأخر... انا متشكر ع العشا وحضرتك فكر براحتك يا استاذ  
فؤاد ورد عليا... استأذن"

\*\*\*\*\*

فارس داخل البيت وهو سرحان  
"مين ده اللي قاعد معايم تحت"  
قعد على اقرب كنبه من غير ما يفتح النور  
ماسك ميدالية المفاتيح باديه الاتنين وبيشد فيها بعصبية  
سمع صوت عربية بتدور... قام بسرعة يبص من الشباك  
شاف العربية اللي واقفة قدام البيت وهى بتتحرك

وايد اللى بيسوقها بيشاور لحد جوه البيت  
قفل الشباك بعصبية ووراح ع الباب... وخرج

\*\*\*\*\*

فؤاد راجع بعد ما وصل نادر

دخل قعد معاهم

"ايه رأيك يامايا ف اللكلام اللى قاله نادر"

مايا"لازم نفكر كويس الاول يابابا ومنتسرعرش... ونظمن برضه على

شغله هناك... ماشى كويس وصادق ولا كداب... سورى يا نسرين

بس مبقاش عندى ثقة ف حد"

نسرين"الحق ميزعلش وانا اعرفه عادى بس معرفش طريقة

شغله... فكروا بعيد عن قرابته لممدوح"

دخل فارس فجأة... بيحاول يهدى عصبيته

ايمان"فارس... تعالى مالك؟؟"

مايا شافته... قامت تدخل اوضتها

وقبل ما تدخل

"مايا... مين ده اللى كان هنا"

التفتت له مايا... وهى بتبص لبابها

فؤاد"فى ايه يا فارس"

فارس بيحاول يتحكم ف عصبيته وبيوطى صوته



مايا وكل ذكرياتها السيئة مع فارس ف الليلة المشؤومة بقت قدام  
عينيهـا... عيطت

”ابعد عن حياتي خالص يا فارس... كفاية اللي حصل لى منك ومن  
غيرك... انا كل ما احس انى اتقدمت خطوة وبقيت كويسة تيجى  
انت ترجعنى ١٠٠ خطوة لورا... سيبنى ف حالى بقى“  
تقعد وهى بتعيط... ايمان تقعد جنبها وتحضنها  
”بس يامايا... محصلش حاجة لده كله.. مش كويسة العصبية دى  
علشانك“

فارس بيحاول يدافع عن نفسه  
”انا عملتلك ايه يامايا... انتى بتحملينى ذنب اللي حصل ليا  
لوحدى ليه... وانتوا كلكم حاسين بيها ومحدث حاسس بيا ليه...  
انت نفسك ياخالى لحظة ما اتصدمت اتصرفت ازاي... بتلومونى  
لوحدى ليه“

محدث بيرد عليه... مايا بتعيط... فارس صوته مخنوق  
كامل كلامه

”خلاص... خلاص كده... استريحى اوى يا مايا... اعملى اللي  
يريحك... دوسى عليا اوى علشان غلطة غلظتها مش عايزة  
تسامحينى عليها... رغم ان غلظتك انا سامحتك عليها وجيت  
اراضيكى“

مايا وهى بتعيط"وهى دى المشكلة اللى بيننا...انك بتحملنى غلطة  
معملتهاش"

فارس"غلطتك انك خبيتى عليا وفاجئتيني... وانا فعلا غلطان انى  
سامحتك عليها"

خرج فارس من البيت...

طلع السلم وهو متضايق... وصل للسلم اللى بين شقتهم وشقة  
ايمان...قعد على السلم...ومسح دموعه اللى نزلت من كتر حبه  
وغيرته على مايا...اللى بتقابلهم بكل قسوة

\*\*\*\*\*

خلال الشهرين التاليين

فاتت الايام على مايا... وهى بتشغل نفسها بالتفكير ف المشروع  
الجديد... كانت اغلب المقابلات بين فؤاد ونادر بره وكلام عام عن  
المشروع لقصر فترة الاجازة اللى جاى فيها...ومكنتش بتحضرها مايا  
لتعبها ف شهور الحمل الاولى

نسرين ترجع بيتها مع حماتها وخالة ممدوح بعد ما يتم علاجها  
حياة علاقتها مازالت متوترة ببيت مامتها  
ومش عارفة تراضى مامتها ولا توفيق وبتحاول تكون ع الحيا

توفيق مخاصم فارس من بعد ما رفض انه يخطب...ومستنكر ضعف  
شخصيته - من وجهه نظره - قصاد مايا  
فارس ومن بعد اخر مرة اتكلم فيها مع مايا... وهو حس انه بيقلل  
من كرامته بحبه ليه... ندم على محاولته ارضائها وقرر انه  
هيتجنبها تماما... شعوره بالندم مع خصام باباه ليه... حسسه انه  
مبقاش مرتاح لوجوده قريب منهم

\*\*\*\*\*

فؤاد داخل من بره بيتكلم ف التليفون  
مايا قاعدة مع جدتها  
"هقولك يا نادر واشوف هينفع ولا لأ... لازم نسأل الدكتور الاول...  
اه مايا اهي معاك"  
وشاور لمايا  
"نادر عايز يكلمك"  
اخذت مايا التليفون من فؤاد  
"الو... الحمدلله... اه كويس وبابا بدأ يدور على مكان مناسب...  
ييجي؟؟... اه عندي ايميل بس من زمان مفتحتوش ونسيت  
الباسورد... اه ممكن اعمل واحد جديد... طيب ابعته ف مسدج  
على تليفون بابا... ان شاءالله... مع السلامة"

قلت مع نادر..وبصت لبابها وهي بتديله التليفون

”بيقولى هتيجوا؟“

”اه مصمم اننا نروح له تركيا فانا قلت له لازم نسأل الدكتور الاول“

”هو عايزنا ليه“

”بيقول نشوف الشركة هناك ونظام الشغل“

ورن الموبايل بنعمة رسالة

”اكيد ببيعت ايميله... بيقولى عايز ايميلى علشان يكون اسهل ف

الشغل“

”طيب... وايه رايك ف السفر“

”لو الدكتور قال اسافر نسافر...لو قال لا سافر انت يابابا ولما تيجى

تبقى تقولى عملت ايه “

”طيب... ابقى قولى لعمتك تروح معاكى للدكتور علشان تسألبيه ع

السفر“

”انا كده كده معادى معاه بكرة ورايحين له“

”انتى وصلتى للكام“

”ف اول الخامس“

”والدكتور بيقولك ايه على التعب اللي انتى فيه ده“

”بيقول عادى“

\*\*\*\*\*



فارس خارج من اوضته قعد مع باباه ومامته

توفيق اول ما شافه... قام

"بابا لو سمحت عايز اتكلم معاك"

توفيق "نعم"

فارس "ياريت متزعلش منى... مكنتش اقدر اروح اخطب واحدة وانا

مش عايزها... حرام اظلمها معايا"

توفيق "واللى انت عايزها مينفعش ترجع لها"

حياة "استغفر الله العظيم يارب... احنا ايه اللى جرالنا بس"

فارس "اطمن يا بابا... انا خلاص عارف ان ميقاش ينفع ارجع لها"

توفيق "وهتفضل كده"

فارس "انا مسافر بكرة"

حياة بفرع "مسافر فين... كفاية سفر بقى انا تعبت من بعدك عنى"

فارس "متقلقيش ياماما... ده فرع الشركة هنا جوه مصر مش بره"

توفيق "فين"

"ف السويس"

توفيق "ليه"

"هبقى مرتاح اكثر"

توفيق "كله منها... هى السبب ف كل المصايب اللى بتحصل لنا"

فارس وهو قايم يدخل اوضته

"انا مسافر بكرة بالليل ان شاءالله... بعد اذنكم"

\*\*\*\*\*

ايمان ومايا ف التاكسى

ايمان "نزلنى هنا لو سمحت"

ايمان بتميل على مايا

"هجيب حاجة من السوبر ماركت واحصلك"

نزلت ايمان وكملت مايا ف التاكسى

وقف التاكسى ورا عربية واقفة قدام البيت

نزلت مايا من التاكسى وهى بتبص على العربية الغريبة اللى واقفة

قدام البيت بالظبط... وشنطة العربية مفتوحة وفيها شنطة سفر

كبيرة

قربت من الباب... شافته مفتوح

دخلت... وطلعت السلالم الاولى... وقبل ما توصل لشقة الجدة

شافت فارس نازل بشنطة سفر صغيرة

فارس اتفاجئ بمايا قدامه وهو نازل

لفت نظره شكل بطنها اللى اول مرة يشوفها بعد ما بان عليها اثر

الحمل

لحظات نفس التفكير بيدور ف خيال الاتنين

يتجاهلوا بعض ولا يسلموا على بعض

اول مرة يتقابلوا بعد ما كل واحد فيهم قطع اى صدفة ممكن

تجمعهم

وقطع فارس افكاره

"ازيك يامايا"

"الحمد لله"

وكملت وهى بتبص للشنطة

"انت مسافر"

فارس بوجع قلب

"مش مرتاح ف بيتى ولا وسط عيلتى ولا مع اللى بحبهم...يبقى

اقعد ليه"

"السعودية برضه"

"لا... السويس... تبع الشركة...طميننى على صحتك"

"الحمد لله"

"خلى بالك من نفسك ومن ابننا"

فتحت مايا شنطتها وطلعت صورة صغيرة للسونار

ناولتها لفارس وهى بتحاول تبتسم

"شوف صورتها"

مسك فارس الصورة...بص لشكل الجنين وهو بيبتسم

"بنت؟"

"اه"

باس الصورة اللى مفيهاش غير جنين ابيض واسود

ناولها الصورة تانى

“خلى بالك منها... ومتزعليش منى ف اى حاجة فاتت او اى كلمة

زعلتك فيها”

شافت لمعة دموع متحجرة ف عينيه... حسست ان دموعها ممكن

تنزل... اتكلمت بسرعة

“خلاص يا فارس... انت ابن عمتى وان كنا فشلنا ف جوازنا مش

عايزين نفشل كأب واب... خلى الصورة معاك لو عايز”

حط الصورة ف جيبه

“شكرا... بس احنا مفشلناش كزوجين... احنا ملحقناش”

وقاطعته مايا

“ياللا انا طالعة... توصل بالسلامة ان شاءالله”

طلعت مايا وفتحت باب الشقة بالمفتاح... ونزل فارس ركب العربية

اللى كانت مستنياه

\*\*\*\*\*

مايا اول ما دخلت وقفلت الباب وراها... باباها سألها

“ايه يامايا... عملتى ايه... نادر كلمنى وسألنى هينفع تسافرى ولا

لأ؟؟؟”

“لا قالى بلاش سفر ولا حركة كثير”

“طب وبعدين”

“سافر ياابا وهنبقى مع بعض ع التليفون”

“طيب هقوم اتصل بنادر واقوله انى هروح خلال الاسبوع الجاى”

“وانا من هنا هبقى اشوف اعلانات الشقق والمكاتب واشوف لو فيه

حاجة مكانها وسعرها مناسب هبقى اقولك...هتطول؟”

“لا هشوف بس الشغل ازاى هناك واشوف عايزنى ليه واجى”

“ماشى”

قام فؤاد دخل الاوضة يتكلم... مايا بتقعد

خبط الباب...قامت تفتح

“تعالى ياعمتى”

“قفلتى الباب ليه”

مايا بتقعد

“انا عارفة... اقعدى”

“لا انا طالعة احط الحاجة ف التلاجة...هو مفيش حد هنا”

“بابا جوه بيكلم نادر ونينة مشفتهاش اكيد نايمه”

“طيب...تصبحى على خير”

راحت ايمان ناحية الباب

سألتها مايا

“شفتى فارس”

التفتت لها ايمان وردت بتلقائية

“لأ..بتسأل لييه؟”

“فارس سافر”

رجعت لها ايمان وقعدت قدامها

“ايه..سافر فين؟”

“فرع الشركة ف السويس”

“اخص عليه مسلمش عليا..بس انتى عرفتى منين”

“وانا جاية قابلته ع السلم...يعنى كده كده مكنش هيقول لولا انى

قابلته بالصدفة”

“وبعدين”

مايا بتتصنع عدم التأثر

“مفيش... اتكلمنا عادى ووريته صورة السونار وقلت له انها بنت”

“هااا”

مايا بتبص لها

”بصى ياعمتى انا هقولك اللى حسيته بس متعلقيش على اللى

هقولهولك...بمعنى اصح متمسكيش عليه يعنى ”

”قولى”

”قلبى وجعنى وحسيت ان فارس صعب علبا”

”وليه طيب العند بقى”

مايا واحساس بالندم انها اتكلمت

”شفتى بقى...انا غلطانة انى قلتلك اللى حسيته... انا مش بعاند

والله”

”اومال ايه”

مايا سكتت مترددة...بتحاول توصف اللى جواها

”انا ... انا خايقة من فارس...بقيت بخاف منه ياعمتى...علشان

كده بقولك زى ما قتلته ان كنا فشلنا كزوجين مش عايزة نفشل نبقى

ام واب كويسين”

”فارس بيحبك”

”عارفة...بس الحب ده مشفعليش عنده ولا قدر يرحمنى ”

وكملت كلامها وذكريات الليلة المشؤومة قصاها

”فارس وجعنى اوى... وجعنى بقسوة... يمكن ألم جسمى خف انما

ألم قلبى وكرامتى مخفش..موجوعة اوى ياعمتى...اووووى”

\*\*\*\*\*

فارس ف العربية على طريق السفر

سرحان ف الطريق الممتد قدامه

غمض عينيه... وتخيّل

تانى يوم الفرح... الاهل عندهم بيهنوهم وفارس ومايا كل اللي

بينهم نظرات حب وسعادة

فارس مع مايا بيحضروا الفطار مع بعض

فارس نايم وجنبه مايا بيبص لها بحب وهو صاحى

فارس مع مايا عند الدكتور واول خبر للحمل بيسمعه مع بعض

فتح فارس عينيه من خياله على صوت فرقة عالية

"ايه يا اسطى... حصل حاجة"

السواق وهو بيهدى

"الحمدلله... الكاوتش فرقع بس ربنا ستر... حالا هغيره"

\*\*\*\*\*

مايا بتتكلم ف التليفون

"حمدالله ع السلامة ياابا... انا كويسة الحمدلله... لا ملقيتش

حاجة مناسبة... انت فين دلوقتى... يعنى نادر وصلك الاوتيل

ومشى... ماشى ابقى عرفنى عملت ايه... مع السلامة"

قفلت مايا مع فؤاد... مسكت بطنها وهى بتمدد على السرير وبتحط

اللاب جنبها وبتفتحه



دخلت على مواقع العقارات بتتفرج

اتفتح قدامها رسالة من نادر

”صباح الخير يامايا“

”صباح النور“

”ايه عاملة ايه“

”الحمدلله... لسه بابا مكلمنى وقال انك استقبلته ف المطار ووصلته“

”اه فعلا لسه سايبه من شوية... كنت اتمنى انك تيجى معاه“

”معلش ظروف“

”انا ممكن اسالك سؤال اخرجت انى اسأله“

وقفت مايا لحظات مش عارفة ترد بعد ما حسست بالسؤال

”لو مش عايزانى اسالك بلاش“

”عايز تسألنى على ايه“

”الاول قوليلى...متضايقه اننا بنتكلم“

”لأ..اتضايق ليه“

”يعنى علشان كل كلامنا قبل كده كان قليل اوى وفيين وفيين لما

اعرف اكلملك“

”كل الحكااية انى مبقدرش اقعدع النت كتير“

”صحتك عاملة ايه“

”الحمدلله“

”سؤالى... انتى ايه حكايتك“

”حكايتى؟“

”اه... كل اللى اعرفه انك مطلقة من اول شهر جواز... صحيح؟“

”صحيح“

”مش غريبة“

”النصيب بقى“

”انا اسف واضح انك اتضايقتى“

”مش موضوع اتضايقت... بس فيه حاجات ممكن تحصل تكون

غريبة بس اهى بتحصل“

”معاكى حق... وياترى ابو البيبى عارف انك حامل“

”اه طبعا... ابو البيبى يبقى ابن عمتى“

”والله؟؟ مكنتش اعرف“

وقصدت مايا تغيير الموضوع

”انا بدور حاليا على مكان مناسب للشركة“

”تمام ربنا يوفقك... انتى هتولدى امتى“

”لسه ٤ شهور“

”عايزين نكون بدأنا شغل“

”ربنا يبسر الامور ان شاءالله“

”هتقعدى تانى امتى... ابقى خليكى اون لايين لما تكونى موجودة“

”لما اكون قاعدة“

دخلت ايمان على مايا الاوضة

”بعد اذنك يا نادر...هقفل دلوقتي“

”اوك... سلام“

قفلت مايا مع نادر... وقفلت اللاب كله

”ايه بتعملى ايه“

”مفيش“

”مالك“

”حاسة الايام بتعيد نفسها“

”ازاى“

”فاكرة بعد ما خلصت الدراسة وكله انشغل بابا سافر ونسرين

اتجوزت وانا بقيت لوحدى... حاسة بنفس الاحساس تانى“

ايمان بقلق

”قصدك ايه“

حست مايا بقلقها فاتكلمت بنبرة متفائلة الى حد ما

”مفيش... انا دلوقتي احسن كتير... على الاقل مشغولة

ببنوتى...مش هننزل نجيب لها الهدوم“

”اى وقت يا حبيبتى نزل نجيب لها الهدوم“

\*\*\*\*\*

مايا وايمان مع الجدة ف البيت  
بتتفرج على الهدوم اللي اشتروها  
مايا بتوريها كل حاجة بفرحة  
فارس قاعد ف اوضة بسيطة  
ممدد على السرير ويبص على صورة السونار بابتسامة  
مايا ف اوضتها... على السرير  
سرير الاطفال الجديد جنب سريرها  
بتفتح اللاب... بتلاقى رسائل كثير من نادر  
بتدخل اون لاين وترد عليه... ويكون مستنيها  
وتبدأ محادثة بينهم  
فارس بيقلب ف صور مايا اللي على موبايله  
صور كثير ليها لوحدها وليهم مع بعض بعد الخطوبة  
وصور قليلة ليهم ف الفرحة  
فارس يخرج من الصور... ويقلب ف الاسماء  
يقف عند اسم مايا بتردد... صباغه ما بين زر الاتصال او زر  
الخروج... حيرة وحنين  
يحسم حيرته رنة الموبايل ف ايديه... ويرد  
"الو.. ازيك يا ماما... لا صاحي.. الحمد لله كويس... باكل  
متقلقيش... اه والله كويس... لا لسه مش دلوقتي... هبقى انزل

اسبوع كل شهرين... مش بعيد ولا حاجة يفوتوا بسرعة... ماما...  
بتسألنى على مايا؟؟ ابقى اسألنى عليها وطمئنى... خليكى قريبة منهم  
... مع السلامة"

\*\*\*\*\*

خلال الشهرين التاليين  
بعد فؤاد ما رجع... عرضت عليه مايا الاماكن الللى شافتهم مناسبين  
وكانت طول الفترة الللى فاتت بتتكلم يوميا مع نادر وبتبعته له كل  
حاجة تختارها ويتناقشوا فيها  
اختاروا شقة كبيرة ف عمارة ف وسط البلد  
بدأوا توضيحها... وكان نادر معاهم على التلفون دايم  
سواء فؤاد... او مايا

\*\*\*\*\*

مايا قاعدة مع ايمان وحياء والجدة  
حياة" ابقى خلى بالك يا مايا ومتنتعبيش نفسك"  
مايا" انا ثقلت تقلى يا عمى... بقيت لوعايزة ارواح الشركة افضل  
يومين اقول هروح كمان شوية هروح كمان شوية وفين وفين لما اقدر  
انزل.. ربنا يهون خلىنى اخلص بقى"  
ايمان" هانت اهو"  
توفيق طالع ع السلم... بص جوه الشقة بتكشيرة

”سلامو عليكو“

وطلع من غير ما يستنى رد

قامت حياة بعد ما شافته

”اما اطع احضر له الغدا... فارس بعد ما قال جاى بكرة قال جاى

بعد ٣ ايام...الولا وحشنى“

الجددة”ده معندوش دم...الولا يسافر من غير ما يقولى“

حياة”والله ياماما ما قالنا الا ليلتها...يالا رينا يجيبه بالسلامة“

تقوم حياة تطلع ورا توفيق

مايا”هو احنا مش اتغدينا من شوية... انا جعانة كده ليه“

الجددة”ياختى كلى بالف هنا“

ايمان وهى بتضحك قامت دخلت المطبخ

رن الموبايل وهو جنب مايا...

”رقم غريب!!“

ردت”الو“

ركزت تتحقق من الصوت

”مين...نادر؟... ازيك عامل ايه...الحمدلله كويسة... لا بابا ف

الشركة مش موجود... بتقول ايه؟؟ جيت امتى؟؟ مقلتلش يعنى...

لا اكيد مفاجئة حلوة...حمدالله على سلامتک... روح لبابا هتلاقيه

هناك...قاعد لحد بالليل... هقولك العنوان... مش لازم يعنى...

طيب ساعة كده بالكثير... مع السلامة"

ايمان بترجع من المطبخ وتحط صينية اكل قدام مايا

"ايه هو نادر جه ولا ايه"

"اه...وبيقولى عايز يروح الشركة وهبيجى ياخذنى"

الجدة"وانتى قادرة تروحي"

مايا"ولا قدرة ولا حاجة وقلت له اوصفلك العنوان مرضيش... هاكل

واقوم ألبس"

\*\*\*\*\*

نادر قاعد ف العربية مستنى مايا

مايا بتخرج م البيت...بتركب معاه

بيسلم عليها وهو بيضحك بعد ما تركب

"ازيك يامايا"

"حمدالله ع السلامة...بتضحك على ايه"

"شكلك متغير خالص هههههه"

ابتسمت وهى بتبص لبطنها

"يتغير...خدنا ايه من الجمال يعنى"

"لا معلش حاسبى ... زى القمر برضه"

سكتت مايا ومردتش عليه

"بابا عارف انك جيت ولا لا"

"لا مكلمتوش...كلمتك انتى بس"

مايا اتكلمت بجدية

"هى مراتك مبتجيش معاك"

"ليه"

"ابدا...هى وراها شغلها هناك مينفعش تسببه"

"انت كنت قلتلى انها عارفة انك هتفتح فرع هنا"

"اه عارفة... ومعندهاش مشكلة.. مراتى عقلانية اوى... اوى يعنى

لدرجة الغاء المشاعر"

"متهيألى ممكن نعمل الافتتاح قريب...انت قاعد قد ايه"

"قاعد معاكم شوية"

"كويس نبقى نعمل الافتتاح ونبدأ شغل ان شاءالله... احنا قربنا

الشركة هتلاقىها على الناصية الجاية"

"المكان حلو اوى"

"اه والمكان كبير من جوه...هتعجبك اكيد"

\*\*\*\*\*

مايا قاعدة ف اوضتها..دخلت لها ايمان

"حبيبتى صاحبة"

"اه ياعمتى...نزلتى امتى مش طلعتى تنامى"



”بصى بقى... بعد ما خلاص طلعت ع السرير وهنام... حسيت انى

عايزة اتكلم معاكى ولو استنيت للصبح ماما بتبقى قاعدة معانا

وساعات حياة بتنزل مش هعرف اتكلم معاكى”

”ايه يا عمتى... فيه سر ولا ايه”

”انا ملاحظة كده كلام كتير بينك وبين نادر... تليفونات ونت واول

ماجه انتى اول واحدة كلمك... ده حتى مراحمش لامه”

”عادى... شغل”

”عليا يا مايا... قوللى ايه الحكاية”

”بصى... هو النهاردة لما جه اخدنى”

”هااا... ايه؟”

”كلامه وتلميحاته كانت زيادة عن كل مرة“

”زيادة؟“

”اه... دائما لما بيكلمنى ع الننت او التليفون يقعد يحكى لى عن حياته

وعن عيشته وانه مش مرتاح وكده“

”وانتى؟“

”انا بحكى عادى... ماهو اكرت واحد ببسأل عليا بعدك يا عمتى“

”وبعدين“

”بس النهاردة لما قعد يلح بقبت اغير الموضوع واجيب سيرة حاجة

تانية“

”بصى يا مايا... انتى لسه صغيرة يعنى كده كده لازم

هتتجوزى... بس انا بقول فارس اولى علشان بنتكم“

”يا عمتى لا فارس ولا نادر ولا اى راجل خلاص كفاية“

”كفاية ايه هتقعدى كده“

”اه... هربى بنتى واشتغل مع بابا وعندى طموح كبير اوى انى

انجح ف شغلى الجديد“

”والجواز والاسرة“

"الاسرة ربنا يخليكو ليا...انما الجواز... بصى ياعمتى... مبعقتش

متقبلة اى راجل ف حياتى"

"بس هتحتاجى وجود راجل ف حياتك"

"لما ابقى احتاج ابقى افكر...انا دلوقتى كل اللى بفكر فيه بنتى اللى

مستنيتهاا وشغلى اللى مستنينى"

"ربنا يقدم اللى فيه الخير"

\*\*\*\*\*

تانى يوم... مايا قامت م النوم على صوت التليفون

"الو... صباح النور... لا صحيت خلاص... لا مش قادرة اجى

الشركة النهاردة...انت روحت بدرى كده...وبابا معاك؟... لا عايزة

ارتاح النهاردة... ربنا يسهل بكرة...مع السلامة"

قامت مايا بتثاقل...خرجت م الاوضة

شافت ايمان وجدتها ف المطبخ

مايا"صباح الخير"

الجدة"مساء النور ياختى"

ايمان"صباح النور يامايا... هحضرك الفطار لحد ما تخلصى الحمام"

مايا قاعدة بتفطر... نزلت حياة وقعدت جنبها ومدخلتش المطبخ

"ازيك يا مايا"

"الحمد لله ياعمتى"

”الا قوليلى...انتى امبارح نزلتى مع مين“

”مع مين ازاي؟“

”حد جالك بعربية؟“

مايا بتسيب الاكل اللى ف ايدها

”اه ياعمتى...نادر شريكنا ف الشركة كان جاى م السفر وعلى فكرة

بابا عارف لانى كنت رايحة له“

حياة بقلة حيلة

”بلاش يا مايا تخلى حد يتكلم عليكى وعلينا...توفيق شافكم امبارح

وكان منظركم وحش...متنسيش انك متطلقة“

مايا وهى بتقوم بعد ما اتضايقت من كلام عمته

”مش ناسية“

\*\*\*\*\*

مايا ف اوضتها...بتدخل عليها ايمان

”قومى يامايا...ابوكى ونادر هنا“

”نادر؟“

”اه...قومى لحد ما نحضر الغدا“

خرجت ايمان من الاوضة...قامت مايا غيرت هدومها وخرجت

سلمت على نادر وقعدت معاهم هو وباباها

فؤاد" احنا اتفقنا اننا نعمل الافتتاح يوم الجمعة بعد الجاى... ايه

رايك"

مايا"كويس"

فؤاد"هنسافر انا ونادر شرم والغردقة بعد بكرة كام يوم ونرجع... لو

كنتى تقدرى تيجى معانا كنتى جيتى"

مايا"لا لما اولد ابقى براحتى"

نادر"طيب ع الاقل تعالى الشركة بكرة فيه حاجات عايزك تعرفيها"

مايا"حاضر"

صوت ايمان

"ياللا... الغدا جاهز"

\*\*\*\*\*

فارس راجع بعد الاجازة وكله اشتياق لمايا اكثر من اى حد تانى

اول ما نزل من العربية اللي جاى بيها\

نزل الشنط... فتح الباب الخارجى

طلع السلم بسرعة لحد بيت الجدة... ودخل

ايمان قاعدة مع الجدة

ايمان"فارس... حمدالله ع السلامة"

راح سلم عليها وبعدين على جدته

فارس"الله يسلمكم"

الجدة"كده ياولا ولا تسلم عليا قبل ماتسافر"  
فارس"معلش يانينة كنت مستعجل وكنا بالليل"  
فارس بيدور بعنيه على مايا...وسأل عليها  
"هى مايا نايمة ولا ايه؟"  
ايمان"مايا ف الشركة... اصل هيفتتحوها قريب"  
فارس بخيبة امل  
"وصحتها عاملة ايه؟"  
ايمان"اهى شوية تعبانة وشوية كويسة...ربنا يهون بالشهرين  
الفاضلين"  
فارس"ربنا يهون...اما اطلع زمان ماما مستنيانى"  
ايمان"اه يا عينى مستنيك بقالها كام يوم...اطلع لها بسرعة"

\*\*\*\*\*

فارس داخل البيت...اول ما سمعت حياة صوت الباب  
قامت تهرول ناحيته  
"ياحبيبى يا ابنى...وحشتنى يا ضنايا"  
تحضنه حياة بكل حب وحنان  
"وحشتينى ياماما...عاملة ايه"  
ويجى توفيق بلهفة على صوت حياة  
"حمدالله ع السلامة يا فارس"

يسلم عليه فارس ويحضنه

”وحشتنى يا بابا...ازى صحتك“

حياة”انا عامالك كل الاكل اللى بتحبه... ثوانى الاكل يكون

جاهز...شهرين كتير اوى يافارس... بلاش كل الغيبة دى”

يبتسم لها فارس من غير ما يرد...وتكون هى راحت ع المطبخ

\*\*\*\*\*

مايا وفؤاد راجعين بالليل ونادر بيوصلهم

مايا نزلت م العربية... وفؤاد من جنب نادر

نادر”٧ الصبح هعدى عليك...تمام“

فؤاد”تمام...هكون جاهز... مع السلامة“

تمسك مايا ف ايد فؤاد وهما داخلين البيت

اول ما تدخل تفوجئ بفارس قاعد مع ايمان

فارس يقوم اول ما يشوفهم...يسلم على فؤاد وعينيه على مايا

مايا واقفة مكانها...بعد ما سلم فارس على فؤاد...سلم عليها

”ازيك يامايا...وازى صحتك“

”الحمدلله...انت عامل ايه؟“

”كويس“

ايمان”مالك وشك مصفر ليه كده يا مايا“

مايا وهى بتتعد بتقل

”مفيش حاسة بهبوط بس”

فارس بلهفة

”من ايه؟؟ وليه ساكتة طيب مرحتيش للدكتور ليه”

مايا بتضحك

”انا لو روحت للدكتور كل ما احس بحاجة مش همشى من عنده”

فارس وهو بيتعد

”انتى تعبانة للدرجة دى”

ايمان”هو الضنا ببيجى بالساهل يا ابنى”

فؤاد وهو قاعد... بص ف الساعة

”طب هقوم انام شوية... معلش يا فارس عايز اقعد معاك بس مسافر

الصبح”

فارس”لا براحتك ياخالى... انا قايم”

ايمان”تلاقى حياة نايمة... استنى لما تتعشى مع مايا وفؤاد”

فؤاد”لا متعمليش حسابى انا تعبان ونفسى انام... تصبحوا على خير”

دخل فؤاد اوضته... ودخلت ايمان المطبخ

فارس ومايا قاعدين مع بعض... مايا قاعدة ساندة ظهرها وراسها

على الكنبه وحاطة ايدها على بطنها

فارس بيبص لها بحب

”وحشتينى يا مايا”



مايا معرفتش ترد... ترد باحساسها ولا بعقلها

"وانت كمان يا فارس"

فارس بفرحة

"بجد؟؟ وحشتك"

"انت ليه مش مصدق انك غالى اوى عندى"

"غالى؟؟ بس انا بحبك"

لحظات تردد... ودمعت مايا

"وانا حبيتك يا فارس... وكنت كل ما ليا ف الدنيا وقلت ربنا

عوضنى عن كل احساس افتقدته... علشان كده صدمتى فيك كانت

على قد حبى ليك واكثر"

"احنا فيها... نرجع يامايا"

"مينفعش"

"ليه"

"مبقتش آمن على نفسى معاك"

"انا؟؟"

"للاسف ايوه... انت نسييت انت عملت فيا ايه"

"مش عايزة تنسى ابدأ"

"عايزة انسى... بس مش قادرة.. والله ماقادرة"

"انتى عارفانى كويس... انا عمرى كنت وحش معاكى"

مايا بتمسح دموعها

”لآ... وده اللي صدمنى اكثر... حسيت ان كتب الكتاب حولك

واحد تانى الكام ساعة اللي كنت فيهم على ذمتك كنت واحد تانى

معرفوش... واضح ان مالناش نصيب مع بعض يافارس... خلينا كده

محافظين على عشرة زمان علشان مستقبل بنتنا... مش اكثر من كده”

”مفيش فايده؟“

”غصب عنى... مش قادرة انسى الضرب ولا تشكيكك فيا ولا

فضيحتك ليا“

”مش عايزة تسامحينى ليه... انا قدرت اللي حصلك ومبتكلمش فيه“

”متفكرنيش الله يخليك... مش عايزة افكر“

ايمان بتحط العشا

”ياللا ياولاد“

بصت عليهم شافت مايا بتعيط... قربت منهم

”فى ايه؟“

فارس وهو بيقوم ”مفيش ياخالتي... مفيش فايده“

\*\*\*\*\*

فارس داخل البيت... النور مطفى... دخل على اوضته

قعد على طرف السرير... متضايق

دخل له توفيق... فتح النور وجاب كرسي وقعد قصاده

”مالك يافارس“

”مفيش يابابا“

”قابلت بنت خالك؟“

”اه؟“

”وكان معاها شريكهم برضه؟؟“

بص له فارس باستغراب

”شريكهم؟“

”اومال ايه اللي مضايقتك كده؟“

”فهمنى بس يابابا ايه حكاية شريكهم دى“

”قريب ممدوح اللي مشاركتهم ف الشركة اللي بيفتحوها...على طول

قاعد عندهم تحت يا اما مايا خارجة داخله معاها وفكرت اتكلم بس

مسكت نفسى بالعافية وقلت مليش دعوة اهي ف حكم ابوها“

”داخله خارجة معاها؟؟ ليه؟“

”معرفش... بس طريقتهم ملفتة اوى ... انا مش عايزك تفضل

حابس نفسك ف اللي فات...مين عارف يمكن مستنيها تولد

ويتجوزوا“

”لا مش معقول“

”مش معقول ليه؟ وهى هتفضل يعنى طول حياتها عزبة؟...لازم تفكر انت كمان

ف حياتك وانسى اللي حصل“

\*\*\*\*\*

تانى يوم... طول اليوم وفارس قاعد ف البيت مش بيخرج وبيفكر ف  
كلام باباه وبيقارنه بردود مايا عليه  
مايا طول اليوم تعبانة ومش قادرة تقوم م السرير  
وكل شوية نادر يكلمها ويطن عليها

\*\*\*\*\*

نادر وهو قاعد مع فؤاد بيتعشوا ف الاوتيل اللي نازلين فيه  
"استاذ فؤاد كنت عايز اكلمك ف موضوع شخصى"  
"خير"

"انت جيت تركيا وشفيت حياتى ومراتى هناك... ايه رايك او  
استنتاجك عن حياتى"  
فؤاد بارتباك

"دى حياتك وانا معرفش حاجة عنها"

"انا ومراتى مختلفين تماما لاختلاف الطباع والتفكير والبيئة وكل  
حاجة... ومن زمان ماما كانت بتقولى نفسها اجى واستقر واتجوز  
هنا... مش هطول عليك انا محسيتش بانى فعلا عايز اتجوز واستقر  
هنا غير لما شفيت مايا... انا عارف انه طلب سابق لاوانه بس انا  
حببت اعرفك انى عايز اتجوزها على سنة الله ورسوله"  
فؤاد بارتباك اكثر

“هى رأبها ابه”

“انا مصارحتهاش... انا كنت بلمح بس ولما لقيت فرصة واحنا

بنرددش مع بعض قلت اخذ رأيك”

“والله يانادر القرار قرارها هى لو قالت آه يبقى خير لو قالت لأهى

حرة انا مقدرش افرض عليها رأى”

“لما نرجع ان شاءالله هصارحها برغبتي دى واشوف رأيها”

\*\*\*\*\*

مايا وهى على السرير... حسست بمغص خفيف

حاولت تنام... حسست المغص بيزيد

فتحت نور الاباجورة اللى جنبها... واتعدلت تقعد وهى بتمسك

بطنها

بتحاول تستحمل المغص اللى بيزيد

نادت على جدتها... صوتها طلع ضعيف ميتسمعش

مسكت الموبايل اللى جنبها واتصلت بايمان... وبصوت مرتعش

“الو... عمتي انا تعبانة اوى انزليلي بسرعة”

دقايق ولقت ايمان بتدخل عليها الاوضة وهى بتعيط من الالم

“مالك يامايا”

“بطنى هتموتنى وحاسة بهبوط... وعايضة ادخل الحمام ومش قادرة

من الدوخة”

”طب اتسندى عليا“

وسندتها ايمان وهى بتقوم..واول ما وقفت

مايا برعب”ايه المياھ دى كلها“

ايمان بفزع”يا مصيبتى... دى باينها ولادة“

مايا بتصوت من الالم...ايمان اخدت موبايل مايا واتصلت بفارس

”الو... الحقتنى يافارس...مايا بتولد“

وقبل ما تكمل كلامها...مايا داخت وقعدت ع السرير واغمى عليها

ف حضن ايمان

ايمان بتصوت وبتحاول تفوقها

”بسرعة يافارس...دى اغمى عليها...اتصل بالاسعاف“

\*\*\*\*\*

فى المستشفى...فارس وايمان وحياة وتوفيق والجدة قدام اوضة

العمليات... خرجت ممرضة تجرى من الاوضة... ورجعت تانى

دقايق وخرجت ممرضة تانية

فارس”فى ايه؟؟“

الممرضة”الام جالها نزيف شديد والجنين مش مكتمل“

ايمان”يعنى ايه... المهم الكبيرة“

الممرضة”الاتنين حالتهم خطر...ادعولهم“

فى المستشفى... فارس وايمان وحياة وتوفيق والجدة قدام  
اوضة العمليات... خرجت ممرضة تجرى من الاوضة... ورجعت  
تانى  
دقايق وخرجت ممرضة تانية  
فارس "فى ايه؟؟"  
الممرضة "الام جالها نزيف شديد والجنين مش مكتمل"  
ايمان "يعنى ايه... المهم الكبيرة"  
الممرضة "الاتنين حالتهم خطر... ادعولهم"  
مشيت الممرضة وفارس واقف وكلهم متوترين  
رجعت الممرضة بعض دقايق  
"محتاجين دم ضرورى للأم... المستشفى فيها كيس واحد من نفس  
فصيلتها ومحتاجين ٣ كمان"  
ايمان "انا O وممكن اديها"  
الممرضة "طيب اتفضللى معانا.. لسه محتاجين كيسين كمان"  
فارس "وانا... انا اكملها"  
الممرضة "لسه هنحتاج كمان"  
بصوا حياة والجدة وتوفيق لبعض

توفيق" طب هنزل اروح اشوف فين؟؟ فين بنك الدم"

المرضة" احنا محتاجين الدم بسرعة"

فارس"كملوا منى"

المرضة"كتير كيسين"

فارس"لا مش كتير ولا حاجة...المهم تبقى كويسة"

ايمان وفارس قاعدين مع الممرضة ف اوضة...بتسحب منهم الدم

"مممكن تستريحوا هنا شوية...واتفضلوا العصير ده"

\*\*\*\*\*

ممرضات خارجين بمايا من اوضة العمليات

كلهم راحوا وراها... توفيق مش موجود معاهم

الممرضات بيحطوا مايا على السرير وهى فاقدة الوعى

الدكتور دخل لهم

الجدة"حالتها ايه يادكتور الله يخليك قولى"

الدكتور"الحمدلله...هى هتبقى بخير"

حياة"والبننت؟"

الدكتور"بين ايدى الله...الولادة مبكرة والرثة مش مكتملة...هى

اخذت حقنة للرثة وف الحضانة... ومحدث يقدر يجزم هيحصل

ايه"

فارس بصوت مخنوق

"المهم مايا تبقى بخير"



\*\*\*\*\*

توفيق واقف قدام الحضانة...بيبص على الطفلة وسط الاطفال

الموجودين

قلبه بيدعى وعينيه مدمعة

"يارب يشفيكى ... يارب تبقى كويسة واشيلك واخذك ف حضنى"

تيجى حياة جنبه

"انت هنا يا توفيق؟"

"بصى صغيرة اوى ازاي... شكلها حلو"

"يارب يشفيها ويخليها... يالا ياتوفيق"

"تفتكرى لو مكنتش بنت فارس قلبى كان هيحن لها اوى كده"

"انت بعد كل اللي عرفته ده لسه تانى هتقول الكلام ده"

"استغفر الله العظيم...استغفر الله العظيم"

"يالا ياتوفيق ماما مستنيانا...المرضات مشونا وقالوا ممنوع نبقى

موجودين"

\*\*\*\*\*

فارس واقف ف شباك اوضة مايا

وراه مايا نائمة ع السرير...بيبص للسما وبيقول ف سره

"يارب...انا طمعان ف رحمتك... خليهوملى الاتنين... يارب"

ايمان تخبط على كتفه

”تعالى ارتاح ع السرير شوية وانا هقعده الكرسى“

يلتفت لها والدموع ف عنيه...تتفاجئ

”ايه يا فارس...وحدالله هيبقوا كويسين“

”يارب ياخالتي“

مايا بتفوق... قبل ما تفتح عينيه...بدأت تسمع...سمعت فارس

وهو بيكمل كلامه مع ايمان

”عارفة ياخالتي...انا خايف ع الاتنين زى بعض...خايف على مايا

علشان مش متخيل حياتى من غيرها وخايف على بنتى علشان هى

الوحيدة اللى ممكن تربطنى بمايا طول العمر حتى لو مرجعناش

لبعض“

صوت مايا بتتألم...يلتفتوا لها الاتنين... يقربوا منها

ايمان تمسك ايديها

”سامعانى يامايا“

مايا تضغط ضغطة خفيفة على ايد ايمان

فارس”حمدالله على سلامتک“

مايا”انا ولدت؟؟“

ايمان”اه يا حبيبتي الحمدلله“

مايا”هى فين؟ هاتيهاالى ياعمتى“

فارس”هى ف الحضانة كام يوم كده بس وهتبقى كويسة“

مايا "عايزة اشوفها"

ايمان "لما الدكتور يقولك تتحركى ابقى روحى لها"

فارس بيبيص لها بحب... عينيهما بتغمض من اثر الالم والبنج

\*\*\*\*\*

الصبح... جه الدكتور يكشف على مايا

خرج فارس من الاوضة

ايمان "ايه الاخبار"

الدكتور "تمام... الخوف كله كان من النزيف اللى جالها امبارح بس

النهاردة الحالة استقرت... ساعتين وتحاولوا تخليها تمشى شوية"

مايا "وبنتى؟"

الدكتور "لسه بدرى لحد ما نقدر نحدد حالتها... حمدالله على

سلامتك"

يخرج الدكتور من الاوضة... ييجى فارس بعدها

فارس "الدكتور طمنى... حمدالله على سلامتك يامايا"

مايا "الله يسلمك... شفت البننت؟"

فارس "اه وكنت بجيبها لك تشوفها"

جاب صورتها على الموبايل... ووراها لمايا

ايمان "صورتها ازاي"

فارس "واحدة من المرضات قتلها وصورتها لي"

مايا بتبص للصورة...ويتبتسم

"حبيبتي"

فارس"هااا هتسميها ايه علشان ارواح اعلم شهادة الميلاد"

ردت مايا بتلقائية

"انا مفكرتش...ايه رايك انت؟؟"

فارس بفرحة"ايه رأيك نسميها مريم...بحب الاسم ده وقريب من

اسمك"

مايا"حلو اوى يا فارس...خلاص مريم"

سمعوا صوت دوشة ف الطرقة...وصوت حد بيعيط

وشافوا ظابط وامين شرطة معديين

ايمان"هو فيه ايه؟؟"

مايا"حد مات ولا ايه؟"

فارس راح وقف على باب الاوضة... شوية وجت ممرضة لمايا

الممرضة"الحقنة يامدام"

ايمان"هي ايه الدوشة والضابط اللي دخل الاوضة اللي جنبنا دي"

الممرضة"دي بنت بتاعة ١٧ سنة جت من ساعة مع مامتها عندها

نزيف...طلع جوز مامتها مغتصبها"

اتنفضت مايا مع الكلمة... عينيها جت ف عينين فارس اللي حس

بوقع الكلمة عليها... خرجت الممرضة بعد ما مايا اخدت الحقنة

دقايق...وجه فؤاد ومعاه نادر  
فؤاد داخل بلهفة "مايا حبيبتي...حمدالله على سلامتک"  
فارس بييص لنادر...وافتكراه  
نادر سلم على ايمان...وعلى فارس...وراح لمايا  
"حمدالله على سلامتک... كده تخضينا عليكى"  
فارس حس الدم بيغلى ف عروقه...حست بيه مايا...ارتبكت  
ومعرفتش ترد على نادر  
فارس "انا رايح الحضانة اطمن على مريم"  
فؤاد بفرحة "سميتها مريم...هى فين..عايز اشوفها"  
قام فؤاد مع فارس راحوا عند الحضانة  
فارس بتردد "خالى... هو شريكك ده ايه اللي جابه معاك هنا...وايه  
علاقته بمايا بالظبط... انا من اول مرة شفته فيها وشايفه مهتم بيها  
زيادة...ايه الحكاية"  
فؤاد "نادر عايز يتجوز مايا"  
فارس بصدمة حاول يتقبلها  
"وهى رأيها ايه؟"  
"هى لسه متعرفش... متهيألى ده حقها"  
فارس بانهزام "حقها"

\*\*\*\*\*

مايا بتدخل اوضتها وايمان مسنداها

بتنيمها على السرير

”مرتاحة كده؟“

”اه الحمدلله“

”هو فارس فين؟“

”معرفش بره ولا طلع فوق“

فؤاد دخل لمايا

”خدى يا مايا... شهادة الميلاد بتاعة مريم“

”هو فارس طلع؟“

”اه... نادر جاى يسأل عليكى كمان شوية... وخلي بالك قبل

ماتولدى بيوم كان بيكلمنى انه عايز يتقدم لك“

مايا باستغراب

”ينقدم لى؟؟ هو ده وقته؟“

”اكيد مش وقته ومكنش يعرف انك هتولدى ف نفس الليلة... بس

احتمال يسألك عن رأيك“

ايمان”انتى ايه رأيك؟“

مايا”كل اللى بفكر فيه دلوقتى بنتى... ان رينا يشغيبها ويخليهاالى“

\*\*\*\*\*

فارس قاعد فى اوضته...ماسك صورة السونار وصورة مريم ع الموبايل  
وهى ف الحضانة... يرن الموبايل ف ايده ويستغرب  
"الو... ازيك يا مايا... عاملة ايه النهاردة... اه روجت اطمنت  
عليها... هتقدرى تنزلى؟؟ حاضر هاخذك تشوفيهها بكرة...هكلمك  
الصبح قبل ماانزل علشان تجهزى...مع السلامة"

\*\*\*\*\*

فارس ومايا واقفين قدام الحضانة بيطمنوا على مريم  
خلصوا... وخرجوا من المستشفى  
"هتقدرى تمشى لحد باب المستشفى ولا اطلع اجيبلك تاكسى"  
"لا هقدر...المفروض امشى عادى وبعدين انا بقالى ١٠ ايام والدة"  
سكتت فارس...ومشى وهى ماشية جنبه  
"انا اجازتى هتخلص بكرة ومسافر"  
"انت مش كنت مديتها"  
"اه...وخلصت...خلى بالك من مريم ولو مش هتتضايقى ابقى اكلمك  
اطمن عليها...ولو كلامى معاكى هيسببلك مشاكل هبقى اكلم خالتى"  
"ايه يا فارس...انت بتتكلم بالطريقة دى ليه؟؟ ومشاكل ايه اللى  
هتسببهاالى"  
"يعنى...عرفت ان شريككم طلب يتقدم لك... حقتك يا مايا طبعاً"

"هو حقى ايوه...ومن حقى انى ارفض برضه"

فارس التفت لها بفرحة

"انتى رفضتية؟"

"ايوه"

"واحناء؟"

"احناء ايه؟"

"انا عارف انك مبقتيش تحببىنى زى الاول بس انا والله بحبك زى

الاول واكثر"

سكتت مايا...ومقدرتش ترد...وفهم فارس انها بتتهرب من

الاجابة...سكتت هو كمان لحد ما خرجوا ووقف تاكسى وراحوا

البيت

\*\*\*\*\*

مايا داخلة عيادة دكتورة نفسية...بتسلم عليها

"ها عاملة ايه يامايا"

"الحمدلله"

"ومريم"

"الحمدلله...كانت تعبانة اليومين اللى فاتوا بسبب تطعيم الـ ٩

شهور"

"سلامتها كل الاطفال كده"



"ماهى عمتى طمنتنى الحمد لله"

"واخبار شغلك"

"ماشى كويس اوى... وبقيت بسوق كويس بعد ما كنت خايفة من

السواقة بس بابا صمم ان العربية تبقى معايا"

"جميل... واخبار فارس ايه"

"نازل اجازة قريب"

"كويس... المرة اللى فاتت مكملتيش تفاصيل بعد ما ولدتى ورفضتى

الرجوع لفارس"

"بعدها... سافر من غير حتى ما يسلم عليا... هو كان فاكرنى بطلت

احبه ودى مش الحقيقية طبعاً... وكنت واضحة مع نادر ف رفضى

وان علاقتنا تبقى شغل وبس... خصوصاً انى بعد ما سمعت حكاية

اغتناب البنات فى المستشفى وانا قلت استحالة ممكن اتجوز

واعرض بنتى لموقف زى ده... بعدها بقيت افكر انى اتعود على

الحياة لوحدى... بس لقيت نفسى بتيجى عليا اوقات محتاجة

لفارس... كنت بتصل بيه وبيتصل بيا كان كل كلامنا على مريم...

كان لما ببيجى اجازة ببقى مش عايزاه يسيبنى ويطلع البيت.. اكثر

من مرة فكرت انى اقوله نرجع لبعض.. كنت بخاف وارجع افكر

ضربه ليا"

"بس من كلامك يامايا ان فارس عمره ما كان قاسى عليكى"

"ايوه...الامرة دى بس"

"بس حبك ليه واحتياجك لوجوده جنبك مش اقوى"

"مبقتش افكر كتير ف اليوم ده وبقيت بلتمس له العذر"

"مقلتلش صحيح...ابو فارس لسه بيضايقك"

"لا خالص... ده رجع يبقى عندنا على طول... ومبيقدرش يعدى"

"نص يوم من غير ما يشوف مريم"

"انتى كده مبقتيش محتاجالى يامايا"

"حضرتك ساعدتيني كتير...انا فعلا حسيت انى واحدة تانية مقبلة"

"على الحياة ومتفائلة غير الاول خالص"

"الحمد لله"

"ايه رأيك اقول لفارس يرجع شغله هنا تانى"

"انتى عايزاه يرجع"

"اه...بيوحشنى اوى طول ماهو مسافر"

"خلاص يامايا...قوليله كل اللي بتحسياه ناحيته من غير قلق او"

"خوف"

\*\*\*\*\*

مايا قاعدة ف بيت جدتها مع حياة وايمان والجدة ... كل شوية  
تبص ف الساعة ف انتظار فارس  
اول ما تسمع صوت الباب الخارجى... تحس ان قلبها هيطيير ناحية  
فارس... تقوم بسرعة  
الجدة"رايحة فين"  
مايا"متهيألى سمعت صوت ع السلم"  
تخرج من الباب... تنزل بلهفة على السلم  
فارس يكون بيقلق الباب الخارجى  
يتقابلوا على السلم... والحب واللهفة ف عيونهم  
يمد ايده يسلم عليها... تسلم عليه وتقوله وايدها ف ايده  
"حمدالله ع السلامة يا فارس"  
"الله يسلمك... وحشتينى انتى ومريم"  
"وانت وحشتنا اكثر"  
نظرات حب صامته بينهم... نظراتهم متقابلة... ايديهم ف ايد بعض  
مايا بتستجمع جرأتها  
"فارس... متسيبناش وتسافر تانى.. ارجع شغلك هنا وخليك جنبنا"  
"جنبكم... انا نفسى نبقى مع بعض"  
"ارجع ومتسيبناش تانى "

قالتها وعينيها مليانة دموع حب وشوق  
حزنها فارس... وحست بالامان ف حزنه

■ تمت ■